

## Isarhe Iyiki Ize iyi Umatta aka atseng

### Utsutson ri itsi ubvur Umatta

Awu Umatta atseng ubvur uwurε. Unga awu utsa Uyahuda, unying ra angwε imesu Uyesu.

Ubvur uwurε udeyiwe uge Uyesu unga awu Ukiristo ha umbɔ aka abemuwa ru ibibemuwe-Num iyiki igbe, unga awu unerwi abi Uyahuda aka atsu amenmbɔ uge ibanga. Idikinga irheirhe ubvur uwurε uku uyisu Uyesu uge, <<Ungwε Udauda>>. Nu ngge iki iwe uge Isarhe Iyiki Ize ha isi ikpongge iyiyεi akarhārḥā ra abi Uyahuda, rimi hā ɛicang ishingge Isarhe Iyiki Ize iyi Uyesu Ukiristo iwu iyi anera kishoo ru upfunga, ra abi Uyahuda nu abirabε aka asi iwembɔ abi Uyahuda.

Ru ubvur Umatta, atseng imesu Uyesu ra agber akagɔng atɔɔ. Aki inggbaashia awu imesu Uyesu ni itsi igũ, iyiriyε iki ideyiwe ikpũ isisei ha abika adɔsa aka isei ri ibibεkmbɔ (arherhe aki 5–7). Ikei imesa iyɔɔ iwengge ri itsi itseryε uner itser Uyesu iki imεε unga akorhe (arherhe aki 10). Ikei atsengmbɔ nyaka arherhe urherhe ri itsi iyerha afā (arherhe aki 13). Nu imesa ri itsi amenke aka amεε uner uku udɔsa awerake nu ikpũ iferhe ha iki imεε unga akorhe (arherhe aki 18). Ra arherhe aki imaataka, Umatta adeyiwe nggaa itseryε Uyesu aka adzowe abika adɔsa, ngge iwu itser iyiki idzowe Isarhe Iyiki Ize.

#### **Abinkε aka awe umɔ**

Atoku Uyesu nu imarnga (1.1–2.23)

Udŭwã Uyohana Uner Ubŏtisima (3.1-12)  
 Isorhu ubŏtisima Uyesu nu iviviranga (3.13–  
 4.11)  
 Itser Uyesu ru Ugarhirhi (4.12–18.35)  
 Izizĩ Uyesu ru Urusharhima (19.1–20.34)  
 Usati Uyesu ukpu imaatak ru Urusharhima  
 (21.1–27.31)  
 Inyinyapuwe Uyesu nu akpenga (27.32-66)  
 Isisok Uyesu nu idzidzekanga (28.1-20)

*Ubvur atoku Uyesu*

<sup>1</sup> Ubvur unang Uyesu Ukiristo, ungwẽ Udauda  
 uwuruwi aka awu ungwẽ Uibrahim.

<sup>2</sup> Uibrahim unga awu utɛ Uishaku,  
 Uishaku unga awu utɛ Uyakubu,  
 Uyakubu unga awu utɛ Uyahuda nu angwẽmbɔ,

<sup>3</sup> Uyahuda unga awu utɛ Ufereza nu Uzera, uy-  
 isumbɔ aka awu Utamar,  
 Ufereza unga awu utɛ Uhezuron,  
 Uhezuron unga awu utɛ Uaram,

<sup>4</sup> Uaram unga awu utɛ Uamminadab,  
 Uamminadab unga awu utɛ Unashon  
 Unashon unga awu utɛ Usarhmon,

<sup>5</sup> Usarhmon unga awu utɛ Ubo'aza. Urahab  
 unga amar Ubo'aza,  
 Ubo'aza unga awu utɛ Uobida. Urut unga amar  
 Uobida,

Uobida unga awu utɛ Ujesse,  
<sup>6</sup> Ujesse unga awu utɛ Uyerhe Udauda.

Udauda unga awu utɛ Usorhomon. Utsɛrha  
 Uriya unga amar Usorhomon,

<sup>7</sup> Usorhomon unga awu utɛ Urhehobowam,  
 Urhehobowam unga awu utɛ Uabijah,

- Uabijah unga awu utε Uasa,  
8 Uasa unga awu utε Uyehoshafat,  
Uyehoshafat unga awu utε Uyoram,  
Uyoram unga awu utε Uazariya,  
9 Uazariya unga awu utε Uyotam,  
Uyotam unga awu utε Uahaz,  
Uahaz unga awu utε Uhezekiya,  
10 Uhezekiya unga awu utε Umanasse,  
Umanasse unga awu utε Uaman,  
Uaman unga awu utε Uyosiya,  
11 Uyosiya unga awu utε Uyekoniya nu  
angwēmbō ri ivangye umbō aka akarha umbō  
azĩ abĩ akase ru Ubabirha.  
12 Umbō aka akarha umbō azĩ atsĩ abĩ akase ru  
Ubabirha,  
Uyekoniya unga awu utε Ushayarhtiyerh,  
Ushayarhtiyerh unga awu utε Uzerubaberh,  
13 Uzerubaberh unga awu utε Uabihudu,  
Uabihudu unga awu utε Uerhiyakim,  
Uerhiyakim unga awu utε Uazor,  
14 Uazor unga awu utε Uzadak,  
Uzadak unga awu utε Uakim,  
Uakim unga awu utε Uarhiyud,  
15 Uarhiyud unga awu utε Uerhiyeza,  
Uerhiyeza unga awu utε Umatana,  
Umatana unga awu utε Uyakubu,  
16 Uyakubu unga awu utε Uyusuf utsaka  
Umaryamu, uya Uyesu, umbō aki iyisa  
Ukiristo.  
17 Kishoo andanna udzur ri Uibrahim uba utsĩ  
Udauda awu usōka na anaa. Udzur nu Udauda  
uba utsĩ ri ivangye umbō aka akarha abi Uisrairha  
azĩ abĩ akase ru Ubabirha, andanna awu usōka na

anaa. Udzur umə uba utsĩ Ukiristo, andanna awu usəka na anaa.

*Imar Uyesu Ukiristo*  
(Irh 2.1-7)

<sup>18</sup> Imar Uyesu Ukiristo iwe rimine. Uyanga Umaryamu awu ukarh Uyusuf. Umbə anasi ipfunumbə, nu umbə anyā unga awu ra anaa ru ubok Ipfu Isarsatangge.

<sup>19</sup> Ukarhnga Uyusuf arhiku uner asi ibeenga idzowe unga atsa ra asu anera, unga akaiferhkə iyiki ibəre unga ri iwək.

<sup>20</sup> Bər unga ana akaiferhkə akere ha na arheyirhə anyā ipfu itser Uteijee kapεeng ru unga ni igər unga igε, <<A Uyusuf ungwē Udauda, niba ugũo iwei iyei Umaryamu unga awu utsēngo, ubinkutsu anaa hā unga aka akō adzeki Ipfu Isarsatangge.

<sup>21</sup> Awuri imar ungwē nu ungo utare itsoknga igburh Uyesu, ubinkutsu unga awuri ifər anernga ra arhimmbə.>>

<sup>22</sup> Kishoo akere ha akorhe rimi ngge itsuifer ubinkpi Uteijee aka arherhe ra angwĩ uwuku usəm Arherhu-Num age,

<sup>23</sup> <<Unakugbĩrhĩ awuri ikō anaa na amar ungwē umbə ayisi itsoknga Uimmanuwerh,>> agbena agburh <<Unum awu nggu umen.>>\*

<sup>24</sup> Ivangye Uyusuf aka azir ru urhə, unga adəsa arherhe ha ipfu itser Uteijee iki irherhe na ayei Umaryamu unga awea utsēnga.

<sup>25</sup> Bər asi irhaa nggu unga utseku unga aka amar ungwēnga. Uyusuf atare itsoknga igburh Uyesu.

---

\* **1:23** Àka anyā ikei: Uish 7.14.

## 2

*Abika ahweng idzeer adzek  
udiki inyenum aba iyepa*

<sup>1</sup> Ivangye umbō aka amar Uyesu ru uteu Ubaitarhami ru Uyahudiya ri ivang Uhiridu aka awu uyerhe, abika ahweng idzeer adzeki igōkpee aba Urusharhima.

<sup>2</sup> Na arhusa age, <<Ungwē hā umbō aka amar awe rinεε uyerhe abi Uyahuda? Umen inyāmen idzernga ri igōkpee nu umen ība idzowe unga igōng.>>

<sup>3</sup> Ivangye Uyerhe Uhiridu aka agū rimi, amēnnga adake nu kishoo abi Urusharhima.

<sup>4</sup> Ivangye unga aka akōng kishoo ateiya abika adzowe idεm-Num nu abika amesuwe Ikpem, unga arhusa umbō anangkε umbō aka imar Ukiristo.

<sup>5</sup> Umbō agōr unga age, <<Ru uteu Ubaitarhami ru Uyahudiya. Ubinkpi uwuku usōm Arherhu-Num aka atseng,

<sup>6</sup> << Bōr ungo, Ubaitarhami ra abī Uyahuda, ungo usi iweō uwuku uci ri iteu Uyahuda.

Ubinkutsu awu ru ungo uyerhu uwōō aka idzeka,

uwuruwi aka idarh anermum Uisrairha.> >>\*

<sup>7</sup> Mōce Uhiridu aghōrhā ayisa abika ahweng idzeer ha arhusa abee ihweng ivangye umbō aka anyā idzeer ha.

<sup>8</sup> Mōce unga adene umbō azĩmbō Ubaitarhami agōr umbō age, <<Āka azĩ angwēdzēn na arhisuwa irheng ungwē hā. Ivangye umbi aka anyāmbi

---

\* **2:6** Āka anyā ikēi: Umik 5.2.

unga, umbi aba asoma umum nu umum igamum izĩ indzowe unga igong.>>

<sup>9</sup> Umbō aka agũ arherhe uyerhe amaa, umbō azĩmbō udĩmbō. Idzēer ha umbō aka anyā ri igōkpee ha izērhā ra asumbō, umbō adōsa ngge utseku ngge iki iba idēē ra anangke ungwē hā aka awe.

<sup>10</sup> Ivangye umbō aka anyā idzēer ha, umbō agom anggōm akarhār hā.

<sup>11</sup> Umbō aka atsĩ ri iya ha, umbō anyā irheng ungwē hā nggu uyanga Umaryamu, umbō atararhu ra anangnga adzowe unga igong. Mōce umbō agarha akpokambō adzowe izũwā uzinarhi nu atsei umbō iki iyisa ufirankisen nu umur.

<sup>12</sup> Umbō aka awu ri irheyirhō, Unum adēyika umbō niba ibvui azĩmbō ru Uhiridu. Umbō adōsu udĩ ukpō azĩmbō abĩmbō.

### *Atĩ azĩmbō Umasar*

<sup>13</sup> Umbō aka azĩmbō, Uyusuf arheyirhō anyā ipfu itser Uteijee iki igor unga igē, <<Usisok, ushupu irheng ungwē hā nu uyanga na atĩ azĩmbi abĩ Umasar. Āka aseĩ nggō ha utseku umum iki indēyiwa umbi. Uhiridu awuri ibeenga irheng ungwē hā na afere unga.>>

<sup>14</sup> Nggee unga asok ashupu irheng ungwē hā nu uyanga ru untsuuka akũ azĩā Umasar.

<sup>15</sup> Umbō aseĩ nggō ha utseku Uhiridu aka akpe. Akere ha akorhe rimi ngge itsuifer ubinkpi Uteijee aka arherhe ra angwĩ uner uwuku usom Arherhu-Num agē, <<Umun iyisu ungwēmum adzek ru Umasar.>>†

### *Afēyiwe awēkaci ru Uyahudiya*

---

† 2:15 Āka anyā ikei: Uho 11.1.

16 Ivangye Uhiridu aka ahweng uge abika ahweng idzeer ha arhem unga, unga agũ avom akarhârâ. Unga atsu umbô afeyiwe irheng awekatsa kishoo ru Ubaitarhami nu ikâwângge, udzur ra awekatsa abi imeka ivaa uba ra andzing. Unga akorha akere ha ubinkutsu udzur ri ivang hã abika ahweng idzeer ha aka asome unga imar ungwẽ hã iki iwe imeka ivaa.

17 Ivang hã niyô ngge iki itsuifer ubinkpi uner uwuku usom Arherhu-Num Uirimiya aka arherhe age,

18 <<Agũmbô urhem ru Urama,  
ididong nu ifakpe irheirhe,  
Urahirha unga adẽẽ iciu akpe angwẽnga,  
na akpẽẽ iyei idongamen ru unera,  
ubinkutsu aka ashembô.>>‡

### *Abvui azĩ Unazarat*

19 Uhiridu aka akpe, Uyusuf arheyirhó ru Umasar anyã ipfu itser Uteijee iki igor unga igẽ,

20 <<Usok ushupu irheng ungwẽ hã nu uyanga ukũ uzĩ abĩ Uisrairha. Abika abee ifer ungwẽ hã aka akpembô.>>

21 Nggee unga asok, ashupu ungwẽ nu uyanga akũ aziã abĩ Uisrairha.

22 Bór unga aka agũ uge Uarkirhayu ungwẽ Uhiridu aka anyangu ukam utenga awu uyerhe Uyahudiya, unga agũã iwei izĩ nggô ha. Bór unga aka arheyirhó umbô agbiite atonga, unga atsĩã ru Ugarhirhi.

---

‡ 2:18 Àka anyã iki: Uiri 31.15.

<sup>23</sup> Azĩ aseisa ru uteu ukpɔɔ umbɔ iki iyisa Unazarat. Ngge itsuifer ubinkpi abika asɔm Arherhu-Num aka arherhe agɛ, <<Awuri iyisa unga uner Unazarat.>>

### 3

*Isarhe Uyohana Uner Ubɔtisima  
(Umar 1.1-8; Irh 3.1-18; Uyoh 1.19-28)*

<sup>1</sup> Ivang hã niyɔ Uyohana Uner Ubɔtisima aka aba adzowe isarhe ra arhum Uyahudiya,

<sup>2</sup> anu igɔr agɛ, <<Àka adzipa, Iyerhe afã iki iyongge!>>

<sup>3</sup> Uner ha nuwɔ uwuku usɔm Arherhu-Num Uishaya aka arherhe ra arherhanga agɛ, <<Urhɛm uwɔɔ uyisa ra arhum ugɛ,

<Àka agbishuwe udĩ Uteijee, àka avii atsĩndĩã uku urhirhiki ru unga!> >>\*

<sup>4</sup> Atorho Uyohana awu igwar urhakumi, abow ikpɔm ubvur nu upfurhsĩnga. Ubinghanga uwu asusu nu utoo arhum.

<sup>5</sup> Mɔcɛ aner Urusharhima nu abi Uyahudiya kishoo nu abĩ akɔɔ ru ugber Azẽ Urdun adzeyi aba ru unga.

<sup>6</sup> Adẽẽ asɔm arhimmbɔ nu unga asorhuwe umbɔ ubɔtisima ra Azẽ Urdun.

<sup>7</sup> Bɔr unga aka anyã abi Ufarisi nu abi Usaduki arherhe aka aba ra anangke unga aka adẽẽ isorhu ubɔtisima, unga agɔr umbɔ agɛ, <<Umbi angwẽ ibvui! Ungaa adeyiwa umbi itĩ avɔm Unum aka iba unuma?

<sup>8</sup> Àka atõ itseryɛ iki ideyiwe idzidzipambi.

---

\* **3:3** Àka anyã ikɛi: Uish 40.3.

9 Àka aneke ikaiferhkɔ ra amɛnmɔi agɛ, <Uibrahim unga awu utɛmɛn.> Umum idɛyiwa umbi Unum awea ri ijee unga aka itsu atarh akɛrɛ ake awe awɛkaci ru Uibrahim.

10 Aka atsumbɔ anggāi ru unang acucii. Uɓɛn ucucii uku usi ighwɛrmgbɔ ikpūrḥā iyiki ize, awuri igbɛr umgbɔ atsu ru urha.

11 <<Umum ikorhuwa umbi ubɔtisima nggu amē utsar idzidzipambi. Bɔr uwuruwi aka ananga umum ijee nggawɔ awuri iba ru undzingmum, abadaknga umum isi ímēēmum ishípa. Unga awuri isorhuwa umbi ubɔtisima nggu Ípfu Isarsa-tangge nu urha.

12 Akpɔm nggu utaknga, awuri itɛki ishāa it-semnga na akarha ngge atsuku ungbanga na akpīwe uhweenga ru urhakpi uku usi írhimkpɔ.>>

### *Ubɔtisima Uyesu*

*(Umar 1.9-11; Írh 3.21-22)*

13 Mɔcɛ Uyesu aka adzeku Ugarhirhi aba ru Uyohana asorhuwe unga ubɔtisima ra Azē Urdun.

14 Uyohana abee ikɛn unga, agɔr agɛ, <<Umum ibee ungo usorhuwa umum ubɔtisima, ungo usok uba ru umum?>>

15 Bɔr Uyesu agɔr unga agɛ, <<Uneke ngge iwe rimi icɛɛ. Azea umɛn ikorhe ri iminɛ ngge itsuifer kishoo ubinkpi Unum aka abee.>> Mɔcɛ Uyohana abemuwe unga.

16 Umbɔ aka asorhuwe Uyesu ubɔtisima, unga adzeka ra amē. Kanying afā ayanga, unga anyā Ípfu-Num iki icipuwa ru nyaku unurhɛu, iba isei nu unga.

<sup>17</sup> Mɔcɛ urhɛm udzeka afã ugɔr uge, <<Uwɛrɛ unga awu Ungwɛmum ukpekũ iki ibema. Nggu unga umum igũiben akarhãrhã.>>

## 4

### *Undenggũ adeyi Uyesu (Umar 1.12-13; Irh 4.1-13)*

<sup>1</sup> Mɔcɛ Ipfu-Num idarh Uyesu izĩngge ra arhum ru Undenggũ adeya unga.

<sup>2</sup> Uyesu akpem igha ubin inuma isɔka inaa nu utsuu nu atenum. Unga aka amaa, imerh ifer unga.

<sup>3</sup> Mɔcɛ Undenggũ aba agɔr unga age, <<Ungo uba uwu Ungwɛ Unum, utsu atarh akɛrɛ awu uborodi.>>

<sup>4</sup> Uyesu agɔr unga age, <<Itsɛng Arherhu-Num igɔr igɛ, <Asi iwea ubingha ukpekũ itsu unera abɛk, bɔr ubɛn urhɛm arherhe uku udzeka ra angwĩ Unum.>\*>>

<sup>5</sup> Mɔcɛ Undenggũ ashupa unga azĩ adẽẽ afafã nu usarkasar uteu ni itsi uvi Iya-Num.

<sup>6</sup> Agɔr unga age, <<Ungo uba uwu Ungwɛ Unum, utersha ugba nu abĩ. Ubinkutsu itsɛng Arherhu-Num igɔrngge uge,

<< <Unga awuri itsu ípfu itsernga ngge ingwẽdzɛn ni ikaa ungo,

ngge iwuri ikpɔm ungo ra afafã ra abokngge, utsur ungo ukwɛrɔ undaidakngo nu utarh.>†>>

---

\* **4:4** Àka anyã ikɛi: Iva 8.3. † **4:6** Àka anyã ikɛi: Amb 91.11,12.

<sup>7</sup> Uyesu agər unga agε, <<Itsεng Arherhu-Num igərngge ikei uge, <Ungo niba ivirungo Uteijee Unumngo!>‡>>

<sup>8</sup> Undenggū ashupa unga ikei aden ni itsi igū iyɔɔ iderdetangge, adεyiwe unga iyerhe upfung nu igəngngge.

<sup>9</sup> Unga agər unga agε, <<Kishoo abina akεε umum iwuri idzaamum ungo, ungo uba utararhu nu udzaango umum igəng.>>

<sup>10</sup> Uyesu agər unga agε, <<Usəko ru umum, Ushaitan! Ubinkutsu itsεng Arherhu-Num igərngge uge, <Udzowe igəng ru Uteijee Unumngo, nu uwu ugārḥānga ukpekū.>§>>

<sup>11</sup> Məce Undenggū abəruka unga, nu ípfu itser-Num iba itōwe unga itser.

*Uyesu atirhi itsernga ru Ugarhirhi  
(Umar 1.14-15; Irh 4.14-15)*

<sup>12</sup> Uyesu aka agū uge umbɔ aka atsuke Uyohana ru ugborzī, unga abvui azīā Ugarhirhi.

<sup>13</sup> Abəruka Unazarat, azī asesa ru Ukafanahum, ukpurukpi uku uwe nggɔɔ ra angwī ukau ukugəng ra abī Uzeburhun nu Unaftarhi.

<sup>14</sup> Ngge itsuifer ubinkpi uner uwuku usəm Arherhu-Num Uishaya aka arherhe agε,

<sup>15</sup> <<Abī Uzeburhun nu abī Unaftarhi,  
aka awu utsīndī ukau ukugəng,  
ugar Azē Urdun,

Ugarhirhi aka awu atsen abi Uyahuda,

<sup>16</sup> umɔ abika aseī ru uzī  
aka anyāmbɔ nggaa irhirhang.

Nu abirabε aka aseī ra abī aki uzirhzī akpe,

---

‡ 4:7 Àka anyā ikei: Iva 6.16. § 4:10 Àka anyā ikei: Iva 6.13.

irhirhang iki irhangngge ru umbɔ.>>

<sup>17</sup> Udzur ri ivang hã Uyesu aka atirhi idzowe isarhe, agər agɛ, <<Àka adzipa, Iyerhe afã iki iyongge!>>

*Uyesu ayisu inera inaa abika adzui abɛrh*  
(Umar 1.16-20; Irh 5.1-11)

<sup>18</sup> Uyesu azêrhã nu ubang Ukau Ugarhirhi nukpi, unga anyã inera ivaa angwěyi, Usiman uwuruwi umbɔ aki iyisa Ubitru nu Uandarawu ungwěmbɔ. Anu itang igber ru ukau, ubinkutsu umbɔ awu abika adzui abɛrh.

<sup>19</sup> Uyesu agər umbɔ agɛ, <<Àka aba adɔsa umum, nu umum iwuri itsu umbi awu abika adzui anera.>>

<sup>20</sup> Ivanga unying umbɔ aneke igbermbɔ na adɔsa unga.

<sup>21</sup> Unga aka abɔre anang hã na azĩ anyã inera ivaa angwěyi ikɛi, Uyaku ungwě Uzabadi nu Uyohana ungwěmbɔ. Awu ru ukhukhɔɔ amě nggu utɛmbɔ Uzabadi, aděě igbishi ígbermbɔ. Uyesu ayisa umbɔ.

<sup>22</sup> Kanying umbɔ anakukumbɔ ukhukhɔɔ ha ru utɛmbɔ na adɔsa unga.

*Uyesu akerhuwe abi irhãrhã*  
(Irh 6.17-19)

<sup>23</sup> Uyesu azêrhã amaa Ugarhirhi, amesuwe ra abã ifɛn-Nummbɔ, adzowe Isarhe Iyiki Ize iyi Iyerhe Unum, na akerhuwe ubɛn irhãrhã nu ikpũ ighighong anera.

<sup>24</sup> Isarhe ri itsinga itêrhã imaangge abĩ Usuriya, anera akũ abika agũ ighighong akarhãrhã na ahwa ayetnum nggu ikpũ írhãrhã, nu abi ípfu iyiki

ibewe, nu abi irhārhi izurh, nu abika afər uzērhi  
adambə, unga akerhuwe umbə.

<sup>25</sup> Anera arherhe aka adzeku Ugarhirhi, nu iteu  
usəka umbə iki iyisa Udikaforhi, nu Urusharhima,  
nu Uyahudiya nu ugar Azē Urdun adəsa unga.

## 5

### *Idorh ni itsi igūa* (Irh 6.20-23)

<sup>1</sup> Ivangye Uyesu aka anyā ikikəng anera arherhe,  
unga afū aseī ni itsi igūa. Angwē imesanga aba ru  
unga.

<sup>2</sup> Unga atirha amesuwe umbə age,

<sup>3</sup> <<Idorh iwu iyi abirabe aka awe atsūwā ri ip-  
fumbə,

ubinkutsu Iyerhe afā iwu iyimbə

<sup>4</sup> Idorh iwu iyi abi ighongamen,  
ubinkutsu awuri idəngukumbə amenmbə.

<sup>5</sup> Idorh iwu iyi abika adəə,  
ubinkutsu ukam upfung  
uwuri iwe ukpumbə.

<sup>6</sup> Idorh iwu iyi abirabe aka agū imerh  
nu ugō irhirhika,  
ubinkutsu umbə awuri ishurbə.

<sup>7</sup> Idorh iwu iyi abika acucorhe,  
ubinkutsu awuri icorhukumbə umbə.

<sup>8</sup> Idorh iwu iyi abi amen aka aten,  
ubinkutsu umbə awuri inyāmbə Unum.

<sup>9</sup> Idorh iwu iyi abika atsu ididəə,  
ubinkutsu awuri iyisa umbə angwē Unum.

<sup>10</sup> Idorh iwu iyi abika ahwa uver ri irhirhika,  
ubinkutsu Iyerhe afā iwu iyimbə.

11 <<Idorh iwu iyimbi ivang anera iki irhena umbi, ayom umbi, na arherhuwa umbi ikpũ iki ibewe ri itsimum.

12 Àka agom akarhãrhã, ubinkutsu umbi awuri ikpo itosa irhẽirhẽ ra afã, ubinkutsu rimi hã umbõ aka ayom abika asom Arherhu-Num abi inggbaashia.

*Angwã nu irhirhang*  
(Umar 9.50; Irh 14.34-35)

13 <<Umbi awu angwã abĩã. Bõr angwã aba ashike nu itonga ake, awuri ikorha aguse na atsu ake awe angwã ikẽi? Awuri ishike ru ugarh, awuri ititare ake na anera azẽrhã nu ake.

14 <<Umbi awu irhirhang upfung. Uteukpi uku udzin nu igũ asi idẽẽ awõmbõ ukpõ.

15 Unera asi itsu irhirhang na awõka ngge ri ikikĩ. Nu ngge iki iwe rimi, awuri idene ngge idẽẽ ra anang idẽẽngge nu ngge irhange uben unera ri iya.

16 Rimi hã, àka aneke irhirhangmbi irhang ra anera, ngge itsu umbõ anyã itser iyiki izembi na akpoi Utẽmbi uwu afã.

*Itsuiƿer iyi Ikpem*

17 <<Niba akaimbi iferhkõ uge umum ĩba ififõrhuwe Íkpem Umusa use itseng abika asom Arherhu-Num. Umum isi ĩbamum ififõrhuwe ngge, bõr umum ĩba itsu ngge itsuiƿer.

18 Umum indɛyiwa umbi idzidzɛrhe, utɛku afã nu abĩ awuri imaa, uko ishia ra arherhe Íkpem Umusa isi ĩfõrhũngge utɛku umbõ aki itsu abina kishoo atsuaƿer.

<sup>19</sup> Uwuruwi aka azharhuwe ungwērhi ishia unying ri Ikpem na amesuwe anera akorha ngge, awuri iyisa unga uku ucia ri Iyerhe afã, b̄or uwuruwi aka ad̄osa ngge na amesuwe ngge, awuri iyisa unga nggaa uner ri Iyerha afã.

<sup>20</sup> Umum id̄eyiwa umbi uḡe irhirhikambi iba isi inangngge iyi abika amesuwe Ikpem nu abi Ufarisi, umbi asi itsĩmbi ri Iyerhe afã.

*Imesa ri itsi av̄om*  
(Irh 12.57-59)

<sup>21</sup> <<Umbi aka agũmbi umb̄o aka ad̄eyiwe atokamen isha aḡe, <Àka niba afermbi unera,\* nu uwuruwi aka afer uner awuri itsu uvau nu unga.>

<sup>22</sup> B̄or umum id̄eyiwa umbi uwuruwi aka agũ av̄om nggu und̄okanga awuri itsu uvau nu unga. Ikei uwuruwi aka ayisu und̄okanga aḡe, <Ib̄em,> umb̄o awuri ikũna unga azĩ ra anang aka atsu uvau. B̄or uwuruwi aka aḡor und̄okanga aḡe, <Ugugge!> unga awuri itsĩ ri igbaigba idzũũ urha.

<sup>23</sup> <<Nggee, ungo uba ud̄ẽẽngo idzowe izũwã nu uyitta uḡe uw̄o awu ra av̄om nggu ungo,

<sup>24</sup> uneke izũwã hã ra asu ubeu ha kata. Ugbaashia uzĩ umbi agbisha nggu uner ha. M̄oc̄e nu uba adzowe izũwãngo.

<sup>25</sup> <<Unera aba atsuka arherhe ri itsingo ru udzēpurhe uku uvarha arherhe, àka agbisha nu utsĩndĩ ifetem, iba ishingge rimi unga awuri igbopuwe ungo nggu uwuku atsu uvau, uwuku utsu uvau atsuke ungo ra abok ambow umb̄o agbange ungo ru ugborzĩ.

---

\* **5:21** Àka anyã ikei: Idzi 5.21.

<sup>26</sup> Umum idɛyiwa ungo idzidzɛrhe, ungo usi idzekɔ umɔ utsekɔ ungo iki ifai umaa ukobo ha umbɔ aka atsu ungo ififai.

*Imesa ri itsi arhim itoma-dak*

<sup>27</sup> <<Umbi aka agũmbi umbɔ aka agɔr agɛ, <Niba utomungo-dak.>†

<sup>28</sup> Bɔr umum idɛyiwa umbi ugɛ ubɛn unera aba arhisa ukutɛrh irhi anyɔna, unga aka atomunga-dak nggu utɛrh ha ra amɛnnga.

<sup>29</sup> Usungo ukpu ubok ugha uba uwuri itsuka ungo ra arhim, uhor ukpɔ utare. Ugba ungo ushiɔ ru ugau ukpɔ ukpu iyorngo nu umbɔ aka itare iyorngo kishoo ri idzũũ urha.

<sup>30</sup> Ubok ughango uba itsukakpɔ arhim ru ungo, uzharha ukpɔ utare. Ugba ungo ushiɔ ru ugau ukpɔ ri iyorngo nu iyorngo kishoo iki itsĩ ri idzũũ urha.

*Izharhuwe itɛrh*

*(Umat 19.9; Umar 10.11-12; Irh 16.18)*

<sup>31</sup> <<Aka agɔrmbɔ ugɛ, <Uwuruwi aka itsũwe utsɛnga, awu ufang unga adzowe ubvur izharhuwe itɛrh.>‡

<sup>32</sup> Bɔr umum idɛyiwa umbi ugɛ ubɛn unera aka atsũwe utsɛnga ri ida iwe ru uvau itoma-dak, at-suke unga ru utsĩndĩ itoma-dak. Nu uwuruwi aka apfunu utɛrh uwuku uwuwayi ha, uner ha atoma-dak.

*Uyirh*

<sup>33</sup> <<Ikɛi umbi aka agũmbi umbɔ aka adɛyiwe atokamɛn agɛ, <Àka niba azharhukumbi uyirh, bɔr

---

† 5:27 Àka anyã ikɛi: Idzi 20.14.    ‡ 5:31 Àka anyã ikɛi: Iva 24.1.

imēēngge ungo utsufər ubinkpi ungo uku uyirhe Uteijee.>

<sup>34</sup> Bər umum idēyiwa umbi ugε niba ayirhmbi uyirh. Niba ayirhmbi nggu afā, ubinkutsu afā awu anang isei Unum.

<sup>35</sup> Niba ayirhmbi nggu upfung, ubinkutsu awu ubin uku utsorhe andaidaknga, use nggu Urusharhima, ubinkutsu awu uteu Uyεrhe Ukugəng.

<sup>36</sup> Niba uyirhə nggu itsingo, ubinkutsu ungo usi idēē utsu igwar unying iwengge iki iterha use iki ifirhā.

<sup>37</sup> Imēēngge umbi agər agε <ĩĩ> use <ĩĩ>. Uben ubinkpi uku utəngkpə rimi idzeku uwuku ubewe ha.

### *Ififai*

*(Irh 6.29-30)*

<sup>38</sup> <<Umbi aka agūmbi umbə aka agər agε, <Unera aba atsūwūka usungo, umbə atsūwe usu ukpunga, nu unera aba atsūwūka unyĩingo, umbə atsūwe unyĩ ukpunga.>§

<sup>39</sup> Bər umum idēyiwa umbi ugε niba afaimbi iyiki ibewe nggu iyiki ibewe. Unera aba akwεra ungo nu utam ubok ugha, udzipuwe utam ukpu uvaa ikεi.

<sup>40</sup> Unera aba atsuka arherhango ra anang aka atsu uvau na abeenga ivur atorhango, udzowe nggu atorho akagənga ikεi.

<sup>41</sup> Unera aba atsu ungo uzērħūngo ru ukirhomita unying, uzĩ nggu unga akirhomita avaa.

---

§ 5:38 Āka anyā ikεi: Idzi 21.24; Urha 24.20; Iva 19.21.

<sup>42</sup> Udzowe uwuruwi aka aba ibibee ru ungo, niba udzipukɔ undzing nu uwuruwi aka abee ikɔw ru ungo.

*Àka abema anggamtsakmbi*  
(Irh 6.27-28,32-36)

<sup>43</sup> <<Umbi aka agũmbi umbɔ aka agɔr agɛ, <Ubemu undɔkango nu ukpɛɔ uwuku ukpɛ ungo.>\*

<sup>44</sup> Bɔr umum idɛyiwa umbi ugɛ, àka abemu uwuku ukpɛ umbi na afɛne-Num ru abika adzaa umbi uver.

<sup>45</sup> Rimi hã umbi awuri iwe ru nyaka angwɛ idzidzɛrhe abi Utɛmbi ra afã. Unga atsu unum urhang ra abika aze nu abika abewe, na atsu inai idoi ra abika arhurhika nu abirabɛ aka asi irhikumbɔ.

<sup>46</sup> Umbi aba abema abirabɛ aka abema umbi ukpekũ, umbi awuri ikpo ikpũ ugbɛtu ukusong? Use abika ayɛi ikirbi abĩ asi ikorhumbɔ rimi?

<sup>47</sup> Umbi aba akpurha aghwe anermbi, umbi akorhu use anang abɔɔ? Abi uzĩ asi ikorhumbɔ rimi hã?

<sup>48</sup> Àka awe andzumunga ri irhirhika, ru nyaku Utɛmbi uwu afã aka awu undzumunga ri irhirhika.

## 6

*Adzowe izũwã*

<sup>1</sup> <<Àka angwɛdzɛn utsur itser iyi irhirhikambi iwengge iyi anera aka inyã. Umbi aba akorhe rimi, umbi asi ikpombi itosa ru Utɛmbi uwu afã.

---

\* **5:43** Àka anyã ikei: Idzi 19.18.

<sup>2</sup> <<Ngge itsu ivangyε ungo uku uwuri idzowe abika abubee, niba urherhungo ake ra awiya, ru nyaka abi ukpukpeta aki ikorhe ra abā ifen-Num nu atsīndī ngge itsú anera akpoi umbō. Umum indēyiwa umbi idzidzerhe, umbō aka ayei itosambō niyō.

<sup>3</sup> Bōr ivangyε ungo uku iyike uner uwuku ububee, niba uneke uner uwōō ahwēnga ubinkpi ungo uku ikorhe.

<sup>4</sup> Ngge itsu izūwā ungo ima iwe ri iwōk. Mōce Utengo, uwuku unyā ri iwōk, ama adzaa itosango.

### *Ifen-Num*

*(Irh 11.2-4)*

<sup>5</sup> <<Ivang ifen-Nummbi, àka niba awembi ru nyaka abi ukpukpeta, umbō abemi idēē na afen-Num ra abā ifen-Num nu atsīndī ru anera anyā umbō. Umum indēyiwa umbi idzidzerhe, umbō aka ayeimbō undzumu itosambō.

<sup>6</sup> Bōr ivangyε ungo iki ifen-Num, utsī ru ubāngo nu ufōme angwī ubāā, ufenu Utengo uwuku uwe ri iwōk. Utengo uwuku unyā ri iwōk awuri idzidzaanga itosango.

<sup>7</sup> Ivangyε umbi aka ifen-Num, àka niba adarhumbi ider arherhe ru nyaka abirabε aka asi ihwengmbō Unum. Umbō akaiferhkō ugε arherhe urherhe uwuri itsu umbō agū.

<sup>8</sup> Niba awembi ru nyaka umbō. Utembi ahwēnga ubinkpi umbi aka abee nu umbi adōrha afēna unga.

<sup>9</sup> <<Àka afen-Num rimine,  
<< <A Utemen ra afā,  
atsam itsokngo isarsatake.

- <sup>10</sup> Iyerhango iba,  
ubinkpi ungo uku ubee umbɔ akorhe  
ru upfung ru nyaka umbɔ iki ikorhe ra afã.
- <sup>11</sup> Uma udzaa ubinghamen ukpu irherɛ.
- <sup>12</sup> Uma utsūwe arhimmɛn,  
ru nyaka umɛn iki isaki itsūwe abika ashong  
umɛn.
- <sup>13</sup> Niba udarh umɛn uzĩɔ ru undeya,  
bɔr ufɔrh umɛn ri iyiki ibewe.>
- <sup>14</sup> Umbi aba atsūwūkumbi anera aka ashong umbi,  
Utɛmbi uwu afã awuri itsūwānga umbi.
- <sup>15</sup> Bɔr umbi aba asi itsūwūkumbi anera aka ashong  
umbi, rimi hã Utɛmbi asi ítsūwūka arhimmbi.

### *Ikpem ighabin*

<sup>16</sup> <<Ivangyɛ umbi aka ikpem ighabin, niba  
asherhumbi unyẽẽmbi ru nyaka abi ukpukpeta  
aki ikorhe, umbɔ aka isaka asherhu unyẽẽmbɔ ra  
anera anyã umbɔ aka akpem ighabin. Umum  
indɛyiwa umbi idzidzɛrhe, umbɔ aka ayeimbɔ  
undzumu itosambɔ.

<sup>17</sup> Bɔr ivangyɛ ungo uku ukpemĩ ighabin, usorh  
asungo nu ukpai itsingo nu udzuka atsei,

<sup>18</sup> utsur anera ahwɛngmbɔ ungo uku ukpem  
ighabin, bɔr Utɛngo ukpekũ, aka awu ri iwɔk. Nu  
unga, Utɛngo aka anyã ri iwɔk, awuri idzidzaanga  
itosango.

### *Iwe ru ubin ra afã* (Irh 12.33-34)

<sup>19</sup> <<Niba akɔng abin angwẽmbi ru upfung,  
anangkɛ adzurh nu ivivĩĩ iki idakuwe ake, nu  
avɛu aki itsĩ avɛu ivɛu.

20 B̄r àka atsu am̄nmbi ri ikpo uḡbeta ra afã, anangke adzurh nggu ivivõõ asi ídakuke ake, anangke aveu asi ítsĩ aveumbõ.

21 Ubinkutsu, anangke abinmbi aka awe, umõ am̄nmbi aka iwe ik̄ei.

*Irhirhang iyor*  
(Irh 11.34-36)

22 <<Asu ake awu irhirhang iyor. Asungo aba akerke, iyorngo kishoo iwuri it̄ok nggu irhirhang.

23 B̄r asungo aba asi ikerke, iyorngo kishoo iwuri iwe ru uzĩ. Uba irhirhang ru ungo iwu uzĩ, nggaa uzĩ hã uwu uguse!

24 <<Unera asi ídẽẽ at̄wũka itser ra ateiya avaa. Unga awuri ibema unying na akp̄ẽẽ uw̄arõ, unga awuri idzowe itsinga ru unying na akp̄ẽẽ uw̄arõ. Ungo usi ídẽẽ udzowukõ itsingo ru Unum nu uhwek.

*Niba agũmbi ighong*  
(Irh 12.23-31)

25 <<Nggee umum ideyiwa umbi, niba agũmbi ighong ru ibibekmbi nu ubinkpi umbi aka igha, use ubinkpi umbi aka ihwa, use atorhake umbi aka itsim nu ayormbi. Urhe usi inangmgbõ ub- ingha? Iyor isi inangge atorho?

26 Àka anyã anunu afã. Asi idoike asi igberke asi ik̄ong atsuke ra angban. B̄r Ut̄embi uwu afã unga adzowe ighigha ake. Umbi asi iwu ru ugarh anangmbi ake?

27 Ungamõ ru umbi igũ ighongnga idẽẽ ito- mungge ivanga unying ri inumye unga aka ibek?

<sup>28</sup> <<Awu use utsu umbi agũ ighong atorho? Àka arhi ífur arhum iki iseng. Isi itõngge itser use inuw abin.

<sup>29</sup> Bør umum idɛyiwa umbi, uyɛrhe Usorhomon ri igɔngnga kishoo unga anasi igbɛra idzam ru nyaki ifur unying.

<sup>30</sup> Unum aba agbɛruka idzam nu ubĩ arhum rimi, uku uwe irherɛ nu udã umbɔ akpĩwe ru urha, asi igbɛranga umbi idzam, umbi abi imang-mang iyiki ici?

<sup>31</sup> Nggee niba agũmbi ighong agɛ, <Umɛn igha usee?> use <Umɛn ihwa usee?> use <Umɛn itsim usee?>

<sup>32</sup> Abi uzĩ abee ikpũ abin akɛɛ ha. Rimi hã Utɛmbi uwu afã ahwɛnga umbi abeembi abin hã.

<sup>33</sup> Bør àka agbaashia abee Iyɛrhe Unum nu irhirhikanga, nu abin hã kishoo awuri idzaambɔ umbi ikɛi.

<sup>34</sup> Nggee niba agũmbi ighong iyi udã, ubinkutsu udã uwu nggu ayetnumkpɔ. Ubɛn unuma ayetnum amɛɛke nggu ukpɔ.

## 7

### *Uneke itsu uvau ra anera (Irh 6.37-38,41-42)*

<sup>1</sup> <<Àka aneke itsu uvau ra anera, utsur umbɔ atsukambɔ umbi uvau.

<sup>2</sup> Ikpũ uvauwi umbi aki itsuke anera, ikpũ iyi ha umbɔ aka itsuka umbi. Ugbiuwi umbi aka akũ amei, awuri ikũ umgbɔ ha amei adzaa umbi.

<sup>3</sup> <<Awu use utsu ungo urhi umbumbin ru usu undakango nu usi inyãũ ungbũngkũ uku uwe ru usungo?

<sup>4</sup> Ungo ukorhu uguse nu ugər undəkango uge, <Uneke umum itsũwã umbumbin ru usungo,> ng-gaye ungbũngkũwi uwu ru usu ukpungo?

<sup>5</sup> Ungo uner ukpukpeta, utirhu utsũwe ungbũngkũ ru usungo, məcə nu urhi utai nu utsũwe umbumbin ru usu undəkango.

<sup>6</sup> <<Àka niba adzowukumbi íjui abin aka asar. Niba atarkumbi abinarhə aki imang ra arhede. Ake awuri ijang adak na adzipa anayiwa umbi.

*Arhusa, abee, akwər angwĩ ubã*  
(Irh 11.9-13)

<sup>7</sup> <<Àka afəna awuri idzaambə umbi. Àka abee umbi awuri ikpikpombi. Àka akwər angwĩ ubã awuri itsuruwambə umbi.

<sup>8</sup> Uben unerwi aka afəna awuri iyēisa, unga uwuku ububee awuri ikpoa, nu unga uwuku ukwər angwĩ ubã awuri itsurukumbə unga.

<sup>9</sup> <<Awu ungamə ru umbi, ungwēnga aba arhusa uborodi, unga awuri idzowe unga utarh?

<sup>10</sup> Use unga aba arhusu ubərɸ, unga awuri idzowe unga ibvui?

<sup>11</sup> Umbi abi amən aka abewe aba ahwəngmbi idzowe angwēmbi abin aka aze, iwuri iwe iguse Utəmbi ra afã aka idzowe abin aka aze ra abirabə aka ifəna unga!

<sup>12</sup> Nggee uben ubinkpi umbi aka abee anera akorhuwa umbi, àka akorhuwe umbə rimi hã. Akεε kishoo ake awu Íkpem Umusa nu abika asəm Arherhu-Num.

*Angwĩ akika apare nu akika atei*  
(Irh 11.9-13)

<sup>13</sup> <<Àka atsĩ ra angwĩ ubã aka apare. Ubinkutsu anera arherhe abika atsĩ ra angwĩ aka atei nu utsĩndĩ uwuku uzĩ itsitsĩm, utei.

<sup>14</sup> Bør angwĩ ubã akika apare nu utsĩndĩ uwuku uzĩ ibibek ughong uzārḥā. Abika adōsa umgbō asi irḥembō.

*Ucucii nu ikpūrhāngge*  
(Irh 6.43-44)

<sup>15</sup> <<Àka angwēdzēn nggu abika asōm Arherhu-Num igberangwĩ. Umbi awuri inyā umbō ru nyaki idoi, bør idzidzerhe umbō awu íjui ngbako iyē imerh iki ifer akarḥārḥā.

<sup>16</sup> Umbi awuri ihweng umbō ri ikpū itsermbō. Awuri idēē akōrmmbō ikpūrhā inebi ru ucucii ididək, use awuri ikpombō uvorhvo ri ididək?

<sup>17</sup> Rimi ḥā uben ucucii uwuku uze uku usaku ughwer ikpūrhā iyiki ize, bør ucucii uku ubewe uku usaku ughwer ikpūrhā iyiki ibewe.

<sup>18</sup> Ucucii uwuku uze usi idēē ughwermgbō ikpūrhā iyiki ibewe, rimi ḥā ucucii uwuku ubewe usi idēē ughwermgbō ikpūrhā iyiki ize.

<sup>19</sup> Uben ucucii uku usi íghwermgbō ikpūrhā iyiki ize, umbō awuri igber atsuku urḥa.

<sup>20</sup> Nggee, awu ikpūrhāke awuri itsu umbi ahweng ake.

*Umun isi ihweng umbi*  
(Irh 13.25-27)

<sup>21</sup> <<Asi iwea uben unera aka igor umum agē, <A Uteijee, a Uteijee,> awuri itsĩ ri Iyerhe afā, bør awu uwuruwi ukpekũ aka akorhu ubinkpi Utemum uwuku uwu ra afā aka abee.

<sup>22</sup> Ru unum hã anera arherhe awuri igor umum age, <A Uteijee, a Uteijee! Umen isi isammen Arherhu-Num ri itsokngo, nu ri itsokngo umen iki iwayiwe ipfu iyiki ibewe ri ikorha abin idzeu arherhe?>

<sup>23</sup> Moe umum iki igor umbɔ uge, <Umun isi ihweng umbi. Àka asombi ru umum, umbi abika akorhe iki ibewe.>

*Uner idzin itsoi nu ugue uner idzin  
(Irh 6.47-49)*

<sup>24</sup> <<Nggee uwuku ugũ arherhamum na atõ itser nggu ake, unga awu ru nyaku uner itsoi uwuruwi aka adzin iyanga ni ifa.

<sup>25</sup> Moe inai idoi, amẽ adzek, ugba uso ukwer iya ha. Ike isi igbake ubinkutsu, adzin ike ni ifa.

<sup>26</sup> Bɔr uwuku ugũ arherhamum na akpẽ itõ itser nggu ake, unga awu ru nyaku ugugge uwuruwi aka adzin iyanga nu uzuzeu.

<sup>27</sup> Inai idoi, amẽ adzek, ugba uso ukwer iya ha, igbigba ike ibewungge.>>

<sup>28</sup> Ivangye Uyesu aka amaa irherhe abin akere, ikikanga idzedzeu imesanga,

<sup>29</sup> ubinkutsu unga amesuwe umbɔ ru nyaku unerwi aka awe ru ijee, asi iwea ru nyaka abika amesuwe Ikpemmbɔ.

## 8

*Uner ingbim  
(Umar 1.40-45; Irh 5.12-16)*

<sup>1</sup> Ivangye Uyesu aka acipuwa ri igũ hã, anera arherhe aka adɔsa unga.

<sup>2</sup> Uner ingbim uwɔɔ aba atararhu ra anangnga na agɔr agɛ, <<A uteiya, ungo uba ubemungo, ungo udɛɛ usarango umum.>>

<sup>3</sup> Uyesu aberu uboknga abanga unga na agɛ, <<Uмум ĩbeemum, usar!>> Kanying ingbimnga ikerhungge.

<sup>4</sup> Mɔcɛ Uyesu agɔr unga agɛ, <<Niba udɛyikɔ unera. Bɔr uzĩ, udɛyiwe itsingo ru uwuku udzowe idɛm-Num, nu udzowe izũwã ru nyaki Íkpem Umusa iki itsu. Ngge iwe ideka ru umbɔ ugɛ ungo uku ukerhungo.>>

*Imangmang unggbaashi  
abi iwa Uroma  
(Irh 7.1-10; Uyoh 4.43-54)*

<sup>5</sup> Ivangyɛ Uyesu aka atsĩ ru Ukafanahum, uteiya abi iwa Uroma uwɔɔ aba ashôrĥũ Uyesu ama ayike unga.

<sup>6</sup> Agɛ, <<A uteiya, ugârhâmum ashai iyor awe ri iya, anu igũ ighong akarhârĥã.>>

<sup>7</sup> Uyesu agɔr unga agɛ, <<Uмум iwuri iba ikerhukũ unga.>>

<sup>8</sup> Unggbaashi abi iwa Uroma ha agɔr agɛ, <<A uteiya, umum isi imɛɛmum ungo iki iba ri iya-mum. Bɔr urherhu urĥem ukpekũ, ugârhâmum ĥã awuri ikerhunga.

<sup>9</sup> Umum iwe ru ubok ijee, abi iwa abɔɔ awu ru ubokmum. Igɔr uwɛɛ inggɛ, <Uzĩ,> unga azĩã, nu uwɔɔ inggɛ, <Uba,> unga abanga. Umum iba igɔr ugârhâmum inggɛ, <Ukorhe rimine,> unga akorhe.>>

<sup>10</sup> Ivangyɛ Uyesu aka agũ rimi, unga adzei-dzeu na agɔr abika adɔsa unga agɛ, <<Uмум

indɛyiwa umbi idzidzɛrhe, ru Uisrairha kishoo umum inasi ikpomum uwuku uwe ru imangmang ikerketangge ru nyaki iyɛɛ ha.

<sup>11</sup> Umum igɔr umbi ugɛ anera arhɛrhe awuri idzeki igɔkpee nu udiku urhɛɛ, aba aseɪ nggu Uibrahim, Uishaku nu Uyakubu agha irhowa ri Iyɛrhe afã.

<sup>12</sup> Bɔr awuri itare irhɛ abi Uisrairha ra awiya ru uzĩ, anangkɛ umbɔ aka iciu akpe nggu itãĩ anyĩ.>>

<sup>13</sup> Mɔcɛ Uyesu agɔr uteiya abi iwa Uroma hã agɛ, <<Uzĩ! Iwuri ikorhungge ru nyaka ungo uku uwe ru imangmango.>> Kanying ugãrhãnga akerhunga ri ivang hã.

*Uyesu akerhuwe anera arhɛrhe  
(Umar 1.29-31; Irh 4.38-39)*

<sup>14</sup> Ivangyɛ Uyesu aka atsĩ ri iya Ubitru, unga anyã uya utsɛrha Ubitru anu nu ukoma iyora imani.

<sup>15</sup> Unga abangu uboknga imani iyor ha in-ekungge unga. Uya ha asok akorhuwe unga ubingha.

<sup>16</sup> Urhɛɛ uku uwe, umbɔ akũ anera arhɛrhe abika awe ru ípfu iyiki ibewe aba ru unga. Unga akũ irhɛm awayiwe ngge na akerhuwe abi irhãrhã kishoo.

<sup>17</sup> Akorha akɛɛ ngge itsuifer ubinkpi umbɔ aka arherhe ra angwĩ uner uwuku usɔm Arherhu-Num Uishaya agɛ,

<<Unga nyanguwe irhãrhãmɛn,  
unga akerhuwe ighongamɛn.>>\*

---

\* **8:17** Àka anyã ikei: Uish 53.4.

*Ayetnum akika adasu Uyesu*  
(*Irh 9.57-62*)

<sup>18</sup> Ivangye Uyesu aka anyã nggaa ikikong anera iki idzipa unga, unga atsu umbə agar ukau ha azĩ ugar ukpəɾə.

<sup>19</sup> Məce uner uwuku umesuwe Ikpem aba agər unga age, <<A umarhem, umum idasa ungo izĩ uben anang ungo iki izĩ.>>

<sup>20</sup> Uyesu adzipa agər unga age, <<Íjui ngbako iyiki ici iwengge ri ingwĩngge, anunu ikɛi aweke ra ashiyake, bər Ungwẽ-Ner ashia ra anangke unga aka itsu itsinga.>>

<sup>21</sup> Ungwẽ imesa uwəə agər unga age, <<A uteiya, uneka umum inggbaashia izĩ idzake utemum.>>

<sup>22</sup> Bər Uyesu agər unga age, <<Udasa umum, uneke abika akpe adzake abika akpembə.>>

*Uyesu adəte ugba inai*  
(*Umar 4.35-41; Irh 8.22-25*)

<sup>23</sup> Məce unga atsĩ ukhukhəə amẽ, angwẽ imesanga adasa unga.

<sup>24</sup> Kanying ugba ukerketakpə usoyi ru ukau amẽ hã, amẽ asoyi atsĩrhã ru ukhukhəə ha. Bər Uyesu awu ru urhə.

<sup>25</sup> Angwẽ imesa azĩ azita unga, agər age, <<A uteiya, ufərha umen! Umen iki iwuri itsĩmmen!>>

<sup>26</sup> Unga agər umbə age, <<Umbi abi imangmang iyiki ici, awu use utsu umbi agũ iwei rimi?>> Məce unga asok atserhu ugba nu ubvun ukau ha. Ukpə kishoo udəər uku utata.

<sup>27</sup> Anera adzeidzeu na arhusa age, <<Awu ikpũ uner uwukusong nuwi? Ugba nu ubvun ukau ikɛi agũna unga!>>

*Ikikerhuwe inera ivaa  
abi ipfu iyiki ibewe*

<sup>28</sup> Ivangye unga aka atsi ugar ukpɔrɔ ra abi abi Ugadara, inera ivaa abi ipfu iyiki ibewe aka adzek ra anang adzak anera agbopa unga. Umbɔ awu ubin iwei akarhãrhã, ngge itsu anera asi idẽẽ adɔsumbɔ utsĩndĩ hã.

<sup>29</sup> Umbɔ atsu ivum age, <<A Ungwẽ Unum, ungo uba itser use ru umɛn? Ungo uba idzaa umɛn uver ri ivanga idɔrhi iwe?>>

<sup>30</sup> Ukhapa ru umbɔ, ukpui arhede arherhe udẽẽ ughãwã.

<sup>31</sup> Ípfu iyiki ibewa ha ishɔrhũ Uyesu igɛ, <<Ungo uba uwayikɔ umɛn, utsu umɛn itsĩ ru ukpui arhede ukpɔrɔ.>>

<sup>32</sup> Mɔcɛ unga agɔr ngge age, <<Àka azĩ!>> Ngge idze izĩ ru ukpui arhede ha, ake asok atĩ acipa nu ughoghor abang ukau ha agba atsi ra amẽ akpeke.

<sup>33</sup> Abi ughãwã arhede ha atĩ atsi ru utepa adzowe isarhe ha kishoo, nu ubinkpi uku ukorhe ra abi ipfu iyiki ibewa ha.

<sup>34</sup> Mɔcɛ kishoo anera ru utepa adzek agbangu Uyesu. Ivangye umbɔ aka anyã unga, umbɔ ashɔrhã unga ama asoka ra abĩmbɔ.

## 9

*Uyesu akerhuwe uner ushayi iyor  
(Umar 2.1-12; Irh 5.17-26)*

<sup>1</sup> Uyesu atsi ukhukhɔ amẽ, agar azĩ uteunga.

<sup>2</sup> Aner abɔɔ akũ uner ishaya iyor aba ru unga, anu nu ufar. Ivangye Uyesu aka anyã imang-mangmbɔ, unga agɔr ushayi iyor ha age, <<Niba

ugũo ighong ungwẽ ha, umbɔ aka atsũwãmbɔ arhimngo.>>

<sup>3</sup> Mɔcɛ abɔɔ abika amesuwe Ikpem agɔr adɔkambɔ agɛ, <<Utsak uwurɛ arhenu Unum!>>

<sup>4</sup> Bɔr Uyesu ahwɛnga ubinkpi umbɔ aka akaiferhkɔ, unga agɛ, <<Awu use utsu umbi akaiferhkɔ iyiki ibewe ra amɛnm̃bi rimi?

<sup>5</sup> Akasong asi ighongke irherhe, igɔr ugɛ, <Umbɔ aka atsũwãmbɔ arhimngo,> use igɔr ugɛ, <Usisok uzẽrhã?>

<sup>6</sup> Bɔr umum ibee umbi ahwɛng ugɛ Ungwẽ-Ner awea ri ijee iyiki itsũwe arhim ru upfung.>> Mɔcɛ unga agɔr ushayi iyor ha agɛ, <<Usisok ufetu ufarngo uzĩ ri iya.>>

<sup>7</sup> Nu utsa ha asok azĩã ri iyanga.

<sup>8</sup> Ivangyɛ ikikɔng anera iki inyã rimi iwei ifɛr umbɔ. Umbɔ akpoi Unum, aka adzowe anera ikpũ ijee ha.

*Uyesu ayisu Umatiyu*  
(Umar 2.13-17; Irh 5.27-32)

<sup>9</sup> Uyesu awu ru azẽrhã na anyã utsawɔɔ agburh Umatiyu aseɪ ra anang aka ayɛi ikirbi abĩ. Uyesu agɔr unga agɛ, <<Udɔsa umum.>> Mɔcɛ Umatiyu asok adɔsa unga.

<sup>10</sup> Uyesu aseɪ ighabin ri iya Umatiyu, abika ayɛi ikirbi abĩ nu abirabɛ umbɔ aka anyanga umbɔ awu abi arhim arherhɛ, aba agha nggu unga nu angwẽ imesanga.

<sup>11</sup> Ivangyɛ abi Ufarisi aka anyã rimi, umbɔ arhusa angwẽ imesanga agɛ, <<Awu use utsu umarhemmbi aseɪ igha ubingha nggu abika ayɛi ikirbi abĩ nu abi arhim?>>

<sup>12</sup> Ivangye Uyesu aka agũ rimi, unga age, <<Abika aker asi ibeembɔ uner agɔu, bɔr abi irhãrhã abee.

<sup>13</sup> Àka azĩ amesa agben itseng Arherhu-Num akirake aka agɔr uge, <Umum ibee umbi awe ra atorh, isi ãbeemum idem-Num.>\* Umum isi ãbamum iyisa abika akaiferhkɔ uge umbɔ arhika, umum ãba iyisa abirabe aka ahweng uge umbɔ awu abi arhim.>>

*Arhusa arherhe ikpem ighabin*

*(Umar 2.18-22; Irh 5.33-39)*

<sup>14</sup> Mɔce angwẽ imesa Uyohana aba arhusa unga, age, <<Umen nggu abi Ufarisi ikpemmen ighabin, bɔr awu use utsu angwẽ imesango asi ikpemmbɔ? >>

<sup>15</sup> Mɔce Uyesu agɔr umbɔ age, <<Awu use itsu awerhu uner utserh uwuku ufa awe ru idamen nu uner ha ana awe nggu umbɔ? Ivanga niyɔ ibarɔ awuri inyãnguwe uner utserh uwuku ufa ha na abɔre umbɔ. Ivang hã niyɔ umbɔ aka ikpem ighabin.

<sup>16</sup> <<Unera asi ikũ atorho aka afa asɔr abipa atorho aka agbe. Ubinkutsu, aka afa ha awuri ishĩrhã avaate aka agbe ha. Ivivaar ha iwuri inangege iyi inggbaashia.

<sup>17</sup> Ikei unera asi itsuka amẽ inebi aka afa ra ambãĩ aka agbe. Umbɔ aba akorhumbɔ, ambãĩ hã awuri iyar. Amẽ inebi ha awuri igba, ambãĩ hã awuri iwe ibem. Ìĩ, aka isaka atsu amẽ inebi aka afa ra ambãĩ aka afa, nu ake asi íyarke ra amẽ inebi adzek agbake.>>

---

\* **9:13** Àka anyã ikei: Uho 6.6.

*Ukom unakutsɛrh nu ukutsɛrh  
uwuku ughong  
(Umar 5.21-43; Irh 8.40-56)*

<sup>18</sup> Uyesu anu isɔme umbɔ akɛɛ ha, unggbaashi uwɔɔ ru ubã ifɛn-Nummbɔ aba atararhu ra anangnga na agɛ, <<Unapmum anai ikpe. Bɔr uba utsorhu ubokngo nu unga awuri ibɛka.>>

<sup>19</sup> Uyesu asok azĩã nggu unga, nu angwẽ ime-sanga adɔsa unga.

<sup>20</sup> Mɔcɛ utsɛrh uwɔɔ aka atsĩã imɛka usɔkdũmɛn nggu irhãrhã umẽẽ aba ra andzing aba abangu ifɛn atorho Uyesu.

<sup>21</sup> Unga agɔr ra amɛnnnga agɛ, <<Umun ĩba ĩbangumum ifɛn atorhanga umum iwuri ikerhumum.>>

<sup>22</sup> Ivangyɛ Uyesu aka adzipa anyã unga. Unga agɛ, <<Niba ugũo ighong unapmum. Imang-mangngo ngge ikerhuwa ungo.>> Kanying utsɛrh ha akerhunga.

<sup>23</sup> Ivangyɛ Uyesu aka aba atsĩ ri iya unggbaashi ha, anyã abika abar aserhwa nu ikikɔng anera iki igwarha arherhe.

<sup>24</sup> Unga agɛ, <<Àka asombi. Una hã anasi ikpea bɔr awe ru urhɔ.>> Bɔr umbɔ anyĩrhã unga.

<sup>25</sup> Anera aka adzek amaa, unga atsĩ adzur ubok una hã, una hã asok adẽẽ.

<sup>26</sup> Isarhe arherhe ha itɛrhã imaangge abĩ hã.

*Uyesu akerhuwe uner ibvuta  
nu igbau*

<sup>27</sup> Uyesu aka azɛrhã aneke anang hã, abi ibvuta avaa adɔsa na atsarhi irhakmbɔ agɔr agɛ, <<Ucorhuwa umɛn Ungwẽ Udauda!>>

<sup>28</sup> Ivangye Uyesu aka atsĩ ri iya, abi ibvuta ha aba ru unga, unga arhusa umbɔ agɛ, <<Umbi awembi ri imangmang ugɛ umum idẽẽ ikorhuwamum akere?>>

Umbɔ agɔr unga agɛ, <<Ĩ, Uteijee.>>

<sup>29</sup> Unga abanga asumbɔ na agɛ, <<Ri imangmangmbi neke ngge ikorhe ru umbi.>>

<sup>30</sup> Asumbɔ ayanguke. Uyesu agbiite atombɔ akarhãrhã agɛ, <<Niba adɛyikumbi unera akere ha.>>

<sup>31</sup> Bɔr umbɔ adzek atɛrhã arherhe ha amaa kishoo abĩ hã.

<sup>32</sup> Umbɔ aka adzek ra awiya, umbɔ akũ uner uwɔɔ aka awe ru ipfu iyiki ibewe iki ikɛnnge unga arherhe aba ru Uyesu.

<sup>33</sup> Ivangye umbɔ aka awayiwe ipfu iyiki ibewe ha idze, uner igbau ha atirhunga arherhe. Ikikɔng anera idzedzeu ni igɔr igɛ, <<Anasi inyãmbɔ ikpũ iferhe rimi ru Uisairha.>>

<sup>34</sup> Bɔr abi Ufarisi agɛ, <<Nggu ijee uyerhe ipfu iyiki ibewe unga iki ikũ atsusuwe ipfu iyiki ibewe.>>

### *Abi itsera awu ukunjiir*

<sup>35</sup> Uyesu adɔsi iteu iyiki igɔng nu iyiki ici kishoo, amesuwe ra abã ifɛn-Nummbɔ. Adzowe Isarhe Iyiki Ize iyi Iyerhe afã, na akerhuwe anera ru kishoo ikpũ irhãrhã nu ighighong.

<sup>36</sup> Ivangye unga aka anyã anera aka akɔng arherhe, unga agũ atorh umbɔ, ubinkutsu, umbɔ awe ru uver akarhãrhã na ashimbɔ ru uner uwuku uyike. Umbɔ awe ru nyaki idɔiyɛ iki ish-ingge ru uner idzeu.

<sup>37</sup> Mɔcɛ unga agɔr angwɛ imesanga agɛ, <<Igbɛra abin iwe irhɛirhɛ, bɔr abi itsera awe ukunjiir.

<sup>38</sup> Àka ashɔrhũ Uteijee uwu igbɛra abin, unga adene abi itser ri icang igbɛra abinnga.>>

## 10

*Uyesu ayisa angwɛ imesanga*  
(Umar 3.13-19; Irh 6.12-16)

<sup>1</sup> Unga aka ayisa angwɛ imesa usɔkdũmɛn aba ru unga, unga adzowe umbɔ ijee iyiki itsũwe ípfu iyiki ibewe na akerhuwe ubɛn ikpũ irhãrhã nu ighighong.

<sup>2</sup> Atsok abi itser Uyesu ha ake usɔkdũmɛn hã, uwu inbgaashia, Usiman uwu umbɔ iki iyisa Ubi-tru, nu Uandarawu ungwɛmbɔ, Uyaku ungwɛ Uz-abadi nu Uyohana ungwɛmbɔ,

<sup>3</sup> Ufirhibu, Ubatorhomi, Utoma nu Umatiyu uner uwuku uyɛisu ikirbi abĩ, Uyaku ungwɛ Uharhfa, Utaddiyu,

<sup>4</sup> Usiman uner Ukan'ana nu Uyahuda Uiskariy-oti, uwuku ugha adaknga.

*Uyesu adene angwɛ imesanga*  
(Umar 6.7-13; Irh 9.1-6)

<sup>5</sup> Uyesu adene usɔkdũmɛn hã agɛ, <<Niba azĩmbi ra atsen abi Uyahuda use atsĩ ru ubɛn uteu Us-amariya.

<sup>6</sup> Àka azĩ ri ídɔi iyiki igwir iyi Uisairiha.

<sup>7</sup> Ri izizĩmbi, àka adzowe isarhe iyɛɛ agɛ, <Iyɛrhe afã iki iyongge.>

<sup>8</sup> Àka akerhuwe abi irhãrhã, àka azituwe abika akpe, àka asare abi ingbim, àka atsusuwe ípfu iyiki

ibewe. Umbi ayei ijee ha izũwã, àka atõ itser nggu ngge izũwã.

<sup>9</sup> Niba akpɔmmbi uzinarhi use uazurhfa use ubinkpi uku uwu ru nyaku uhwek ri ibvukmbi.

<sup>10</sup> Niba nyangumbi ukpoka ru uzêrhã hã, use atorho avaa, use abadak avaa use igbong, ubinkutsu, uner itser amẽẽ ikpo ubingha.

<sup>11</sup> <<Uben uteu ukugang use uku uci umbi aka itsĩ, àka abee uner uwuku urhurhika umɔ. Àka aseĩ ri iyanga utseku isisokmbi.

<sup>12</sup> Ivangye umbi aka itsĩ ri iya ha, àka aghwe umbɔ.

<sup>13</sup> Iya ha iba ibemuke umbi, neke ididɔrambi iwe umɔ, bɔr ike iba isi ibemuke, ididɔrambi ibvui iba ru umbi.

<sup>14</sup> Unera aba asi iyeisa umbi use akpea ato ra arherhambi, àka awashuwe uzurhu uwu adakmbi ivangye umbi aka idze ri iya ha use uteu ha.

<sup>15</sup> Umum indɛyiwa umbi idzidzerhe, uver uteu ha use iya ha uwuri unangkpɔ ukpu aner Usɔdɔm nu Ugomora ru unum ukpuku uvarha arherhe.

### *Ayetnum akɔ abarɔ*

*(Umar 13.9-13; Irh 12.11-12; 21.12-19)*

<sup>16</sup> <<Umun idena umbi adzek ru nyaka idɔi ra ateu ijui ngbako. Nggee àka awe ru itsoi ru nyaki ibvui na ashimbi ri iki ibewe ru nyaka anurhe.

<sup>17</sup> <<Àka akpɔm amɛnmbi nggu anera, umbɔ awuri iden umbi ra ateu akakũ na akwer umbi ra abã ifɛn-Nummbɔ.

<sup>18</sup> Ri itsimbi aka adɔsa umum, umbɔ awuri ikũna umbi azĩ ra asu agomna nu ayeɾhe ru nyaka abi idekamum ru umbɔ nu atsen abi Uyahuda.

19 Bər ivangyε umbə aka idzur umbi, niba agũmbi ighong ubinkpi umbi aka irherhe use umbi irherhe uguse. Ri ivang hã awuri idzaambə ubinkpi umbi aka irherhe.

20 Asi íwea umbi irherhe, bər Ipfu Utəmbi ngge irherhe ra angwĩmbi.

21 <<Ungwěyi awuri idzowe ungwěmbə umbə afere, utei ikei awuri idzowe ungwěnga. Awəkaci ikei awuri iwu ri igamtsak nggu ateimbə utseku umbə aka itsu umbə afere umbə.

22 Anera kishoo awuri ikpěna umbi ri itsok-mum. Bər kishoo uwuku ubima utseku imimasha awuri ikpoa ififərh.

23 Umbə aba adzaambə umbi uver ra anang akəə, àka atĩ azĩ anang akəə. Umum indəyiwa umbi idzidzerhe, Ungwě-Ner awuri ibanga nu umbi anasi imaambi itsĩrhĩ iteu Uisrairha kishoo.

24 <<Ungwě imesa asi inanga umarhemnga, use ugārḥā ananga uteiyanga.

25 Ungwě imesa awe ra anggəm unga aka awe ru nyaku umarhemnga nu ugārḥā ru nyaku uteiyanga. Umbə aba ayisa umum iki iwe uteiyambi ugε Uba'arhzaburh uyerhe ípfu iyiki ibewe, awuri iyisa umbi nggu itsok ha anangmbə umum!

*Unerwi aka amē umbə agũ iwei unga  
(Irh 12.8-9)*

26 <<Nggee niba agũmbi iwei umbə. Ubin ushikpə umbə aka afəm, ukpə uku usi idzekpə, use ri iwək umbə aka asi íhwengmbə.

27 Abinkε umum iki isəma umbi ru uzĩ, àka asəme ake ri irhirhang. Abinkε aka akḥewa ra atombi, àka adũwā ake ra atsi uvi.

<sup>28</sup> Niba agũmbi iwei abika afere iyor b̄or asi idēē af̄erm̄b̄o ipfu. Nu ngge iki iwe rimi, aka agũ iwei uwuruwi aka idēē afere iyor nu ipfu kishoo ri idzũ urha.

<sup>29</sup> Asi iwea ahwirhḡom avaa umb̄o aki igoshe ukobo unying? Nggee unying usi ígbamgb̄o ra abĩ Ut̄embi aka asi íhw̄enga umgb̄o.

<sup>30</sup> Nu uko ígwar itsimbi umb̄o aka avuvarha ngge.

<sup>31</sup> Nggee niba agũmbi iwei, umbi anangmbi ahwirhḡom ugarh idiki irh̄eirh̄e.

<sup>32</sup> <<Ub̄en unera aka ad̄eyiwe itsinga uḡe unga awu uwu umum ra asu anera, umum iwuri id̄eyikũ unga awu uwu umum ra asu Ut̄emum ra af̄ã.

<sup>33</sup> B̄or ub̄en unera aka at̄eyinga íhw̄eng umum ra asu anera, umum iwuri itsit̄eyimum íhw̄eng unga ra asu Ut̄emum ra af̄ã.

*Asi iwea idid̄or̄ b̄or awu ifuw*

*(Irh 12.51-53; 14.26-27)*

<sup>34</sup> <<Niba akaimbi if̄erhk̄o uḡe umum ĩba itsu idid̄or̄ ru upfung. Umum isi ĩbamum itsu idid̄or̄, b̄or ikũ ifuw.

<sup>35</sup> Ubinkutsu, umum ĩba itsu ifuw ru,  
<< <ungw̄e nu ut̄enga,  
unai nu uyanga,  
uts̄en ungw̄e nu ukokanga.

<sup>36</sup> Anggamtsak unera awuri iwe abi iyanga.>\*

<sup>37</sup> <<Uwuruwi aka abemu uyanga use ut̄enga ananga umum asi im̄ēē iwe uwu umum. Uwuruwi aka abemu ungw̄enga use unapunga ananga umum, asi im̄ēē iwe uwu umum.

---

\* **10:36** Āka anyā ikei: Umik 7.6.

<sup>38</sup> Uben unera aka asi ishupu igārḥāmau ucuci-  
ianga adɔsunga umum, asi imēē iwe uwu umum.

<sup>39</sup> Uwuruwi aka akpo urhenga, unga awuri  
igwirhe umgbɔ, nu uwuruwi aka agwirhuwe  
urhenga ri itsimum, awuri ikpoa umgbɔ.

*Itser itosa*  
(Umar 9.41)

<sup>40</sup> <<Uwuruwi aka ayei umbi, ayei umum. Uwu-  
ruwi aka ayei umum ayei uwuku udena umum.

<sup>41</sup> Uwuruwi aka ayei uwuku usɔm Arherhu-  
Num ri itsernga, awuri iyeisa itosa uner uwuku  
usɔm Arherhu-Num. Nu uben uwuku uyei uner  
uwuku urhika ri irhirhikanga awuri iyeisa itosa  
iyi uner uwuku urhika.

<sup>42</sup> Nu uwuruwi aka adzowe uko ukpewa  
amē aka aghenga ru uben unera ra abere aka  
awe angwē imesamum, umum indeyiwa umbi  
idzidzerhe, awuri ikpoa itosanga.>>

## 11

*Uyesu nu Uyohana Uner Ubɔtisima*  
(Irh 7.18-35)

<sup>1</sup> Uyesu aka amaa imesuwe angwē imesanga  
usɔkdūmɛn hã, unga adzek umɔ azĩ amesuwe na  
adzowe isarhe ra abĩ Ugarhirhi.

<sup>2</sup> Ivangye Uyohana ru ugborzĩ aka agũ abinke  
Ukiristo aka akorhe, unga adene angwē imesanga

<sup>3</sup> azĩ arhusa unga age, <<Awu ungo uwu uwuku  
ububa ha, use umɛn itsu asumɛn ru uwɔɔ?>>

<sup>4</sup> Uyesu adzipa age, <<Àka abvui azĩ adeyiwe  
Uyohana ubinkpi umbi aka agũ na anyã.

<sup>5</sup> Abi ibvuta anyãmbɔ, akatarhu azērḥũmbɔ uzērḥã, abi ingbim akerhumbɔ, abi igbau agũmbɔ, ikom isongge nggu urhɛ, adzowukumbɔ Isarhe Iyiki Ize ra atsũwã.

<sup>6</sup> Idorh iwu iyi uwu ha aka asi ikpẽẽ umum ri itsi abinkɛ umum iki ikorhe.>>

<sup>7</sup> Ivangyɛ awɛ imesu Uyohana aka azĩmbɔ, Uyesu atirha arherhe nggu ikikɔnga ri itsi Uyohana agɛ, <<Umbi azĩ izɛrhu use ra arhum? Ubĩ uku uder ugba iki ifɛu?

<sup>8</sup> Iba ishingge rimi, ude umbi adzek azĩ izɛrhu use? Utsa uwɔɔ aka atsim atorho aka aze? Ĩĩ, abika atsim atorho aka aze aseɪ ra adzɛpurhe iyɛrhe.

<sup>9</sup> Ude umbi adzek azĩ izɛrhu use? Uwuku usɔm Arherhu-Num? Ĩĩ, umum idɛyiwa umbi, ananga uwuku usɔm Arherhu-Num.

<sup>10</sup> Unga ḥã uwi umbɔ aka atsɛng ra Arherhu-Num ri itsinga agɛ, << <Umun iwuri idene ungwẽ itsermun ag-baashia ru ungo.

Unga awuri igbishuwa atsĩndĩngo.>\*

<sup>11</sup> Umum indɛyiwa umbi idzidzɛrhe, ra abirabɛ akatɛrh aka amar asi itsĩmbɔ Uyohana Uner Ubɔtisima. Bɔr uwuruwi aka awu uku ucia ri Iyɛrhe afã, ananga unga.

<sup>12</sup> Udzur ri ivang Uyohana Uner Ubɔtisima uba utsĩ irherɛ, Iyɛrhe afã iwe ru uver, abika adzowe uver ha umbɔ abee ivur ngge ri iker.

<sup>13</sup> Ubinkutsu kishoo itsɛng abika asɔm Arherhu-Num nu Ĩkpem Umusa irherhungge arherhe akɛɛ utɛku ivang Uyohana.

---

\* **11:10** Àka anyã ikei: Umrh 3.1.

<sup>14</sup> Umbi aba ibemumbi ubinkpi umum iki irherhe, Uyohana unga awu Uirhiya ha umbɔ aka arherhe uge unga awuri ibanga.

<sup>15</sup> Neke uner uwuku uwu ra ato aka agũ, unga agũ.

<sup>16</sup> <<Umum ikpangu udan ukpirε nggu use? Awu ru nyaka awεkaci iki isei ra anang izεε na ayisa abɔɔ agε,

<sup>17</sup> << <Umεn ibara umbi aserhuwa, umbi akpẽmbi izer.

Umεn itsũ ubom akpe, umbi akpẽmbi iciu akpe.>

<sup>18</sup> Uyohana aka aba, asi itsuka amεnnga ri ighigha nu ihwihwa, umbɔ agε, <Unga awe ru ipfu iyiki ibewe.>

<sup>19</sup> Ungwε-Ner aka aba agha na ahwa, umbɔ agε, <Àka anyã uner uwuku ubvun igha abin nu ihwihwa akarhãrhã, uwεrhε abika ayεi ikirbi abĩ nu abi arhim!> Bɔr awu itser unera iwuri idεyiwe uge unga awea ri itsoi.>>

*Atorh iteuyε iki inasi idzipungge  
(Irh 10.13-15)*

<sup>20</sup> Mɔcε Uyesu aka atirhi itseyi iteuyε unga aka akorhe irhε abin idzeu ri ngge, ubinkutsu, anera asi idzipumbɔ.

<sup>21</sup> <<Atorhngo, Ukorazin! Atorhngo Ubetsaida! Agε itser idzeu ha umbɔ aka atã ru umbi, umbɔ atõmbɔ ngge ru Utaya nu Usidon, umbɔ awuri idzipumbɔ iki ifitem, umbɔ awuri itsim ashaka atorho, na aseĩ ra atɔɔ.

<sup>22</sup> Bɔr umum idεyiwa umbi, ru unum ukpuku uvarha arherhe, uvermbi uwuri inangkpɔ ukpu Utaya nu Usidon.

<sup>23</sup> Ungo igango, Ukafanahum, ungo ukaiferhko uge awuri ibera ungo afũ afã? Ìĩ, awuri ikũna ungo acipa ra anang isei abika akpukpe. Itser idzeuye umbɔ aka atõ ru ungo umbɔ aba atõ ngge ru Usɔdɔm, ukpɔ uba uwe umɔ utseku irherɛ.

<sup>24</sup> Bɔr umum idɛyiwa umbi ru unum ukpuku uvarha arherhe, uvermbi uwuri inangkpɔ ukpu Usɔdɔm.>>

*Àka aba ru umum na akpo iwiwosha  
(10.21-22)*

<sup>25</sup> Ri ivang hã Uyesu awu ra anggɔm ri Ipfu Isarsatangge, agɔr age, <<Umum ikpoi ungo Ute, Uteijee uwu afã nggu abĩ, ungo uku uwɔkɔ iferhe iyerɛ ru abi itsoi nu abi idzursu, nu usɔme ake ra awɛkaci.

<sup>26</sup> A Ute, akerɛ ha awu ubinkpi ungo uku ugũiben ikorha ukpɔ.

<sup>27</sup> <<Utemum adzaa abina kishoo ru umum. Unera asi ihwɛnga amɛn Ungwɛɛ, Ute ikiyikanga ahwɛng. Unera asi ihwɛngnga amɛn Utei, Ungwɛɛ ukpekũ nu uwuruwi Ungwɛ hã aka isɔme unga.

<sup>28</sup> <<Àka aba ru umum, kishoo umbi abika agũ azhe na agũ imor, umum iwuri idzaamum umbi iwiwosha.

<sup>29</sup> Àka adzowe atsimbi na amesa ru umum, ubinkutsu, umum iwu uner inna nu ididɔɔr ra amɛnmum, nu umbi awuri ikpombi iwiwosha ra amɛnmbi.

<sup>30</sup> Ubinkutsu, idzowe itsimbi ru umum asi iwea ubin uku ughong, abinmum asi imorke.>>

## 12

*Uteijee uwu unum ukpuku uwosha*

*(Umar 2.23-28; Irh 6.1-5)*

<sup>1</sup> Ri ivang hã Uyesu azêrhã atong ri ícang uarhkama ru unum ukpuku uwosha. Angwê ime-sanga agũ imerh umbô atirhi igbiu isha arhkama hã atãi.

<sup>2</sup> Ivang abi Ufarisi aka anyã rimi, umbô agor unga age, <<Unyã! Angwê imesango aka azharhuwe Ikpem unum ukpuku uwosha.>>

<sup>3</sup> Unga agor umbô age, <<Umbi anasi ivarhumbi ubinkpi Udauda aka akorhe ri ivangye unga nggu awerhu uzêrhãnga aka agũ imerh?

<sup>4</sup> Unga aka atsĩ ru Iya-Num anyangu usarkasar uborodi atãi nggu awerhu uzêrhãnga, ukpurukpi ri Ikpem awu abika adzowe idem-Num ukpekũ iki itãi.

<sup>5</sup> Use umbi anasi ivarhumbi ri Ikpem Umusa uge abika adzowe idem-Num ri itser unum ukpuku uwosha ri Iya-Num aka adakuwe unum ukpuku uwosha na ishimbô ru uvau?

<sup>6</sup> Umum ideyiwa umbi uwuruwi aka ananga Iya-Num awu nggimi.

<sup>7</sup> Umbi aba ahwengmbi agben itseng Arherhu-Num hã iki igor igê, <Umum ibee umbi awe ra atorh, isi Ìbeemum idem-Num,>\* Umbi aba asi it-sumbi uvau ra abika asheru uvau.

<sup>8</sup> Ubinkutsu Ungwê-Ner awu Uteijee unum ukpuku uwosha.>>

*Uner ushayi ubok*

*(Umar 3.1-6; Irh 6.6-11)*

---

\* **12:7** Àka anyã ikèi: Uho 6.6.

9 Adzeka anang hã unga atsĩã ru ubã ifen-Nummbõ.

10 Uner uwɔɔ uboka uku ushayi awu umɔ. Umbõ abee udĩkpi umbõ aka ikpo Uyesu nggu uvau, umbõ arhusa unga agɛ, <<Ri Ikpem imɛngge umbõ akerhuwe ru unum ukpuku uwosha?>>

11 Unga agɔr umbõ agɛ, <<Unera ru umbi aba awuri idɔi ngge igba ru ughwee ru unum ukpuku uwosha, uner idɔi ha asi idzur akpɔm ngge atsũwũka?

12 Unera ananga idɔi akarhãrhã! Nggee asi iwea izharhuwe Ikpem ri ikorhi iyiki ize ru unum ukpuku uwosha.>>

13 Mɔɛɛ unga agɔr utsak ha agɛ, <<Unamu ubokngo udzek.>> Nggee unga anamu uboknga udzek, ukpɔ ukerhe uwe ru nyaku ukpu uvaa.

14 Bɔr abi Ufarisi adzek akɛki itsũwã umbõ aka ifere Uyesu.

### *Itsuiƿer isɔm Arherhu-Num Uishaya*

15 Ivang Uyesu aka ahwɛng rimi, unga abɔruka anang hã. Arherhe aka adɔsa unga, unga akerhuwe irhãrhãmbõ.

16 Unga agbiite atombõ ugɛ niba adɛyikumbõ iwiwenga ru uner.

17 Akɛɛ ake atsuaƿer ubinkpi uku urherhe ra angwĩ uwuku usɔm Arherhu-Num Uishaya agɛ,

18 <<Unyã ugãrhãmum uwi umum iki isɛng, uwu umum iki ãbema, ru unga umum iki igũibɛn.

Umum iwuri itsuke Ipfumum nu unga, nu unga atsu abiã ahwɛng irhirhika.

19 Asi ísoyinga isa use itsuyi ivum, asi igũmbõ urhemnga nu atsĩndĩ.

<sup>20</sup> Asi íbvũã ugamwi uku uwuri íbvũ,  
utongviwi uku uwuri irhim,  
unga asi írhĩwũka.

Unga awuri ikorha akere  
utseku unga aka itsu irhirhika igha ingg-  
baashi.

<sup>21</sup> Abĩã awuri ifosa ri itsoknga.>>†

*Uyesu nu Uba'arhzaburh*  
(Umar 3.20-30; Irh 11.14-23)

<sup>22</sup> Mɔɛ umbɔ akũ uner íbvuta aka afɔr arherhe  
adaka awe ru ípfu iyiki íbewe aba. Uyesu aker-  
huwe unga, ngge itsu unga arherha arherhe na  
anyã íkei.

<sup>23</sup> Anera kishoo adzeidzeu na age, <<Awu Ungwẽ  
Udauda nuwi?>>

<sup>24</sup> Bɔr abi Ufarisi aka agũ akere ha, umbɔ  
age, <<Nggu íjee Uba'arhzaburh uyere ípfu iyiki  
íbewe utsak uwure aka isaka akũ atsusuwe ípfu  
iyiki íbewe ha.>>

<sup>25</sup> Uyesu ahwɛnga ífɛrhkɔmbɔ unga agɔr umbɔ  
age, <<Ubɛn iyere iki igau agbɛra avaa iwuri itsĩm,  
nu ubɛn uteu use iya iki igau nggu adɔkake isi  
ídẽẽke.

<sup>26</sup> Ushaitan aba atsũwũka Ushaitan, awe ri ifuw  
nggu itsikamnga. Iyerhanga ídẽẽ iguse?

<sup>27</sup> Umum iba ikũ íjee Uba'arhzaburh itsusuwe  
ípfu iyiki íbewe, abimbi akũ íjee iyikisong at-  
susuwe? Angwẽ imesambi awuri itsuka umbi  
uvau ra arherhe akere.

<sup>28</sup> Umum íba ikũ íjee Ípfu-Num itsusuwe ípfu  
iyiki íbewe, mɔɛ Iyerhe Unum iki íbange ru  
umbi.

---

† 12:21 Àka anyã íkei: Uish 42.1-4.

29 <<Use ikei, unera awuri ikorha aguse na adēē atsi ri iya uner uwuku uker avur abinnga? Awuri igbaashia abow unga kata na adēē akarha abin iyanga.

30 <<Uwuruwi aka asi iwea nggu umum, akpēē umum. Uwuruwi aka asi ikōnga nggu umum, asusituwe.

31 Nggee umum īdeyiwa umbi, awuri itsūwūkumbō anera ru kishoo ikpū arhim nu urhena ru Unum, bōr uwuruwi aka arhenu Ipfu-Num, asi itsūwūkumbō arhimnga.

32 Ubēn unera aba arherhunga urhēm uku ubewe ri itsi Ungwē-Ner, awuri itsūwūkumbō unga, bōr uwuruwi aka arheni Ipfu Isarsatangge, asi itsūwūkumbō unga icēē use ivang iyiki ibiba.

33 <<Ucucii uku uze uku isaku ughwēr ikpūrhā iyiki ize, ucucii uku ubewe uku isaku ughwēr ikpūrhā iyiki ibewe. Aka isaka ahweng ucucii ri ikpūrhāngge.

34 Umbi abi amēn íbvui, umbi awuri ikorha uguse na adēē arherhe iyiki ize nggu amēn aka abewambi? Ubinkpi uku uwe ra amēn, ukpō uku idzeyiwa ra angwī.

35 Uner uwuku uze aka isaka akū abin aka aze adzeka ra anang aka aze unga aka angwē ru unga. Uner uwuku ubewe aka isaka akū abin aka abewe adzeka ra anang aka abewe unga aka angwē ru unga.

36 Umum idēyiwa umbi uge ru unum ukpuku uvarha arherhe, awuri ivarhukumbō ubēn unera ra arherhe akatārḥāke unga aka arherhe.

37 Ubinkutsu, irhēm arherhango ake itsu ungo ushōr, ake itsu ungo utsīm.>>

*Utsar ukpu Uyunana**(Umar 8.11-12; Irh 11.29-32)*

<sup>38</sup> Mɔcɛ abi Ufarisi abɔɔ nu abika amesuwe Ikpem agɔr unga agɛ, <<A umarhem, umɛn ibee inyã utsar idzeu ru ungo.>>

<sup>39</sup> Unga agɔr umbɔ agɛ, <<Abika abewe, abika asheru Unum, abi undan ukpirɛ arhusu utsar idzeu! Bɔr asi idɛyikumbɔ umbɔ utsar, akpurha adɛyiwe utsar ukpu uwuku usɔm Arherhu-Num Uyunana.

<sup>40</sup> Ru nyaku Uyunana aka amaa inuma itaar utsuu nu atenum ra anaa ubɛrh ukugɔng, rimi hã Ungwɛ-Ner aka imaa inuma itaar utsuu nu atenum awe ru anɔnɔr abĩ.

<sup>41</sup> Aner Unineba awuri iso adɛɛmbɔ ru unum ukpuku uvarha arherhe nggu udan ukpirɛ na awuri itsu uvau ru ukpɔ, ubinkutsu, umbɔ adzipumbɔ ri udũwã Uyunana. Icerɛ uwuku unang Uyunana uwi nggimi.

<sup>42</sup> Ru unum ukpuku uvarha arherhe Usarau-niya uwu Unɔr awuri iso adɛɛ nggu undan ukpirɛ na atsuke uvau ru ukpɔ, ubinkutsu unga adzeka anang akika ader aba igũ itsoi Usorhomon. Ng-gayɛ uwuruwi aka anangnga Usorhomon awu ng-gimi.

*Ibiba ipfu iyiki ibewe**(Irh 11.24-26)*

<sup>43</sup> <<Ivangyɛ ipfu iyiki ibewe iba idzek ru unera, iki isaki iyarhe ri inang iyiki ikoi ibee ikpo iwi-wosha ni isi ikpongge.

<sup>44</sup> Ngge igɔr igɛ, <Umum ibvui izĩ ri iyake umum iki idzek.> Ngge iba ikpo unera ashia umɔ ri iya ha, ngge inyã umbɔ aka ayar na agbishumbɔ iya ha.

<sup>45</sup> Mɔcɛ ngge ibvui izĩ ikarhe ípfu iyiki ibewe iyɔɔ utɔɔva, iyiriyɛ iki ibewe inangngge ngge, ngge kishoo iba isei umɔ. Isisei utsa ha iyi imaataka iwuri ibewe inangge iyi inggbaashia. Iwuri iwe rimi nggu undan ukpuku ubewe ukpirɛ.>>

*Uya nu angwɛmbɔ Uyesu  
(Umar 3.31-35; Irh 8.19-21)*

<sup>46</sup> Uyesu aka awe ra arherhe nggu ikikɔng, uyanga nu angwɛmbɔ aba adɛɛ ra awiya, abee arherha arherhe nggu unga.

<sup>47</sup> Uwɔɔ agɔr unga agɛ, <<Uyango nu angwɛmbi adɛɛ ra awiya, abee irherha arherhe nggu ungo.>>

<sup>48</sup> Unga agɔr unga agɛ, <<Uwukusong awu uyamum, nu abikasong awu angwɛmɛn?>>

<sup>49</sup> Ayottu uboknga ra angwɛ imesanga agɛ, <<Unyã uyamum uwi nu angwɛmɛn.

<sup>50</sup> Ubɛn unerwi aka akorhu ubinkpi Utɛmum ra afã aka abema, unga awu ungwɛmɛn nu unapumɛn nu uyamum.>>

## 13

*Unyaka arherhe uner uwuku udoi abin  
(Umar 4.1-20; Irh 8.4-15)*

<sup>1</sup> Ru unum hã Uyesu adzeki iya azĩ aseisa ru ubang ukau.

<sup>2</sup> Ikikɔng anera irhɛirhɛ iki ikɔng idziranga, itsu unga atsĩ ru ukhukhɔɔ amɛ ase i umɔ. Ikikɔnga idɛɛ ru ubang ukau ha.

<sup>3</sup> Mɔcɛ unga adɛyiwe umbɔ abina arhɛrhɛ ru unyaka arherhe agɛ, <<Uner irham azĩ inna ikpũnga.

<sup>4</sup> Unga adɛɛ inna ikpũ hã, ikpũ iyɔɔ igbei nu utsĩndĩ anunu aba akpɔuke iyi ha kanying.

<sup>5</sup> Iyɔɔ igbei ru ukpərha, abĩ asi iweke akarhārḥā. Ngge imer kanying ubinkutsu, abĩ anang ḥā asi ighorke.

<sup>6</sup> Bər ivangyε unum uku umani iyi ha ikoingge, ubinkutsu, ngge iki ishingge ra anũnang.

<sup>7</sup> Ikpũ iyɔɔ igbei ri ididɔk, ngge iseng itong ngge iyi ha.

<sup>8</sup> Ikpũ iyɔɔ igba ra abĩ aka aze, anangkε ngge iki ighwεr ikpũrhā ananaka, iyɔɔ isɔka utɔtɔĩ use isɔka itaitaar.

<sup>9</sup> Unga uwuku awe ra ato, neke unga agũ.>>

<sup>10</sup> Angwε imesa ha aba arhusa unga agε, <<Awu use utsu ungo urherhuwe anera arherhe ru unyaka arherhe?>>

<sup>11</sup> Unga agər umbɔ agε, <<Ihwεng abinkε aka awɔk aki Iyerhe afā aka adzaa ru umbi, bər asi iwea umbɔ.

<sup>12</sup> Uwuruwi aka awe ru ihwihwεng awuri itomuwe unga akpo arherhe. Uwuruwi aka ashia, awuri iyεse ungwērḥĩ ihwihwεng ha unga aka awerangge.

<sup>13</sup> Umum irherhuwe umbɔ arherhe nggu unyaka arherhe ubinkutsu,

<<Umbɔ awuri irhimbɔ,

bər asi ínyãmbɔ,

na awuri igũmbɔ,

bər asi íhwεngmbɔ.

<sup>14</sup> Irhem uwuku usəm Arherhu-Num Uishaya iki itsuiferngge ra atsimbɔ. Iki igər igε,

<< <Umbi awuri igũmbi

na asi íhwεngmbi,

umbi awuri irhimbi

na asi ínyãmbi.

15 Ubinkutsu, amēn anera abεε awe akerketake,  
 aghong umbō agū nggu atombō,  
 aka abvurkumbō asumbō.  
 Iba isi iwengge rimi, umbō awuri anyāmbō nggu  
 asumbō,  
 umbō awuri igūmbō nggu atombō,  
 na ahwεngmbō nggu amēnmbō,  
 na adzipa aba ru umum ikerhuwe umbō.>\*

16 Bōr idorh iwe iyi asumbi ubinkutsu, ake adēē  
 anyāke, nu atombi ubinkutsu ake adēē agūke.

17 Umum indēyiwa umbi idzidzerhe, abika asōm  
 Arherhu-Num nu abika arhurhika arherhe aka  
 abee inyā ubinkpi umbi aka anyā bōr asi inyāmbō,  
 use agū ubinkpi umbi aka agū, bōr asi igūmbō.

18 <<Àka akpeto na agū agben unyaka arherhe  
 uner uwuku unna ikpū abin hā.

19 Ivangyε uben unera aka agū arherhe Iyerhe  
 afā na asi ihwεnga ake, Undenggū unga aka isaka  
 aba avur ubinkpi umbō aka adoī ra amēnnga. Iwu  
 ikpū iyiki igba ru utsīndī.

20 Iyiriyε iki igba ra ukpōrha, iwe ru nyaku  
 uwuku ugū arherhe ha na ayei nggu anggōm.

21 Bōr unga aka ashia ra anūnang, asi idārhūnga.  
 Ivang arherhe ha aki ikū uver nggu ayetnum uba,  
 unga awuri izī ra andzing.

22 Iyiriyε iki igba ra anang ididōk ngge iwe ru  
 nyaku uwuku ugū arherhe ha, bōr iwārhāna abin  
 upfung ri ibee iwe ru ubin ibērē ni ikēnngge  
 arherhe ha ighwēr ikpūrhā.

23 Bōr iyiriyε iki igba ra abī aka aze iwe ru nyaku  
 uwuku ugū arherha ha na ahwεnga ake. Unga

---

\* 13:15 Àka anyā ikēi: Uish 6.9,10.

aghwεr ikpŭrhã, ananaka, isɔka utɔtɔĩ, use isɔka itaitaar idikunga nggu ubinkpi umbɔ aka adoi.>>

*Unyaka arherhe ubĩ ri itsem*

<sup>24</sup> Uyesu abvui adzowe umbɔ unyaka arherhe akɔɔ agε, <<Iyerhe afã iwu ru nyaku unerwi aka anna ikpŭ iyiki ize ri icangnga.

<sup>25</sup> Bɔr ivangyε anera kishoo aka awu ru urhɔ, unggamtsaknga azĩ adoi ikpŭ ubĩ ri icang itsem hã na aziã.

<sup>26</sup> Ivangyε ikpŭ abin hã iki imεr, umɔ ubĩ igakpɔ umεr.

<sup>27</sup> <<Agãrhũ uner icang hã aba agɔr unga agε, <A uteiya, ungo usi idosɔ ikpŭ iyiki ize ri icangngo? Ubĩ udzekε ukpɔ?>

<sup>28</sup> <<Unga agε, <Awu unggamtsakmum unga akorha aki ha.>

<<Agãrhã ha agε, <Ungo ubeengo umεn izĩ izɔnge ubĩã hã?>

<sup>29</sup> <<Unga agε, <Ĩĩ, ubinkutsu, umbi aba awuri izɔngmbi ubĩ ri itsem hã, umbi adẽẽ abvurhkumbi itsema nggu ubĩã hã.

<sup>30</sup> Àka aneke ake aseng urhɔnga utɛku ivang iyiki ititeng. Ri ivang hã umum iwuri ĩdɛyikũ abi aka ateng hã, umbɔ agbaashia ateng ubĩã hã apfuma, aboyi atsã atsã, umbɔ akpĩwe, bɔr akarhi itsema aba atsuku unghanmum.>>>

*Unyaka arherhe ishaa ikpŭ iyiki ici*

*(Umar 4.30-32; Irh 13.18-19)*

<sup>31</sup> Unga abvui adɛyiwe umbɔ unyaka arherhe akɔɔ agε, <<Iyerhe afã iwe ru nyaki ishaa ikpŭ iyiki ici, utsa uwɔɔ aka anyanga adoi ri icangnga.

<sup>32</sup> Ngge iwu iyiki icia ri ikpũ abin, bər ngge iki imer iseng, ngge iwu ucucii uwuku ugəng, anunu akang ashiyake ra aboka.>>

*Unyaka arherhe aki uga  
(Irh 13.20-21)*

<sup>33</sup> Unga abvui adzowe umbə unyaka arherhe akəə age, <<Iyerhe afā iwu ru nyaku ungwērḥũ uga ukutsērḥ aka akayi nggu agbiu isəka ivaa aki akə abvurh, umgbə ufuyiwe kishoo agbiu ha.>>

<sup>34</sup> Uyesu adeyiwe ikikəng anera kishoo abin akere nggu unyaka arherhe. Unga asi irherhunga ubin ukpəə umə uku usi iwekpə unyaka arherhe.

<sup>35</sup> Ngge itsuifer ubin uwuku usəm Arherhu-Num aka arherhe age,  
<<Umun irherha arherhe nggu unyaka arherhe,  
abinkε aka awək utirhi ri imimunu  
upfung.>>†

*Agben unyaka arherhe  
ubĩ ru itsem*

<sup>36</sup> Məce unga abəre ikikəng anera na atsiā ri iya. Angwē imesanga aba agər unga age, <<Udeyiwa umən agben unyaka arherhe ubĩ ri icang itsem.>>

<sup>37</sup> Unga age, <<Uwuruwi aka adoi ikpũ iyiki ize awu Ungwē-Ner.

<sup>38</sup> Ichang hā ngge iwe upfung, ikpũ iyiki ize ha iwe angwē Iyerhe afā. Ubĩ uwe angwē Undenggũ.

<sup>39</sup> Nu unggamtsak uwuku udoi ubĩ hā, awu Undenggũ. Ivang iyiki iteng hā, awe imimaa upfung, abika atuteng hā awe ípfu itser-Num.

<sup>40</sup> <<Ru nyaka umbə iki ikarhu ubĩ akpĩwe ru urha, iwuri iwe rimi ri imimaa upfung.

† 13:35 Àka anyā ikei: Amb 78.2.

<sup>41</sup> Ungwẽ-Ner awuri idene ípfu itsernga ngge idze, iwuri ikpotuwe Iyerhe afãnga uben ubin uku utsu igba ra arhim nu kishoo abika akorhi iyiki ibewe.

<sup>42</sup> Umbɔ awuri itare abika abewunga ri ikon urha, ra anangke umbɔ aka iciu akpe na atãi anyĩ.

<sup>43</sup> Mɔce abika arhika awuri irhang ru nyaki ishaa unum ri Iyerhe Utembɔ. Unga uwuku awe ra ato, neke unga agũ.

### *Unyaka arherhe abin ugarh ri iwɔk*

<sup>44</sup> <<Iyerhe afã iwu ru nyaka abin ugarh aka awɔk ri icang. Ivangye unera aka akpo ake, unga awɔke ake ikɛi, agɔm na azĩ agoshe kishoo abinnga na agoi icang hã.

### *Unyaka arherhe utarh ukpuku uwe ru ugarh*

<sup>45</sup> <<Iyerhe afã iwu ru nyaku uner igoi uwuku ubee atarhke aka awu ru ugarh.

<sup>46</sup> Ivangye unga aka akpo utarh ugarh ha akarhãrhã, unga azĩ agoshuka kishoo abinke unga aka awe ra ake na agoi utarh ugarh ha.

### *Unyaka arherhe itang igber*

<sup>47</sup> <<Iyerhe afã iwe ru nyaki itang igber iyiki idzui abɛrh. Umbɔ iki itang ru ukau ukugɔng ngge idzui kishoo ikpũ abɛrh.

<sup>48</sup> Ivangye ngge iki itɔk, abi uɔm agbiir azĩ ru ubang ukau ukugɔng hã. Mɔce umbɔ ase na ateng abɛrh aka azea atsuku uzing na atare akika abewe.

<sup>49</sup> Iwuri iwe rimi ri imimashu upfung. Ípfu itser-Num iwuri iba igashuwe abika abewe nggu abika arhurhika.

<sup>50</sup> Umbɔ awuri itare abika abewunga ri ikon urha, ra anangkε umbɔ aka iciu akpe na atāi anyĩ.>>

<sup>51</sup> Uyesu arhusa agε, <<Um̃bi ahwεngmbi akεε ha kishoo?>>

Umbɔ agε, <<ĩĩ.>>

<sup>52</sup> Unga agɔr umbɔ agε, <<Nggee uben uwuku umesuwe Ikpem umbɔ aka adεyiwe unga Iyerhe afā, awe ru nyaku utei iya aka akū abin adzeka ru angbannga aka afa nu aka agbe.>>

*Akpεmbɔ Uyesu ru Unazarat*

*(Umar 6.1-6; Irh 4.16-30)*

<sup>53</sup> Ivangyε Uyesu aka amaa unyaka arherhe akεε, unga abɔruka anang hā.

<sup>54</sup> Ivangyε unga aka aba utepunga, unga atirhi imesuwe anera ru ubā ifεn-Nummbɔ. Umbɔ adzei-dzeu na arhusa agε, <<Utsak uwurε akpo itsoi iyεε rinεε rimi nu ijee iyiki ikorha abin idzeu?

<sup>55</sup> Asi iwea uwεε ha awu ungwě ukapinta ha? Asi iwea uyanga umbɔ iki iyisa Umaryamu? Asi iwea angwεmbɔ rabε, umbɔ Uyaku nu Uyusuf nu Usiman nu Uyahuda?

<sup>56</sup> Asi iwea kishoo anapumbɔ rabε nggu umεn? Awu rinεε unga aka akpo kishoo abin akεε ha?>>

<sup>57</sup> Mɔε umbɔ agū avɔm nggu unga.

Bɔr Uyesu agɔr umbɔ agε, <<Awu ru uben unera aka adzowe uner uwuku usɔm Arherhu-Num igɔng, bɔr asi iwea abi utepunga, nu abi iyanga.>>

<sup>58</sup> Awu ida imangmangmbɔ itsu unga asi iko-rhunga abin idzeu arherhe nggɔɔ ha.

# 14

## *Akpe Uyohana Uner Ub̄otisima*

*(Umar 6.14-29; Irh 9.7-9)*

<sup>1</sup> Ri ivang hã Uyērhe Uhiridu aka agũ arherhe ri itsi Uyesu.

<sup>2</sup> Unga agor abika atōwe unga itser agε, <<Awu Uyohana Uner Ub̄otisima unga asok ra akpe! Ngge itsu unga awuri ijee iyiki ikorha abin idzeu akεε.>>

<sup>3</sup> Ubinkutsu Uhiridu aka adzur Uyohana agbang ru ugborzĩ ri itsi Uhirudiya utsērha ungwẽmbɔ Ufirhibu.

<sup>4</sup> Ubinkutsu Uyohana adεyiwe Uhiridu agε, <<Isi imēnge ungo uku upfunu Uhirudiya!>>

<sup>5</sup> Uhiridu abee ifere Uyohana, b̄or agũ iwei an-  
era, ubinkutsu umbɔ aka anyangu Uyohana awu uwuku us̄m Arherhu-Num.

<sup>6</sup> Unum imar Uhiridu uku uba uwe, unapa Uhirudiya azer azer ri irhowa ha atsu Uhiridu agũiben akarhārḥã.

<sup>7</sup> Nggee unga ayirh na abemuwe idzowe una hã kishoo ubinkpi unga aka if̄ena.

<sup>8</sup> Uyisa una hã adzowe itsũwã, agε, <<Udzaa umum itsi Uyohana Uner Ub̄otisima ri itērḥãz̄ou.>>

<sup>9</sup> Am̄en uyērhe aghong, b̄or ri itsi atsen irhowa ha nu uyirh ha utsu unga atsu umbɔ adzowe ubinkpi una hã aka abee.

<sup>10</sup> Unga adene umbɔ azĩ azharhukumbɔ itsi Uyohana ru ugborzĩ.

<sup>11</sup> Akũ itsi ha nu itērḥãz̄ou aba adzowe ru una hã, unga atsã akowuka uyanga.

<sup>12</sup> Angwẽ imesu Uyohana aba ashupu ukomnga adzake. Məcə umbə azĩ asəme Uyesu.

*Uyesu adzowe ubingha inera anakagənga atəə*

*(Umar 6.30-44; Irh 9.10-17; Uyoh 6.1-14)*

<sup>13</sup> Ivang Uyesu aka agũ rimi, unga asok atsĩ ukhukhəə amẽ agar azĩã anangke anera aka ashimbə awe ikiyikanga. Bər ikikəng anera iki igũ rimi, umbə adzeka ri iteu adəsa unga ra adak.

<sup>14</sup> Ivangye unga aka adzeku ukhukhəə ha anyā anera aka akəng arhərhə, unga agũ atorh umbə na akerhuwe abi irhārḥāmbə.

<sup>15</sup> Urhəe uku uwe, angwẽ imesanga aba agər unga age, <<Anang akere ashike ru uner, ng-gaye urhəe uku uwekpə. Usoyiwe ikikənga umbə azĩmbə, ngge itsú umbə atsĩ ri iteu azĩ agoi ub-ingha.>>

<sup>16</sup> Uyesu age, <<Isi iməngge umbə azĩmbə. Àka adzowe umbə ubin umbə agha.>>

<sup>17</sup> Umbə agər age, <<Umen ikpurhi iwe ru ípo uborodi itəə nu abərḥ avaa.>>

<sup>18</sup> Unga age, <<Àka akũwā ake ru umum ng-gimi.>>

<sup>19</sup> Na agər anera asei nu ubĩ. Unga anyangu ípo uborodi atəə ḥā na abərḥ ha ikivarhake. Abera asunga arhi afā, atar uwəe ru Unum. Unga atsəka adzowe ra angwẽ imesanga, umbə agashuwe ra anera.

<sup>20</sup> Umbə kishoo agha ashur, nu angwẽ imesanga arḥəyĩ awushunga. Ake atək azĩnga usəkdūmen.

<sup>21</sup> Irhəe anera aka agha ubingha ha akatsak atsĩmbə anaka agənga atəə, asi ivarhumbə akatsərh nu awəkaci.

*Uyesu azêrhũ uzêrhã nu amẽ  
(Umar 6.45-52; Uyoh 6.15-21)*

<sup>22</sup> Kanying Uyesu atsu angwẽ imesanga abõre unga na atsĩ ukhukhõõ amẽ agbaashia azĩmbõ ugar ukpõrõ. Unga asoyiwe ikikõnga.

<sup>23</sup> Unga aka asoyiwe umbõ amaa, unga afũã ni itsi igũa ikiyikanga azĩã ifen-Num. Urhẽẽ uwekpõ, unga awe ru nggõõ ha ikiyikanga.

<sup>24</sup> Ri ivang hã ukhukhõõ ha uku uzĩ udermgbõ ru ukau ukugõng hã, ugba unyaikpõ utsu amẽ uni ikwẽr umgbõ.

<sup>25</sup> Ivanga iwu akara ataar aki utsuu, umbõ anyã Uyesu aka azêrhã nu amẽ ukau ukugõng azĩã ru umbõ.

<sup>26</sup> Ivang angwẽ imesanga aka anyã unga azêrhã nu afafã amẽ, umbõ agũ iwei. Agẽ, <<Awu imãrhã!>> Atsu ivum iwei iki ifermbõ.

<sup>27</sup> Kanying Uyesu agõr umbõ agẽ, <<Àka aker amẽnmbi! Awu umum. Niba agũmbi iwei.>>

<sup>28</sup> Mõcẽ Ubitru agõr unga agẽ, <<A Uteijee, aba awu ungo, utsu umum izêrhã nu afafã amẽ ĩba ru ungo.>>

<sup>29</sup> Uyesu agẽ, <<Uba.>>

Mõcẽ Ubitru adzeku ukhukhõõ ha, atirhu uzêrhã nu afafã amẽ azĩã ru Uyesu.

<sup>30</sup> Bõr unga aka anyã ugba, unga agũ iwei na atirhunga ididẽẽ. Unga atsu ivum, agẽ, <<A Uteijee, ufõrh umum!>>

<sup>31</sup> Kanying Uyesu anamu uboknga adzur unga, agẽ, <<Ungo uner imangmang iyiki ici, awu use utsu ungo ucang?>>

<sup>32</sup> Ivangyẽ umbõ aka atsĩ ukhukhõõ ha, ugba ha ukpe unu.

<sup>33</sup> Mɔcɛ abirabɛ aka awe ru ukhukhɔɔ ha adzowe unga igɔng, agɛ, <<Idzidzerhe ungo uwu Ungwɛ Unum.>>

*Uyesu akerhuwe abi irhārḥā  
ru Ujanisarat  
(Umar 6.53-56)*

<sup>34</sup> Ivangyɛ umbɔ aka agar ukau ha, umbɔ acipa ru abī Ujanisarat.

<sup>35</sup> Aner ha ahwɛngmbɔ ugɛ Uyesu awu umɔ, umbɔ adene umbɔ adɛyiwe anera aka awu ra abī ḥā. Umbɔ akū kishoo abi irhārḥā aba ru unga.

<sup>36</sup> Umbɔ ashōrhā unga aneke abi irhārḥā amaa abangu ifɛn atorho akagɔnga. Nu kishoo abirabɛ aka abanga ake, akerhumbɔ.

## 15

*Isisar nu ida isisar  
(Umar 7.1-13)*

<sup>1</sup> Mɔcɛ abi Ufarisi abɔɔ nu abika amesuwe Ikpem adzeku Urusharhima aba ru Uyesu arhusa agɛ,

<sup>2</sup> <<Awu use utsu angwɛ imesango azharhuwe agbeyi atokamɛn? Asi isorhmbɔ abokmbɔ na adārha agha ubingha.>>

<sup>3</sup> Bɔr Uyesu agɔr umbɔ agɛ, <<Awu use utsu agbeyambi atsu umbi azharhuwe Ikpem Unum?

<sup>4</sup> Ubinkutsu Unum agɛ, <Udzowe imor ru utɛngo nu uyango,>\* nu <Ubɛn unera aka arhenu utɛnga use uyanga awu ufang umbɔ afɛre unga.>†

<sup>5</sup> Bɔr umbi amesuwe ugɛ ubɛn unera aba awea ru ubinkpi unga aka iyike utɛnga use uyanga,

---

\* **15:4** Àka anyā ikei: Idzi 20.12; Iva 5.16. † **15:4** Àka anyā ikei: Idzi 21.17; Urha 20.9.

na adēē agər umbə agε, <Ubin hā uwu izūwā iyi Unum.>

<sup>6</sup> Rimi hā umbi agε asi iwea ufang unga idzowe imor utenga nggu ukpə. Agbeyambi atsu umbi anyanga Arherhu-Num awe ibem.

<sup>7</sup> Umbi abi ukpukpeta! Irhikungge uwuku usəm Arherhu-Num Uishaya aka asəm arherhe ri it-simbi agε,

<sup>8</sup> << <Aner abεε adzaa umum igəng nggu angwĩmbə ukpekū, bər amεnmbə aderke nggu umum.

<sup>9</sup> Umbə adzaa umum igəng ibem, anu imesuwe ikpem anera ugεε Unum ad-zowe umbə.> ‡>>

*Abinkε aka awuri itsu ida isisar  
(Umar 7.14-23)*

<sup>10</sup> Uyesu ayisi ikikənga iba ru unga agər umbə agε, <<Àka akpeto na ahwεng.

<sup>11</sup> Asi iwea ubinkpi iki itsĩ ra angwĩ unera itsu unga asi isara, bər ubinkpi uku idzeka ra angwĩnga, ukpəə utsu unga <asi isara.> >>

<sup>12</sup> Məcε angwē imesanga aba ru unga arhusa agε, <<Ungo uhwεngngo abi Ufarisi agū avəm umbə aka agū arherha akεε?>>

<sup>13</sup> Unga agε, <<Ubən ubinkpi Utεmum ra afā aka asi idosa, awuri ibvurhuwe.

<sup>14</sup> Àka aneke umbə, umbə awu abi ibvuta abika adarh abi ibvuta. Uner ibvuta aba adarha uner ibvuta, umbə ikivarhambə awuri igba ru ughwee.>>

<sup>15</sup> Ubitru agər unga agε, <<Usəma umən agben unyaka arherhe ha.>>

---

‡ 15:9 Àka anyā ikei: Uish 29.13.

<sup>16</sup> Mɔcɛ Uyesu age, <<Um̃bi anasi ihwɛngmbi?

<sup>17</sup> Um̃bi asi ihwɛngmbi ubɛn ubinkpi uku utsĩ ra angwĩ unera, utsĩ ra ananga nu udzɛkpɔ ri iyorñga?

<sup>18</sup> Bɔr ubinkpi uku idzeka ra angwĩ, udzeka ra amɛnnga, ukpɔɔ ha utsu unera asi isara.

<sup>19</sup> Ubinkutsu, ifɛrhkɔ iyiki ibewe iki isaki idzeyiwa ra amɛn unera, ifɛr uner, itoma-dak, iyiki itār̃hā, ivɛu, igbɛrangwĩ, nu idakuwe itsok unera.

<sup>20</sup> Akɛrɛ atsu unera asi isara, bɔr igha ubin nggu abok aka ada isisorh asi itsu unera asi isara.>>

*Imangmang utserh uwɔɔ*

*(Umar 7.24-30)*

<sup>21</sup> Uyesu aka abɔre anang hā na azĩā abĩ Utaya nu Usidon.

<sup>22</sup> Utserh Ukan'ana aka aseɪ ra abĩ hā aba ru unga, na atsarhi irhaknga age, <<Ucorhuwa umum! Uteijee, Ungwẽ Udauda, ipfu iyiki ibewe inu idzowe unapmum uver.>>

<sup>23</sup> Uyesu asi iyanuka urhɛm. Nggee angwẽ ime-sanga aba ashōrhā unga age, <<Udene unga azĩā, ubinkutsu arharuwe atomɛn nggu ivum adɔsa umɛn.>>

<sup>24</sup> Mɔcɛ Uyesu agɔr utserh ha age, <<Adena umum ri ɪdɔi Uisairha iki igwir ukpekũ.>>

<sup>25</sup> Bɔr utserh ha aba atararhu ru unga, age, <<A Uteijee, uma uyika umum!>>

<sup>26</sup> Uyesu age, <<Isi irhikungge umbɔ anyangu ubingha awɛkaci atsuke ɪjui.>>

<sup>27</sup> Unga age, <<Ĩĩ, Uteijee, bɔr ɪjui iki isaki ighangge awushu ubingha aki idzeku utebur iyi uteiya agbei nu abĩ.>>

<sup>28</sup> Mɔcɛ Uyesu agər unga agɛ, <<A atserh ha, imangmango iwe akarhārḥā! Ibibeeango ikpongge.>> Kanying unapunga akerhunga.

*Uyesu akerhuwe anera arherhe*

<sup>29</sup> Uyesu abɔre umɔ na adɔsu udiku ubang Ukau Ugarhirhi. Mɔcɛ unga afū igū aseisa.

<sup>30</sup> Ngga ikikɔng iba ru unga, akū akatarhu, nu abi ibvuta, nu abika akaikai, nu abika afər arherhe adambɔ, nu abɔɔ arherhe, aden umbɔ ra adaknga, nu unga akerhuwe umbɔ.

<sup>31</sup> Anera adzeidzeu umbɔ aka anyã agbau arherha arherhe, abika akaikai ayormbɔ akerhuke, akatarhu azērḥūmbɔ uzērḥā, abi ibvuta anyāmbɔ. Nu umbɔ kishoo akpoi Unum uwu Uisairha.

*Uyesu afuka anera anakagɔnga anaa  
(Umar 8.1-10)*

<sup>32</sup> Uyesu ayisa angwẽ imesanga aba ru unga na agɛ, <<Umun icorhuwe aner abɛɛ. Awu unum untaar nukpi umbɔ aka awe nggu umum ashimbɔ ru ubingha. Umum isi ībeemum isoyiwe umbɔ nggu imerh, utsur umbɔ agbeimbɔ ru udī.>>

<sup>33</sup> Angwẽ imesanga agɛ, <<Umen ikpo ubingha ri inɛ ra arhum akɛɛ uku imē ifuka arherha anera abɛɛ?>>

<sup>34</sup> Uyesu arhusa umbɔ agɛ, <<Umbi awe ru ípo uborodi isong?>>

Umbɔ agɛ, <<Utɔɔva nu ungwērḥā abɛrh ukunjir.>>

<sup>35</sup> Unga atsu ikikɔnga iseisa abī.

<sup>36</sup> Mɔcɛ unga anyangu ípo uborodi ha utɔɔva nu aberh ha, unga aka atar uwɛɛ ru Unum. Mɔcɛ na atsɔka ukpɔ adzowe angwɛ imesanga, umbɔ agashuwe ikikɔng anera.

<sup>37</sup> Kishoo agha ashur. Angwɛ imesanga arhɔyĩ awushunga ra abĩ ake atɔk azĩnga utɔɔva.

<sup>38</sup> Abirabɛ aka agha akatsak awu anakagɔnga anaa, asi ivarhumbɔ akatserh nu awɛkaci.

<sup>39</sup> Uyesu aka asoyiwe ikikɔng anera amaa, unga atsĩ ukhukhɔɔ amɛ azĩã abĩ Umagadan.

## 16

### *Umbɔ abee utsar*

*(Umar 8.11-13; Irh 12.54-56)*

<sup>1</sup> Abi Ufarisi nu abi Usaduki aba aviru Uyesu, arhusa unga ugɛ unga akorhu ubin idzeu ukpu uwu utsar uku udzeka afã.

<sup>2</sup> Unga agɛ, <<Urhɛɛ uba uwekpɔ, umbi aka isaka agɔr agɛ, <Ananga awuri izeke udã, afã awe uku uzhããĩ.>

<sup>3</sup> Nu unkpeeka umbi aba anyã afã awe uku uzhããĩ na atsir nggu ufin inai, umbi aka isaka agɔr agɛ, <Irherɛ inai iwuri idoingge.> Umbi adɛɛ ahwɛngmbi agben afã, bɔr umbi asi ihwɛngmbi atsarkɛ aka idɛyiwe agben abinkɛ aka anu ikorhe inum iyɛɛ.

<sup>4</sup> Abika abewe, abika asheru Unum, abi undan ukpirɛ arhusu utsar idzeu! Bɔr asi ídɛyikumbɔ umbɔ utsar, akpurha adɛyiwe utsar ukpu uwuku usɔm Arherhu-Num Uyunana.>> Uyesu abɔre umbɔ na azĩã.

*Uga abi Ufarisi nu uwu  
abi Usaduki  
(Umar 8.14-21)*

<sup>5</sup> Ivangye umbɔ aka agar ukau ha, angwē imesa ayirukumbɔ ikpɔm uborodi.

<sup>6</sup> Uyesu agɔr umbɔ age, <<Àka angwēdzɛn, àka akpɔm amɛnmɛnmbi nggu uga abi Ufarisi nu abi Usaduki.>>

<sup>7</sup> Umbɔ arherhe nggu adɔkambɔ age, <<Unga arherhe rimi ubinkutsu, awu umɛn iki isi ikpɔmmɛn uborodi.>>

<sup>8</sup> Uyesu ahwɛnga ubinkpi umbɔ aka anu irherhe unga arhusa age, <<Umbi abi imangmang iyiki ici, awu use utsu umbi arherhe nggu adɔka uge umbi ashimbi ru uborodi?

<sup>9</sup> Utsekɛ icɛɛ umbi anasi ihwɛngmbi? Umbi aka ayirukumbi umum iki ikū ípo uborodi itɔɔ ifuka anera anakagɔnga atɔɔ? Azĩnga asong umbi aka arhɔyĩ atɔk?

<sup>10</sup> Ikei ípo uborodi utɔɔva uku uwe ubingha anera anakagɔnga anaa. Azĩnga asong umbi aka arhɔyĩ atɔk?

<sup>11</sup> Awu use utsu umbi asi idēē ahwɛngmbi uge umum isi irherhumum arherhe uborodi? Umum igɔr uge àka akpɔm amɛnmɛnmbi nggu uga abi Ufarisi nu abi Usaduki.>>

<sup>12</sup> Mɔcɛ umbɔ aka ahwɛng uge asi igɔra umbɔ ikpɔm amɛn ru uga uborodi, bɔr agɔr umbɔ ikpɔm amɛn ri imesa abi Ufarisi nu abi Usaduki.

*Ubitru adekuwe Uyesu  
unga awu Ukiristo  
(Umar 8.27-30; Irh 9.18-21)*

13 Ivangye Uyesu aka aba ra abĩ abi Ukaisariya Ufirhibi, unga arhusa angwẽ imesanga age, <<An-  
era ani igor uge Ungwẽ-Ner awu ungamo?>>

14 Umbɔ age, <<Abɔɔ agor uge Uyohana Uner  
Ubɔtisima, abɔɔ age Uirhiya, abɔɔ age Uirimiya use  
uwɔɔ ra abika asɔm Arherhu-Num.>>

15 Unga arhusa umbɔ age, <<Bor umbi agor uge  
umum iwu ungamo?>>

16 Ubitru age, <<Ungo uwu Ukiristo Ungwẽ  
Unum uwu urhe.>>

17 Uyesu agor unga age, <<Ungo uwu uner idorh,  
Usiman ungwẽ Ujona! Asi iwea unera adeyiwa  
ungo akere ha, awu Utemum uwuku uwe ra afã.

18 Umum ideyiwa ungo uge ungo uwu Ubitru,  
agbena age ifa. Nu ifa iyerε umum iki idzin ikikɔng  
abika adɔsa, iyiriyε ijee akpe isi inangge ingge.

19 Umum iwuri idzaamum ungo ijee iki idzeki  
Iyerhe afã. Uben ubinkpi ungo iki ibow ru upfung,  
awuri ibow ukpɔ ra afã. Uben ubinkpi ungo iki  
igarhuwe ru upfung, awuri igarhuwe ukpɔ ra  
afã.>>

20 Mɔce unga agbiite ato angwẽ imesanga utsur  
umbɔ adeyikumbɔ unera age unga awu Ukiristo.

*Uyesu asɔm ikpũ akpenga aka ikpe  
(Umar 8.31–9.1; Irh 9.22-27)*

21 Udzur ri ivang hã Uyesu atirhi ideyiwe  
angwẽ imesanga uge awu ufang unga awuri izĩ  
Urusharhima na ahwa ayetnum ra abina arherhe  
ru abok akakũ, nu ateiya abika adzowe idem-  
Num, nu abika amesuwe Ikpem. Awu ufang  
umbɔ afere unga, ru unum untaar unga awuri isok  
abeka.

<sup>22</sup> Ubitru agbiira unga azĩ ri ifena atirhi itserha unga age, <<Ishingge Uteijee! Akere asi ikorhuke nggu ungo!>>

<sup>23</sup> Uyesu adzipa agor Ubitru age, <<Usokɔ ru umum Ushaitan! Ungo uwu utarh ukpuku ukwer itok ru umum, iferhkongo iwe ru nyaki iyi anera, isi iwengge ru nyaki iyi Unum.>>

<sup>24</sup> Mɔce Uyesu agor angwẽ imesanga age, <<Uba unera abeenga idɔsa umum, awu ufang unga akpẽẽ itsikamnga, na ashupu igārghāmau ucuci- ianga adɔsa umum.

<sup>25</sup> Uben unerwi aka abee iforh urhenga, umgbɔ uwuri igwirmgbɔ. Bɔr uwuku ugwirhuwe urhenga ru umum awuri ikpoa umgbɔ.

<sup>26</sup> Awu use izea unera aki ikpo abin upfung kishoo na ashia ru urhe uwu ugbagbaa? Use unera awuri ikũ use afaru urhenga uwu ugbagbaa?

<sup>27</sup> Ungwẽ-Ner awuri ibanga nggu ikpikpoi Utenga nggu ipfu itsernga, mɔce unga aka ifai uben unera itsernga aka atõ.

<sup>28</sup> Umum indɛyiwa umbi idzidzerhe, abɔɔ rabɔ adẽẽ nggimi asi ikpembɔ utseku umbɔ aka inyã ibiba Ungwẽ-Ner ri Iyerhanga.>>

## 17

### *Idzidzipu iyor Uyesu (Umar 9.2-13; Irh 9.28-36)*

<sup>1</sup> Inuma utõ iki imaa Uyesu akũ Ubitru, Uyaku nu Uyohana ungwẽmbɔ Uyaku, umbɔ azĩ ni itsi igũ iyɔɔ iderdetangge, anangke umbɔ aka awe ikiyikambɔ.

<sup>2</sup> Umᵇ unga adzipa awuwea ra asumbᵇ. Asunga arhang ru nyaki ishaa unum, atorhanga awe aka aterha uku upērheng ru nyaki irhirhang.

<sup>3</sup> Kanying Umusa nu Uirhiya akapeeng ru umbᵇ, adēē arherhe nggu Uyesu.

<sup>4</sup> Ubitru agər Uyesu age, <<A Uteijee, izengge umen iki iwe nggimi. Ungo uba ubeengo, umum itar atsurha ataar nggimi, unying uwu ungo, unying uwu Umusa nu unying uwu Uirhiya.>>

<sup>5</sup> Adēē ra arherhe nukpi nggaa amēē aka arhang atsire umbᵇ, nu urhem ra amēē ha uku ugər uge, <<Uwēē awu Ungwēmum, uwuruwi umum iki ibema. Amēnmum agūiben nggu unga akarhārḥā. Àka akpeto ru unga!>>

<sup>6</sup> Ivang angwē imesa ha aka agū rimi, iwei ifər umbᵇ, umbᵇ akwər asumbᵇ atsim ra abī.

<sup>7</sup> Bər Uyesu aba abanga umbᵇ age, <<Àka asisok. Niba agūmbi iwei.>>

<sup>8</sup> Umbᵇ aka abera atsimbᵇ asi inyāmbᵇ uner uwᵇᵇ, akpurha anyā Uyesu.

<sup>9</sup> Umbᵇ aka awe ru utsīndī uwuku ucipuwa ni itsi igū ḥā, Uyesu atsu umbᵇ age, <<Niba adēyikumbi unera ubinkpi umbi aka anyā utseku Ungwē-Ner aka isok ra akpe.>>

<sup>10</sup> Angwē imesa ha arhusa unga age, <<Awu use utsu abika amesuwe Ikpem agər uge awu ufang uner uwuku usəm Arherhu-Num Uirhiya aka igbaashia aba?>>

<sup>11</sup> Unga agər umbᵇ age, <<Awu idzidzerhe Uirhiya aka iba, unga igbishu uben ubin.

<sup>12</sup> Bər umum idēyiwa umbi, Uirhiya aka abanga, bər umbᵇ asi ihwengmbᵇ unga, na akorhuwe unga

ubinkpi umbɔ aka abee. Rimi hã Ungwẽ-Ner aka ihwa ayetnum ru ubokmbɔ.>>

<sup>13</sup> Mɔcɛ angwẽ imesa ha ahweng ugɛ unga arherhe arherha ha ri itsi Uyohana Uner Ubɔtisima.

*Ikerhuwe uwɛkuci ri ipfu  
iyiki ibewe*

*(Umar 9.14-29; Irh 9.37-43a)*

<sup>14</sup> Ivangyɛ umbɔ aka azĩ atsĩ ra anang ikikɔnga, uner uwɔɔ aba ru Uyesu atararhu ra anangnga.

<sup>15</sup> Na agɛ, <<A Uteijee, uma ugũ atorh ungwẽmum, awuri irhãrhĩ unggbunggbuwa, aka ahwa uver akarhãrhã. Idikunga irhɛirhɛ unga iki igbei ru urha use ra amẽ.

<sup>16</sup> Umum iki ikũna unga izĩ ra angwẽ imesango, bɔr umbɔ asi idẽẽ akerhukumbɔ unga.>>

<sup>17</sup> Uyesu agɛ, <<Umbi abi udan ukpire, abika asheri imangmang, abi amɛn aka abewe. Umum iki isei idãrhũmum nggu umbi, ukang umbi aka awe ru imangmang ru umum? Utsɛku ukang umum iki ibima nggu ida imangmangmbi? Ukũ ungwẽ hã uba nggɛɛ ru umum.>>

<sup>18</sup> Uyesu atsɛrhi ipfu iyiki ibewa ha idzengge ru ungwẽ hã. Kanying ungwẽ hã akerhunga.

<sup>19</sup> Mɔcɛ angwẽ imesa ha aba ru Uyesu ri ivangyɛ anera aka ashimbɔ nggu unga, agɔr unga agɛ, <<Awu use utsu umɛn ifɔr itsũwe ipfu iyiki ibewa ha idamɛn?>>

<sup>20</sup> Uyesu agɔr umbɔ agɛ, <<Imangmangmbi iwe ukunjiir ngge itsu. Umum indɛyiwa umbi idzidzɛrhe, umbi aba awembi ri imangmang ukunjiir ru nyaki ishaa umastad, umbi adẽẽ

agɔrmbi igũ iyere age, <Usoku nggɛ uzĩ ru nggɔɔ,>  
ngge iwuri iso izĩngge. Ubin usi ínangkpɔ umbi.>>\*

*Uyesu arherha arherhe  
akpenga ikɛi*

*(Umar 9.30-32; Irh 9.43b-45)*

<sup>22</sup> Ivangye angwẽ imesa ha aka akɔng ra abĩ Ugarhirhi, unga agɔr umbɔ age, <<Awuri íghambɔ adak Ungwẽ-Ner adzowe unga ra abok anera.

<sup>23</sup> Umbɔ awuri ifere unga, ru unum untaar unga awuri isok abɛka.>> Amɛn angwẽ imesa ha aghong.

*Ifai ikirbi Iya-Num*

<sup>24</sup> Uyesu nu angwẽ imesanga aka atsĩ ru Ukafanahum, abika ayei ikirbi Iya-Num akpo Ubitru arhusa unga age, <<Umarhemmbi asi ífaisa ikirbi Iya-Num?>>

<sup>25</sup> Unga age, <<Afasa.>>

Ivangye Ubitru aka aba ri iya, Uyesu atirhi arherha arherhe nggu unga age, <<Ungo unyã uguse Usiman? Ayerhe ayei ikirbi abĩ ru ungamɔ, ra awɛkacimbɔ use ra abikase?>>

<sup>26</sup> Ubitru age, <<Ra abikase.>>

Mɔɛ Uyesu age, <<Awɛkacimbɔ asi ífaimbɔ nukpɔ.

<sup>27</sup> Bɔr utsur umɛn iwemɛn ru uvau ra anera abere, uzĩ ru ukau ukugɔng utang igber. Uyanga angwĩ ubɛrh ha ungo uku utirhu udzur. Ungo ikpɔɔ ishaa imang uazurhfa. Ukũ ishaa imang

---

\* **17:20** Abvur akɔɔ aki itsɛng abok aki isha agɔrke ikɛi uge, **21** Bɔr ikpũ ipfu iki ibewe iyere isi ídzengge, awu ikpem ígha ubin nu ifɛn-Num ukpekũ iwuri itsu ngge idzek.

uazurhfa ha ufai imang iyi Iya-Numngo nggu iyi umum.>>

## 18

*Uwuku ugōnga ri Iyerhe afā*

*(Umar 9.33-37,42-48; Irh 9.46-48; 17.1-2)*

<sup>1</sup> Ri ivang hā angwē imesa ha aba arhusu Uyesu age, <<Ungamō awu uwuku ugōnga ri Iyerhe afā? >>

<sup>2</sup> Unga ayisu ungwērḥū uwēkuci atsu unga adēē ra ateumbo,

<sup>3</sup> na age, <<Umun idēyiwa umbi idzidzerhe umbi aba asi idzipa awembi ru nyaka awēkaci, umbi asi itsĩmbi Iyerhe afā.

<sup>4</sup> Nggee, uwuruwi aka arherhi itsinga ru nyaku ungwē uwurē unga awu uwuku ugōnga ri Iyerhe afā.

<sup>5</sup> <<Uben unera aka ayeisa ungwērḥū uwēkuci ru nyaku uwere ri itsokmum, ayei umum.

<sup>6</sup> Bōr uwuruwi aka atsu unying ra awēkaci abere abika awe ru imangmang ru umum atsĩā ra arhim, ugba umbō abope nggaa ukō igō ru urhōknga na atare unga atsĩ ru ukau ukugōng.

<sup>7</sup> <<Atorh upfung ri itsi abinke aka atsu anera atsĩ ra arhim! Awu ufang abin hā aka iba, bōr atorh uwu ha aka itsu ake aba.

<sup>8</sup> Uba ubokngo use udakngo uni itsu ungo utsĩ ra arhim, uzharha ukpō utare. Ugba ungo utsĩ ru urhe ukpu ugbagbaa nggu ubokngo unying use udakngo unying nu umbō aka itare ungo utsĩ ru urha ukpu ugbagbaa nggu aboka avaa use adaka avaa.

<sup>9</sup> Nu usungo uba itsu ungo utsĩ ra arhim, ukhor utare. Ugba ungo utsĩ ru urhe ukpu ugbagbaa

nggu usua unying nu umbə aka itsuke ungo ri idzũ  
urha nggu asua avaa.

*Unyaka arherhe aki idəi iyiki igwir  
(Irh 15.3-7)*

<sup>10</sup> <<Àka arhi anyā niba akwɛɛrkumbi unying ra  
angwɛrhā awɛkaci abɛɛɛ. Umum idɛyiwa umbi,  
ípɸu itsermbə ubɛn unum ini irhi asu Utɛmum  
uwuku uwe ra afā.\*

<sup>12</sup> <<Umbi akaifɛrhkə aguse? Unera aba awe  
ru idəi unaka, unying igwirngge, unga asi ínekuka  
isəka utəərha nu utəərha ra abang igũa na azĩā  
abee unying hā iki igwir?

<sup>13</sup> Unga aba anyā ngge, umum indɛyiwa umbi  
idzidzɛrhe, unga awuri igəm iyi ha iki iyikangge  
ananga isəka utəərha nu utəərha iki isi igwirngge.

<sup>14</sup> Rimi hā asi iwea ibibemu Utɛmbi ra afā uny-  
ing ra awɛkaci abɛɛɛ agwir.

*Uba ungwɛmbi agbaa uvau ru ungo  
(Irh 17.3)*

<sup>15</sup> <<Ungwɛmbi use unapumbi aba agbaa uvau  
ru ungo, uzĩ usəme unga uvaunga, ungo nu unga  
ukpekũ. Unga aba agũā, ungo uku ubvui ukũ unga  
ubango ri iwɛrhɛ nggu ungo.

<sup>16</sup> Bər unga aba asi igũā, ungo ubee unera uny-  
ing use ivaa umbi azĩ, ngge itsú ideka iyi inera ivaa  
use itaar imɛngge ifɛr arherhe.†

<sup>17</sup> Ungwɛmbi aba akpɛɛ igũ umbə, ungo udɛyiwe  
ikikəng abika adəsa, unga aba akpɛɛ igũ ikikəng

---

\* **18:10** Abvur akəə aki itseng abok aki isha agərke ikei ugɛ, **11 Nu**  
*Ungwɛ-Ner aba ifərɸ abirabɛ aka agwir.* † **18:16** Àka anyā ikei: Iva  
19.15.

abika adɔsa ha, unyanga unga ru nyaku unerwi aka asi idɔsunga Unum use uwuku uyɛi ikirbi abĩ.

<sup>18</sup> <<Umum indɛyiwa umbi idzidzɛrhe, ubɛn ubinkpi umbi aka abow ru upfung awuri ibow ukpɔ ra afã. Ikei ubɛn ubinkpi umbi aka agarhuwe ru upfung awuri igarhuwe ukpɔ ra afã.

<sup>19</sup> <<Umum ibvui idɛyiwa umbi, inera ivaa ru umbi ru upfung ukpirɛ aba ibema ifɛnu ubin ru Utɛmum uwu afã, awuri ikorhuka umbɔ.

<sup>20</sup> Ubinkutsu inera ivaa use ataar aba akɔngmbɔ ri itsokmum, umum iwu nggu umbɔ.>>

*Unyaka arherhe ugãrhã  
uwuku ushe ra atorh*

<sup>21</sup> Mɔɛ Ubitru aba agɔr Uyesu agɛ, <<A Utei-jee, idikunga isong ungwɛmɛn aka igba uvau ru umum, umum itsũwe unga? Awu idikunga utɔɔva?>>

<sup>22</sup> Uyesu agɔr unga agɛ, <<Umum idɛyiwa ungo, asi iwea idiku utɔɔva, bɔr isɔka utɔɔva nu utɔɔva.

<sup>23</sup> <<Nggee, Iyɛrhe afã iwe ru nyaku uyɛrhe uwɔɔ aka abee ivarha abinnga aka awe ra abok agãrhãnga abee umbɔ afase.

<sup>24</sup> Uyɛrhe ha aka atirhi avarhe, umbɔ akũ uner uwɔɔ aba ru unga, uwuruwi aka angwɛ uverh nggaa ibei uazurhfanga iyi anaka agɔnga usɔka.

<sup>25</sup> Unga aka afɔr ifai adaka, uyɛrhe ha agɛ agoshe unga nu utsɛnga, nu awɛkacinga, nu kishoo abinkɛ unga aka awurake na akũ afase uverhnga.

<sup>26</sup> <<Ugãrhã hã atararhu ra asu uyɛrhe ha ashɔrhã agɛ, <Umaa udɔng amɛnnngo nggu umum, umum iwuri ifasamum abina kishoo.>

<sup>27</sup> Uyɛrhe ha agũ atorh unga, afɔrhũwe uverh ha na atsũwe unga aziã.

<sup>28</sup> <<Bor utsak ha aka adzek, anyã ugārnhũ itsernga aka angwẽ uverh unga íshaa imang unaka unying ukpekũ. Unga adzur urhøk utsak ha akpəm na agɛ, <Ufai ubinkpi umum iki idɔsa ungo.>

<sup>29</sup> <<Udɔki itsernga atararhu na ashōrhã unga agɛ, <Udɔng amɛnngo nggu umum, umum iwuri ifasamum uverhngo.>

<sup>30</sup> <<Bor unga akpẽẽ. Akũ utsak ha azĩ agban-guka ru ugborzĩ utseku unga aka ifai uverh ha.

<sup>31</sup> Ivangyɛ andɔki itsernga abɔɔ aka anyã ubinkpi unga aka akorhe, umbɔ asi igũmbɔ ibɛn, umbɔ azĩ asɔmukumbɔ uyerhe ha kishoo ubinkpi uku ukorhe.

<sup>32</sup> <<Mɔcɛ uyerhe ayisu ugārnhã hã agɛ, <Ungo uwu ugārnhũ uwu amɛn aka abewe, umum itsũwũkũ kishoo uverhngo ri ishishōrhãye ungo uku ushōrhã umum.

<sup>33</sup> Isi imɛngge ungo uku igũ atorh udɔki itserngo ru nyaka umum iki igũ atorh ungo?>

<sup>34</sup> Uyerhe agũ avɔm akarhārnhã, atsu umbɔ ad-zowe unga ayetnum utseku unga aka ifai uverh ha.

<sup>35</sup> <<Rimi hã Utɛmum ra afã aka ikorhe nggu uwuku ukpẽẽ itsũwe undɔka ra amɛnnga.>>

## 19

### *Ifere itserh*

#### *(Umar 10.1-12)*

<sup>1</sup> Ivangyɛ Uyesu aka amaa irherha akere, unga abɔruka abĩ Ugarhirhi na azĩã abĩ Uyahudiya aka awu ugar Azẽ Urdun.

<sup>2</sup> Nggaa ikikɔng anera idɔsa unga, unga aker-huwe umbɔ.

<sup>3</sup> Abi Ufarisi abɔɔ aba ru unga avira unga. Arhusa unga age, <<Ri ikpemmɛn imɛngge unera awayiwe utsɛnga ri ikorhe ubɛn ubin?>>

<sup>4</sup> Unga agɔr umbɔ age, <<Umbi anasi ivarhumbi itsɛng Arherhu-Num? Atsɛng ri inggbaashia uge, <Unum amuna umbɔ ukutsak nggu ukutsɛrh,>\*

<sup>5</sup> na age, <Ngge iki iwe rimi, unera awuri ineke utɛnga nu uyanga na awu nggu utsɛnga, umbɔ ikivarhambɔ awuri iwu iyora unying>†?

<sup>6</sup> Nggee umbɔ asi iwembɔ ivaa, bɔr umbɔ awe iyora unying. Nggee, ubinkpi Unum aka agbopa, unera niba agashuka.>>

<sup>7</sup> Umbɔ arhusa age, <<Awu use utsu Umusa atsu uge adzowe ubvur uwuku ufer itsɛrh awayiwe utsɛrh ha azĩã?>>

<sup>8</sup> Uyesu agɔr umbɔ age, <<Umusa abemuwa umbi igau itsɛrh ubinkutsu amɛn aka akermbi atsu. Bɔr isi iwengge rimi ri inggbaashia.

<sup>9</sup> Umum idɛyiwa umbi uge ubɛn unera aka awayiwe utsɛnga aka asi itomunga-dak, na ap-funu utsɛrh uwukuse, atoma-dak.>>

<sup>10</sup> Angwɛ imesa ha agɔr unga age, <<Iba iwe rimi arherhe ukutsak nggu utsɛnga, ida ipfuna ngge inang.>>

<sup>11</sup> Uyesu agɔr umbɔ age, <<Asi iwea ubɛn unera awuri idɛɛ ayɛi arherhe akɛɛ, bɔr abirabɛ Unum aka adzowe ngge.

<sup>12</sup> Ubinkutsu abɔɔ awu akpirh, amar umbɔ rimi. Abɔɔ, anera akorhuwe, asi idɛɛ apfunumbɔ. Abɔɔ Iyɛrhe afã itsu umbɔ akpɛmbɔ ipfuna. Uwuku udɛɛ ayɛi arherhe akɛɛ unga ayɛi.>>

---

\* **19:4** Àka anyã ikei: Ing 1.27. † **19:5** Àka anyã ikei: Ing 2.24.

*Uyesu atsuke idorh ra awɛkaci*  
*(Umar 10.13-16; Irh 18.15-17)*

<sup>13</sup> Mɔcɛ umbɔ akū angwɛrhā awɛkaci aba ru Uyesu atsorhuwe aboknga nu umbɔ na afene-Num ru umbɔ. Bɔr angwɛ imesanga atserha abika akū awɛkaci ha aba.

<sup>14</sup> Uyesu agɛ, <<Àka aneke angwɛrhā awɛkaci aba ru umum. Àka niba akɛnmɓi umbɔ, Iyɛrhe afā iwu iyi ikpūmbɔ.>>

<sup>15</sup> Unga atsorhuwe umbɔ aboknga, mɔcɛ unga azĩã.

*Uwɛdzɛm uner ubin*  
*(Umar 10.17-31; Irh 18.18-30)*

<sup>16</sup> Mɔcɛ uner uwɔɔ aba ru Uyesu arhusa agɛ, <<A umarhem, ubin uku uze ukusong umum iki ikorhe ni ikpo urhɛ uwu ugbagbaa?>>

<sup>17</sup> Uyesu agɔr unga agɛ, <<Ungo urhusa umum ubin uwuku uze? Ubin uwuku uze uwu unying. Ungo uba ubeengo ikpo urhɛ uwu ugbagbaa, ungo udɔsi ikpem.>>

<sup>18</sup> Unga arhusu Uyesu agɛ, <<ikpem iyikisong?>>

Uyesu agɛ, << <Niba ufɛrɔ unera, niba utomungo-dak, niba uvɛpɔ ivɛu, niba ugberɔ angwĩ utsukukɔ unera,

<sup>19</sup> udzowe imor ru utengo nu uyango,>‡ nu <ubemu udɔkango ru nyaki itsikamngo.> §>>

<sup>20</sup> Uwɛdzɛm hā agɛ, <<Uмум iki idɔsumum akɛrɛ kishoo. Umum ibɔr use?>>

---

‡ 19:19 Àka anyā ikɛi: Idzi 20.12-16; Iva 5.16-20. § 19:19 Àka anyā ikɛi: Urha 19.18.

<sup>21</sup> Uyesu agər unga agɛ, <<Ungo uba ubeengo iwe undzumunga, ungo uzĩ, ugoshe abinngo, udzowe uhweka ra atsũwã, nu uba udɔsa umum. Mɔcɛ ungo iweɔ ru ugβeta urhɛrhɛ ra afã.>>

<sup>22</sup> Ivangyɛ uwɛdzɛm ha aka agũ rimi, unga azĩ nggu ighongamɛn, ubinkutsu awe ru ubin akarhãrhã.

<sup>23</sup> Mɔcɛ Uyesu agər angwẽ imesanga agɛ, <<Uмум indɛyiwa umbi idzidzɛrhe, aghong uner ubin aka itsĩ ri Iyɛrhe afã.

<sup>24</sup> Ikei umum idɛyiwa umbi, ugba urhakumi utsĩ ra angwĩ inepurha nu uner ubin aka itsĩ ri Iyɛrhe-Num.>>

<sup>25</sup> Ivang angwẽ imesa ha aka agũ rimi, umbɔ adzeidzeu akarhãrhã, na arhusa agɛ, <<Ungamɔ awuri idẽẽ akpo ififɔrh?>>

<sup>26</sup> Bər Uyesu arhi umbɔ na agɛ, <<Anera asi idẽẽ akorhumbɔ akɛrɛ, bər Unum adẽẽ akorhunga abina kishoo.>>

<sup>27</sup> Ubitru agər unga agɛ, <<Nggayɛ umɛn ineke abina kishoo ni idɔsa ungo! Umɛn iwuri ikpo usemɛn?>>

<sup>28</sup> Uyesu agər umbɔ agɛ, <<Uмум indɛyiwa umbi idzidzɛrhe, ru unumkpi umbɔ aka itsu abina kishoo awe aka afa, ivang Ungwẽ-Ner aka isei ru anang isei aki ijee iyi ikpikpoi, umbi abika adɔsa umum, awu umbi awuri isei nu anang isei ijee usɔkdũmɛn, umbi awuri itsu uvau anui usɔkdũmɛn aki Uisrairha.

<sup>29</sup> Nu ubɛn unerwi aka aneke iyanga, use angwẽmbɔ, use anapumbɔ, utei use uyi, use awekaci, use ícang ri itsimum awuri ikpo ananga rimi hã idikunga unaka, ikɛi unga awuri ikpoa urhɛ uwu ugbagbaa.

<sup>30</sup> Bɔr anera arherhe aka awu anggbaashi, awuri iwe amaata, amaata ikɛi awuri iwe anggbaashi.

## 20

*Unyaka arherhe abi itser  
imang ri icang*

<sup>1</sup> <<Iyerhe afã iwe ru nyaku uteiya icang aka adzek ru unkpeeka atsu abi itser imang ri icangnga.

<sup>2</sup> Unga abemuwe ifai ishaa imang iki iwe imang itser unuma unying, na adene umbɔ azĩmbɔ ri icangnga.

<sup>3</sup> <<Ra akara utɔɔrha aki ukpee ikɛi unga adzek anyã abɔɔ aka aseɪ ibɛm ra angwĩ izɛɛ,

<sup>4</sup> unga adɛyiwe umbɔ agɛ, <Umbi ikɛi àka azĩ atɔ itser ri icangmum, umum ifasũ umbi ubinkpi uku umẽẽ.>

<sup>5</sup> Nggee umbɔ azĩmbɔ.

<<Unga adzek ra atenuma ra akara usɔkdũmɛn, ikɛi ra akara ataar akorhe rimi hã.

<sup>6</sup> Ra akara atɔɔ unga abvui adzek anyã abɔɔ aka adẽẽ ibɛm. Unga arhusa umbɔ agɛ, <Awu use utsu umbi adẽẽ asi itɔmbi itser?>

<sup>7</sup> <<Umbɔ agɔr unga agɛ, <Unera asi idzaanga umɛn itser iyiki itɔ.>

<<Unga agɔr umbɔ agɛ, <Umbi ikɛi àka azĩ atɔ itser ri icangmum.>

<sup>8</sup> <<Urhɛɛ uku uwe, uteiya icang hã ayisu uwuku uyike unga agɛ, <Uyisa abi itser icang hã, ufase umbɔ imang itsermbɔ. Utirhi ra amaataka uzĩ ra anggbaashia.>

<sup>9</sup> <<Abi itserbɛ aka azĩ ra akara atɔɔ aba, umbɔ afai umbɔ ishaa imang.

<sup>10</sup> Abirabε aka agbaashia azĩ, afosi iyēi anangmbɔ rimi. Bɔr uben unera ayēi ishaa imang.

<sup>11</sup> Ivangyε umbɔ aka ayēi ngge, umbɔ abvun arherhe ru uteiya icang hã.

<sup>12</sup> Agε, <Abirabε aka aba ri imaata, atɔ itser iyi ukara unying ukpekũ, nu ungo ufai umbɔ uku kpengkpeng nggu umen iki ihwa uver itɔ itser ru imani unuma.>

<sup>13</sup> <<Bɔr unga agɔr unyinga umbɔ agε, <A uwee, umum isi ighamum urha ungo. Umen isi ikpangmem umum ifai ungo ishaa imang?

<sup>14</sup> Uyēi imangngo uzĩɔ. Umum ibee ifai abika aba imaata uku kpengkpeng nggu ungo.

<sup>15</sup> Use ishimum ri ijee iyiki ikorhu ubinkpi umum iki ibee nggu imangmum? Use ungo ugũ unyẽẽ umum iki idzise izũwã akarhãrhã?>

<sup>16</sup> <<Rimi hã amaataka aka awe anggbaashia, nu anggbaashia awe amaataka.>>

*Ikei Uyesu arherha arherhe  
ra akpenga*

*(Umar 10.32-34; Irh 18.31-34)*

<sup>17</sup> Uyesu nu angwē imesanga aka azērhã azĩ ufã Urusharhima. Unga agbiira umbɔ azĩ ri ifena ikiyikambɔ, agɔr umbɔ agε,

<sup>18</sup> <<Umen izĩ ifũrhũwe Urusharhima. Awuri ighadak Ungwē-Ner adzowe unga ru ubok ateiya abika adzowe idem-Num nu abika amesuwe Ikpem. Umbɔ awuri itsu unga ufai akpe.

<sup>19</sup> Mɔcε umbɔ aka idzowe unga ra atsen abi Uyahuda. Umbɔ ayēia unga, akũ asharhe akwεr unga, anyapuwe unga. Ru unum untaar unga awuri isoka ra akpe.>>

*Ifen iyi uyambɔ Uyaku nu Uyohana  
(Umar 10.35-45)*

<sup>20</sup> Mɔcɛ uya angwɛ Uzabadi aba ru Uyesu nggu angwɛnga, atararhu ra anangnga na afɛnu ubin ukpɔɔ.

<sup>21</sup> Unga arhusa unga agɛ, <<Ungo ubee use? >> Unga agɛ, <<Utsu awɛkaci abɛɛ ikivarhambɔ aseɪ, unying ru ubok ughango, uwu uvaa nu ubok uferango ri Iyɛrhango.>>

<sup>22</sup> Bɔr Uyesu agɔr umbɔ agɛ, <<Umbi asi ihwɛngmbi ubinkpi umbi aka afɛna. Umbi adɛɛ ahwambi ru ukpɛwa ha uwu ayetnumkɛ umum iki ihwa?>>

Umbɔ agɔr unga agɛ, <<Umɛn imɛmɛn.>>

<sup>23</sup> Uyesu agɔr umbɔ agɛ, <<Idzidzɛrhe umbi awuri ahwambi ru ukpɛwamum, bɔr isei ru ubok ugha nu ubok uferamum asi iwea umum itsũ idzowe. Anang hã awe aki abi Utɛmum ra afã aka agbishuwe.>>

<sup>24</sup> Ivang angwɛ imesa abɔrɔ usɔka aka agũ, umbɔ agũ avɔm abɔrɔ ha ikivarhambɔ.

<sup>25</sup> Bɔr Uyesu ayisa umbɔ ananga unying na agɛ, <<Umbi ahwɛngmbi ayɛrha atsen abi Uyahuda aki isaka adɛyiwe iyɛrhe ri itsi anermɔ, angg-baashimbɔ adɛyiwe umbɔ ijee.

<sup>26</sup> Bɔr isi íwengge rimi ru umbi. Ubɛn uwuku ubee igɔng ru umbi awu ufang unga awu ugãrhãmbi.

<sup>27</sup> Nu uwuruwi aka abee iwu unggbaashi ru umbi, awu ufang unga awu ugãrhãmbi.

<sup>28</sup> Ru nyaku Ungwɛ-Ner asi ibanga umbɔ atɔwe unga itser, bɔr unga awuri iwu ugãrhã, na adzowe urhɛnga afɔrh anera arhɛrhe.>>

*Abi ibvuta avaa akpombɔ  
inyã anang*

*(Umar 10.46-52; Irh 18.35-43)*

<sup>29</sup> Uyesu nu angwẽ imesanga aka abɔre Ujeriko, nggaa ikikɔng anera adɔsa unga.

<sup>30</sup> Abi ibvuta avaa aka aseɪ nu ubang utsĩndĩã. Ivangye umbɔ aka agũ uge Uyesu unga atɔng, umbɔ atsarhi irhakmbɔ age, <<A Uteijee, Ungwẽ Udauda! Ugũ atorh umen!>>

<sup>31</sup> Ikikɔnga itsɛrha umbɔ uge umbɔ anukutata, bɔr umbɔ atoma atsarhi irhakmbɔ age, <<A Uteijee, Ungwẽ Udauda! Ugũ atorh umen!>>

<sup>32</sup> Uyesu adẽẽ na ayisa umbɔ age, <<Umbi abee umum ikorhuwa umbi use?>>

<sup>33</sup> Umbɔ agɔr unga age, <<A Uteijee, umen ibee inyã anang.>>

<sup>34</sup> Uyesu agũ atorh umbɔ na abanga asumɔ. Kanying umbɔ anyã ananga na adɔsa unga.

## 21

*Itsitsĩ iyi ininang*

*(Umar 11.1-11; Irh 19.28-40; Uyoh 12.12-19)*

<sup>1</sup> Umbɔ aka akhapa ru Urusharhima aba atsĩ Ubetafaji nú Igũ Acucii Uzaitun. Uyesu adene angwẽ imesanga avaa,

<sup>2</sup> agɔr umbɔ age, <<Àka atsĩ ru uteu uku uci ha ra asumbi, utem itsitsĩmbi, umbi awuri inyãmbi uzihika umbɔ aka abow nggu ungwẽmbɔ. Àka agarha ake akũwã ru umum.

<sup>3</sup> Unera aba arhusunga umbi, àka adɛyiwe unga age, <Uteijee unga abee ake,> awuri idzaanga ake kanying.>>

<sup>4</sup> Akεε akorhe rimi ngge itsuifer ubinkpi uner uwuku usəm Arherhu-Num aka arherhe agε,

<sup>5</sup> <<Àka asəme aner Urusharhima,

<Àka anyā, uyerhambi uwi aba ru umbi!

Unga adəər, awu idzui uzhika,

nú undzing ungwē uzhika.> >>\*

<sup>6</sup> Angwē imesa ha azĩ akorhe ru nyaka Uyesu aka agər umbə.

<sup>7</sup> Umbə akũ uzhika ha nggu ungwēmgbə aba, abεtuwe atorhambə nú ungwēē, Uyesu afũ aseī.

<sup>8</sup> Anera arherhe aka abεtuwe atorhambə nú utsĩndĩā, abəə agbeyi abok acucii abεtuwe nú utsĩndĩā.

<sup>9</sup> Anera abika awu ra asunga nu abirabε aka adəsa unga ra andzing atsarhi irhakmbə agε,

<<Ikpikpoi iwe† nggu Ungwē Udauda!

Idorh iwe nggu uwuku uba ri itsok Uteijee!

Ikpikpoi iwe afafā ra afā!>>

<sup>10</sup> Ivangyε Uyesu aka atsĩ Urusharhima, utepa kishoo udzunukpə nu urhusa ugε, <<Awu ungamə nuwi?>>

<sup>11</sup> Anera agε, <<Uwεε awu Uyesu uwuku usəm Arherhu-Num aka adzeku Unazarat ukpu Ugarhirhi.>>

### *Uyesu asare Iya-Num*

*(Umar 11.15-19; Irh 19.45-48; Uyoh 2.13-22)*

<sup>12</sup> Uyesu atsĩ ri Iya-Num awayiwe kishoo abika agoyiwe nu abika agugoyi umə. Ayii atebur iyi abika afaru uhwεk akwεr atsĩme, nu atebur abika agoyiwe anurhεu iya.

\* **21:5** Àka anyā ikei: Uzak 9.9. † **21:9** Àka anyā ikei: Amb 118.26.

13 Agər umbə agɛ, <<Itsɛng Arherhu-Num igər igɛ, <Awuri iyisi iyamum iwu iya ifɛn-Num,>‡ bər umbi adzipa ake iwe anang awoi avɛu.§>>

14 Abi ibvuta nu akatarhu aba ru unga ri Iya-Num, unga akerhuwe umbə.

15 Bər ivang ateiya abika adzowe idɛm-Num nu abika amesuwe Ikpem anyā abin idzeukɛ unga aka akorhe, na anyā awɛkaci atsui ivum ri Iya-Num agɛ, <<Ikpikpoi iwe nggu Ungwɛ Udauda,>> umə umbə agū avəm.

16 Agər unga agɛ, <<Ungo ugūo ubin awɛkaci abɛɛ aka adɛɛ arherhe?>>

Uyesu agər umbə agɛ, <<Ĩĩ, umbi anasi ivarhumbi ri itsɛng Arherhu-Num iki igər ugɛ, << <Awu ungo umesuwe angwɛrhā awɛkaci nu írheng awɛkaci umbə akpoi ungo?>\*>>

17 Məcə unga abvui azĩã Ubetani, anangkɛ unga aka arha nu untsuua ha.

### ***Ikponum ucucii uvorhvo***

***(Umar 11.12-14,20-24)***

18 Ri igōkpeeka, unga awu ru utsĩndĩ uwuku ubvui uba utepa, imerh ifɛr unga.

19 Unga aka anyā ucucii uvorhvo nu ibang utsĩndĩã, unga azĩ ru ucucii ha asi ikpoa ubin akpurha anyā ayerhe. Məcə unga agər ucucii ha agɛ, <<Ungo usi íbvui ughwɛrə ikpŭrhā!>> Kanying ucuciia ha ukoyimgbə.

‡ 21:13 Àka anyā ikei: Uish 56.7. § 21:13 Àka anyā ikei: Uiri 7.11.

\* 21:16 Àka anyā ikei: Amb 8.2.

<sup>20</sup> Ivang angwẽ imesanga aka anyã rimi, umbɔ adzeidzeu akarhãrhã. Age, <<Awu use utsu ucuciia ha udiki ikoyi iki ifefetem?>>

<sup>21</sup> Uyesu agɔr umbɔ age, <<Umun indɛyiwa umbi idzidzerhe, umbi aba awembi ri imangmang na asi icangmbi, umbi adẽẽ akorha anangmbi ubinkpi umum iki ikorhuwe ucucii uvorhvo uwurɛ. Uko umbi adẽẽ agɔrmbi uko igũ iyɛɛ age, <Ugɔrhũ itsingo utsĩ ru ukau ukugɔng,> ngge iwuri ikorhungge.

<sup>22</sup> Umbi aba awembi ri imangmang, ubɛn ubina umbi aka ifɛna ri ifɛn-Num, umbi awuri ikpombi.>>

### *Arhusu ijee Uyesu*

*(Umar 11.27-33; Irh 20.1-8)*

<sup>23</sup> Uyesu aka atsĩ ru ufɔm Iya-Num na adẽẽ imesuwe, mɔɛɛ ateiya abika adzowe idɛm-Num nu akakũ anera aba ru unga. Arhusa unga age, <<Ungo ukũ ijee iyikisong ukorha abin akɛɛ? Ungaa adzaa ungo ijee ha?>>

<sup>24</sup> Uyesu agɔr umbɔ age, <<Umun irhusa umbi ubina unying. Umbi aba adɛyiwambi umum, umum idɛyiwamum umbi ijee iyikisong umum iki ikũ ikorha abin hã.

<sup>25</sup> Ubɔtisima Uyohana udzek ri inẽẽ umgbɔ? Udzek ra afã, use udzek ra anera?>>

Umbɔ arherhe nggu adɔka age, <<Umun iba igɔr ugɛ, <Udzek ra afã,> unga awuri irhusa umɛn age, <Awu use utsu umbi ashimbi ri imangmang ru unga?>

<sup>26</sup> Bɔr umɛn iba igɔr ugɛ, <Udzek ra anera,> umɛn igũ iwei anera abɛɛ, ubinkutsu, umbɔ

anyangu Uyohana awu uner uwuku usəm Arherhu-Num.>>

<sup>27</sup> Nggee umbɔ agər Uyesu age, <<Umən isi ihwɛngmən.>>

Mɔcɛ unga agər umbɔ age, <<Umun igamum isi ídɛyiwamum umbi umum ikũ ijee iyikisong ikorha abin hã.

*Unyaka arherhe aki uner  
awɛkatsa avaa*

<sup>28</sup> <<Umbi anyã aguse? Unera nuwɔ awu ra awɛkaci avaa akatsa. Unga azĩ ru uwu ingg-baashia age, <A ungwɛmum, irherɛ uzĩ utɔĩtser ri icang inebi.>

<sup>29</sup> <<Ungwɛ hã age, <Umun isi ízĩmum,> bər unga abvui akaiferhkɔ ra amɛnnga na asok azĩã.

<sup>30</sup> <<Mɔcɛ utɛmbɔ azĩã ru uwu uvaa, arherhe rimi hã. Ungwɛ hã age, <Ĩĩ, umum izĩmum,> bər asi izĩã.

<sup>31</sup> <<Uwukusong akorhu ubinkpi utɛmbɔ aka abee?>>

Umbɔ age, <<Uwu inggbaashia.>>

Uyesu agər umbɔ age, <<Umun indɛyiwa umbi idzidzerhe, abika iyɛi ikirbi abĩ nu anggoyi awuri igbaashia atsĩmbɔ ri Iyɛrhe afã ru umbi.

<sup>32</sup> Ubinkutsu, Uyohana aba adɛyiwa umbi utsĩndĩ uwuku urhurhika, umbi ashimbi ri imangmang ru unga, bər abika ayɛi ikirbi abĩ nu anggoyi awembɔ ri imangmang ru unga. Umbi uko umbi aka anyã akɛɛ, asi idzipumbi na iwembi ri imangmang ru unga.

*Unyaka arherhe abi irham imang  
(Umar 12.1-12; Irh 20.9-19)*

<sup>33</sup> <<Àka akpeto ru unyaka arherhe akɔɔ. Unera nuwɔ akau icang inebe. Adzin ufɔm adzipu icanga, asim ughwee ri ifa ukpuku upayi amɛ inebe ha ri ngge, na atar akang utsurha udedetamgbɔ uwu idzɛu. Adzowe icanga ra abi irham imang, na azĩã uzẽrhã.

<sup>34</sup> Ivang iyiki igbigbɛr iki iwe, unga adene agãrhãnga umbɔ azĩmbɔ ra abi irham imang hã ayeise ikpũrhã icangnga.

<sup>35</sup> <<Abi irham imang hã adzur agãrhũ utsak ha akwɛr unying, na afɛre unying, na atang atarh ru uwu untaar.

<sup>36</sup> Mɔcɛ unga abvui adene agãrhã abɔɔ ru umbɔ aka anangmbɔ abi inggbaashia. Bɔr abi irham imang hã akorhe ru nyaka umbɔ aka akorhe nggu abi inggbaashia.

<sup>37</sup> Ri imimasha kishoo, unga adene ungwẽnga, agɛ, <Awuri idzowukumbɔ imor ru ungwẽmum.>

<sup>38</sup> <<Bɔr abi irham imang hã aka anyã ungwẽ hã, umbɔ agɔr adɔkambɔ agɛ, <Uwɛɛ unga awu ru ukam icang hã. Umɛn ifɛre unga ni icanga iwu iyimɛn!>

<sup>39</sup> Nggee umbɔ adzur unga, atare unga ru undzing ufɔm icang hã, afɛre unga.

<sup>40</sup> <<Nggee, ivang uner icang hã aba abanga, unga awuri ikorha aguse nggu abi irham imang hã?>>

<sup>41</sup> Umbɔ agɔr unga agɛ, <<Awuri ifɛruka abika abewa ha, na adzowe icanga ra abi irham imang abɔɔ, abirabɛ aka awuri idzowe ugau ikpũrhã icangnga ri ivangngge.>>

<sup>42</sup> Uyesu agɔr umbɔ agɛ, <<Umbi anasi ivarhumbi ri itsɛng Arherhu-Num? Igɔr ugɛ,

<< <Utarhkpi abi idzin aka akpē,  
ukpō uwu utarh āgboki idzina.

Akēε awu ubinkpi Uteijee aka akorhe,  
na awu ubin idzeu ra asumēn.>

<sup>43</sup> <<Nggee umum idēyiwa umbi, awuri ivurmbō  
Iyerhe Unum ru umbi na adzowe abika aghwer  
ikpūrhā iyi Iyerhe Unum.

<sup>44</sup> Uner ha aka igba ni itsi utarh iyerε, akpurha  
ashaka. Nu uwuruwi utarh ha uku igba nū unga,  
ukpurhu ugōke unga.>>

<sup>45</sup> Ivang ateiya abika adzowe idēm-Num nu abi  
Ufarisi aka agū unyaka arherhe Uyesu aka ad-  
zowe, umbō ahwēngmbō ugε arherhe ri itsimbō.

<sup>46</sup> Umbō abee udī ukpuku udzur unga, bōr umbō  
agū iwei, ubinkutsu, ikikōng anera anyanga unga  
awu uner uwuku usōm Arherhu-Num.

## 22

### *Unyaka arherhe aki irhowu ipfuna (Irh 14.15-24)*

<sup>1</sup> Uyesu abvui arherhuwe umbō unyaka  
arherhe agε,

<sup>2</sup> <<Iyerhe afā iwu ru nyaku uyerhe uwōō aka  
akorhuwe irhowa ipfuna ru ungwēnga.

<sup>3</sup> Adene agārḥānga azī ayisuwe abirabε umbō  
aka aghwi umbō ipfuna hā aba, bōr umbō akpēmbō  
ibibanga.

<sup>4</sup> <<Mōce unga abvui adene agārḥā abika arhεε  
agε, <Àka adēyiwe abirabε umbō aka aghwi ugε  
umum iki ikorhumum ubinghaa. Iki ingwā ínàk  
iyiki itsak nggu angwē inak aka agōnga, abina  
kishoo iki igbisha imaamum. Àka aba irhowa ha!  
>

<sup>5</sup> <<Bɔr umbɔ asi inyãmbɔ ngge iwengge ifɛrhɛ, na azĩmbɔ. Uwɔɔ azĩã usinga, uwɔɔ azĩã igoyi igoi ri izɛɛ.

<sup>6</sup> Abɔɔ adzur agãrhãnga, ayɔm na afere umbɔ.

<sup>7</sup> Uyerhe ha agũ avɔm. Unga adene abi iwanga, umbɔ afɛrkumbɔ umbɔ abika afeyi aner ha na akpĩwe uteumbɔ kishoo.

<sup>8</sup> <<Mɔcɛ unga agɔr agãrhãnga age, <Aka amaambɔ izek irhowa ha, bɔr abirabɛ umum iki ighwi isi imɛngge umbɔ aba.

<sup>9</sup> Àka adzek adɔsa atsĩndĩ aka agbopa ayisa kishoo abirabɛ umbi aka akpo, umbɔ aba irhowa ha.>

<sup>10</sup> Nggee agãrhã hã adzek adɔsa atsĩndĩã ayisa kishoo abirabɛ umbɔ aka akpo, abika aze nu abika abewe, anang irhowa ha atɔk nggu atsen.

<sup>11</sup> <<Bɔr ivangye uyerhe aka atsĩ abee inyã abi irhowa ha, umɔ unga anyã uner uwɔɔ aka asi itsima atorho irhowa.

<sup>12</sup> Uyerhe arhusu uner ha age, <A uwee, ungo ukorhu uguse nu utsĩwã nggimi ushiɔ ra atorho irhowa?> Bɔr uner ha asi idzipunga urhɛm.

<sup>13</sup> <<Mɔcɛ uyerhe agɔr abi itsernga age, <Àka abow aboknga nu adaknga, na atare unga adzek atsĩ ru uzĩ, anangke anera aka iciu akpe na atãi anyĩ.>

<sup>14</sup> <<Ubinkutsu awuri ighwi anera arherhe, bɔr ukunjiir umbɔ aka isɛng.>>

*Irhusu ifai ikirbi abĩ ru Ukaisar*

*(Umar 12.13-17; Irh 20.20-26)*

<sup>15</sup> Mɔcɛ abi Ufarisi adzek akɛki itsũwãye umbɔ aka ideya unga ru irhɛmnga.

16 Umbɔ adene angwẽ imesambɔ nggu aner Uhiridu age, <<A umarhem, umɛn ihwɛngmɛn ungo uwu uner idzidzɛrhe, ikɛi ungo uni ime-suwe ubinkpi Unum aka abee nggu idzidzɛrhe. Ubinkutsu ungo usi itsukɔ amɛnnngo ri ifɛrhkɔ an-  
era use ubinkpi umbɔ aka awe.

17 Udeyiwa umɛn, imɛngge umɛn ifai ikirbi abĩ ru Ukaisar, use isi imɛngge?>>

18 Bɔr Uyesu ahwɛnga ifɛrhkɔ iyiki ibewambɔ, unga agɔr umbɔ age, <<Umbi abi ukpukpeta, awu use utsu umbi adeya umum?

19 Àka adeyiwa umum ishaa imangyɛ umbi iki ikũ afai ikirbi abĩ.>> Umbɔ akowe unga ishaa imang hã,

20 unga arhusa umbɔ age, <<Uzirhzĩ ukpi nu itsok ikɛɛ iwu iki ungaa?>>

21 Umbɔ age, <<Iki Ukaisar.>> Mɔcɛ unga agɔr umbɔ age, <<Àka adzowe Ukaisar abinkɛ aka awe aki Ukaisar, ikɛi àka adzowe Unum abinkɛ aka awe aki Unum.>>

22 Umbɔ aka agũ rimi, umbɔ adzeidzeu. Nggee umbɔ abɔre unga na azĩmbɔ.

### *Irhusa isisok ra akpe*

*(Umar 12.18-27; Irh 20.27-40)*

23 Ru unum hã abi Usaduki, abika agɔr ugɛ isok ra akpe ishingge, aba ru unga arhusa age,

24 <<A umarhem, Umusa agɔr age, <Unera aba akpe na ashia ra awɛkaci, awu ufang ungwẽmbɔ apfunu utserh ha amare awɛkaci ru unga.>

25 Umɔ abɔɔ rabɔ awu angwɛyi utɔɔva ru umɛn. Uwu inggbaashia apfuna na akpea, asi imara awɛkaci, abɔruka utserh ha ru ungwẽmbɔ.

26 Rimi hã iki iwe nggu ungwẽmbɔ uwu uvaa nu uwu untaar, uzĩ itsĩ ru uwu utɔɔva.

27 Ri imimasha utserh ha akpea.

28 Ru unumkpi abika akpe aka isok ra akpe, utserh ha awuri iwu uwu ungaa ru umbɔ utɔɔva ha? Ubinkutsu, kishookambɔ utɔɔva aka apfuna unga.>>

29 Uyesu agɔr umbɔ agɛ, <<Umbi agba irhak, ubinkutsu, umbi asi ihwɛngmbi itsɛng Arherhu-Num use ijee Unum.

30 Ri isok ra akpe anera asi ipfunumbɔ, asi idzowukumbɔ ipfuna. Anera awuri iwe ru nyaka ipfu itser-Num ra afã.

31 Bɔr arherhi isisok abika akpukpe, umbi anasi ivarhumbi ubinkpi Unum aka adɛyiwa umbi?

32 Unga agɔr agɛ, <Unum iwu Unum uwu Uibrahim, Unum uwu Uishaku, nu Unum uwu Uyakubu.>\* Unga asi iwea Unum uwu abika akpukpe bɔr awu Unum uwu abi urhɛ.>>

33 Ivangyɛ ikikɔnga iki igũ rimi, umbɔ adzeidzeu imesanga.

### *Ikpem iyiki igɔnga*

*(Umar 12.28-34; Irh 10.25-28)*

34 Abi Ufarisi aka agũ ugɛ Uyesu aka atsu abi Usaduki awu uku uvep, umbɔ akɔng.

35 Unying ru umbɔ uwuku uhwɛng Ikpem akarhãrhã, avira arhusa unga agɛ,

36 <<A umarhem, ikpem iyikisong iwu iyiki igɔnga ri Ikpem Umusa?>>>

---

\* 22:32 Àka anyã ikɛi: Idzi 3.6.

37 Uyesu agər unga agε, << <Ubemu Uteijee Unumngo nggu amεnngo kishoo nu ipfungo kishoo nu adzεnngo kishoo.>†

38 Ikpem iyεε ngge iwu iyi inggbaashia nu iyiki igɔnga.

39 Nu iyi uvaa iwu ru nyaki iyi unggbaashi ha igε, <Ubemu undɔkango ru nyaki itsikamngo.>‡

40 Kishoo Íkpem Umusa nu imesa abika asɔm Arherhu-Num iyurhi nú atsi íkpem iyεε ikivarhangge.>>

*Ukiristo awu ungwε ungaa?*

*(Umar 12.35-37; Irh 20.41-44)*

41 Ivangyε abi Ufarisi aka akɔng ananga unying, Uyesu arhusa umbɔ agε,

42 <<Iferhkɔ umbi iwu use ri itsi Ukiristo? Unga awu ungwε ungamɔ?>>

Umbɔ agε, <<Ungwε Udauda.>>

43 Unga agər umbɔ agε, <<Awu use utsu Udauda ri ijee Ipfu-Num ayisa unga agε, <Uteijee? Ubinkutsu, unga agε,

44 << <Uteijee agər Uteijeemum agε,  
<<Usei ru ubok ughamum,  
utseku umum iki itsu anggamtsakngo  
ru andaidakngo.>> >§

45 Udauda aba ayisu Ukiristo agε, <Uteijee,> awu use utsu Ukiristo awu ungwεnga?>>

46 Unera asi idēē adzipuka unga urhem. Udzur ru unum hã, asi ikpombɔ unera aka abvui arhusa unga arherhe.

† 22:37 Àka anyã ikei: Iva 6.5. ‡ 22:39 Àka anyã ikei: Urha 19.18.

§ 22:44 Àka anyã ikei: Amb 110.1.

## 23

*Ifakpe utɔɔva*

*(Umar 12.38-40; Irh 11.37-54; 20.45-47)*

<sup>1</sup> Mɔcɛ Uyesu agɔr ikikɔnga nu angwɛ imesanga agɛ,

<sup>2</sup> <<Abika imesuwe Ikpem nggu abi Ufarisi ase i nɔ anang isei Umusa.

<sup>3</sup> Nggee awu ufang umbi adɔsa umbɔ na akorhe ubɛn ubinkpi umbɔ aka amesuwa umbi. Bɔr àka aneke ikorhe abinkɛ umbɔ iki ikorhe. Umbɔ asi ikorhumbɔ abinkɛ umbɔ iki imesuwe.

<sup>4</sup> Umbɔ aka isaka abow abin aka amor atsake nɔ acɛi anera, bɔr umbɔ nibikambɔ asi ikũ itokmbɔ ayikukumbɔ umbɔ.

<sup>5</sup> <<Ubɛn ubinkpi umbɔ aka ikorhe abee anera anyã. Abinkɛ umbɔ aka aboyi nɔ ashimbɔ nu abokmbɔ awe aki Arherhu-Num, unyã umbɔ aka akorha ake agɔgɔng. Nu arhurhukɛ umbɔ aka asɔr ri ifɛn atorhambɔ, atsu ake adeder.

<sup>6</sup> Umbɔ abee anang isei akagɔng ri irhowa nu ra abã ifɛn-Num.

<sup>7</sup> Na agɔm anera aghwe umbɔ ri inang izɛɛ, na agɔm umbɔ ayisa umbɔ agɛ, <Amarhem.>

<sup>8</sup> <<Bɔr umbi, awu ufang umbɔ asi íyisumbɔ umbi <Amarhem,> ubinkutsu, umbi awu ru uwuku umesuwe unying, umbi awu angwɛyi.

<sup>9</sup> Àka niba ayisumbi unera ra abĩ agɛ, <Utɛ,> ubinkutsu, umbi awu ru Utɛ unying, unga awu ra afã.

<sup>10</sup> Use ayisa umbi agɛ, <Uwuku umesuwe,> ubinkutsu, umbi awu ru uwuku umesuwa umbi unying, Ukiristo ha.

11 Uwuruwi aka awu ukugōnga ru umbi, awu ufang unga awu ugārḥāmbi.

12 Uben unerwi aka aberi itsinga, awuri irḥerhuwe ike. Bər uwuruwi aka arḥerhuwe itsinga, awuri ibiberuwe ike.

13 <<Atorhmbi, abika amesuwe Ikpem nu abi Ufarisi, abi ukpukpeta! Umbi afōmukumbi angwī aka atsī ru Iyerhe afā ra asu anera. Umbi nibikambi asi itsīmbi, na akenmbi abika abee itsitsī.\*

15 <<Atorhmbi, abika amesuwe Ikpem nu abi Ufarisi, abi ukpukpeta! Umbi aka isaka azērḥā ra akau akagōng nū abī azīmbi ibee uner uwuku udzipa unying. Ivangye umbi aka ikpo unying, umbi atsu unga ada idiki ivaa ananga umbi aka awe abi idzūū urha.

16 <<Atorhmbi, abi ibvuta abika adarḥ anera! Umbi iki igər age, <Uben uwuku uyirh Iya-Num, asi iwea iferḥe. Bər uben uwuku uyirh nggu uzi-narhi ukpu Iya-Num, awu ufang unga iki ikorhu ubinkpi unga aka ayirh.>

17 Umbi agugge abi ibvuta! Ukpuku usong unang, uzinarhi use Iya-Num iki isare uzinarhi hā?

18 Ikēi umbi aki igər age, <Uben uwuku uyirh nggu ubeu Iya-Num, asi iwea iferḥe. Bər uben uwuku uyirh nggu izūwāye umbō aka angwē nū ubeu ha, awu ufang unga akorhu ubinkpi unga aka ayirh.>

---

\* **23:13** Abvur akō aki itseng abok aki isha agərke ikēi uge, 14 *Atorhmbi, abika amesuwe Ikpem nu abi Ufarisi, umbi abi ukpukpeta! Umbi aka isaka abvur abin atsērḥāpfu, ikēi umbi agōm ifen-Num iyiki ider ra anera anyā uge umbi awu abika aze. Unum awuri itsuka umbi uvau akarḥārḥā.*

19 Umbi abi ibvuta! Uwukusong anang, izũwã, use ubeu uwuku utsu izũwã isar?

20 Nggee, uwuku uyirh nggu ubeu ayirh nggu umgbɔ nu ubɛn ubin uku unu umɔ.

21 Nu unga uwuku uyirh nggu Iya-Num, ayirh nggu ike nu unga uwuruwi aka aseɪ umɔ.

22 Nu ubɛn uwuku uyirh afã, ayirh anang isei Unum nu uwuku usei nú ake.

23 <<Atorhmbi, abika amesuwe Ikpem Umusa nu abi Ufarisi, abi ukpukpeta! Umbi aka isaka adzowe izũwã abin akaci, ru nyaka ayerhu udzau akaci. Na akwɛɛrkumbi abin aka amora ri Íkpem Umusa, ru nyaki izharha arherhe idzidzerhe, atorh, nu imangmang. Imẽẽngge umbi akorha abina akɛɛ na asi ikwɛɛrkumbi akɔɔ.

24 Umbi abika adarh anera ri ibvuta, umbi aki isaka asekm̃bi amurhu, bɔr angurhũmbi arhakumi!

25 <<Atorhmbi, abika amesuwe Ikpem nu abi Ufarisi, abi ukpukpeta! Umbi aka isaka asorhe andzing akpɛwa nu atɛrhãzɔu. Bɔr ru unɔrkang atɔk nggu abinkɛ umbi aka akpo ri inggang nu ibemitsi.

26 Ungo uner ibvuta, Ufarisi! Ugbaashia usorh unɔrkang ukpɛwa nu itɛrhãzɔu. Ungo uba uko-rhungo rimi, awiya awuri iwu atetɛn.

27 <<Atorhmbi, abika amesuwe Ikpem nu abi Ufarisi, abi ukpukpeta! Umbi awe ru nyaka adzake umbɔ iki itsu abĩ aka aterha, aka aze izɛrhe ra awiya, bɔr ru unɔrkang atɔk nggu apfupfu ikom anera nu ubɛn ikpũ arhim.

28 Rimi hã, anera aka isaka anyã umbi awu abika arhurhika ra awiya, bɔr ru unɔrkang umbi

awu abi ukpukpeta nu iki ibewe.

<sup>29</sup> <<Atorhmbi, abika amesuwe Ikpem nu abi Ufarisi, abi ukpukpeta! Umbi aka isaka adzin adzak aki abika asom Arherhu-Num na agberhe idzam adzak abika arhurhika.

<sup>30</sup> Nu umbi aka isaka agor age, <Age umen iwe ri ivang atokamen, umen iba isi itsimen ubok ri ifer abika asom Arherhu-Num.>

<sup>31</sup> Rimi ha umbi adekuwe atsimbi uge umbi awu angwe abika afer abika asom Arherhu-Num.

<sup>32</sup> Aka amasha amen aka atarha aki atokambi aka atirhi!

<sup>33</sup> <<Umbi ibvui! Umbi angwe ighwer! Umbi awuri ikorha aguse na adzek ru uvau idzu urha?

<sup>34</sup> Nggee umum idene abika asom Arherhu-Num nu abi itsoi nu abi imesa aba ru umbi. Aboo umbi awuri ifer na anyapuwe, aboo umbi awuri ikwer ra abā ifen-Nummbi na aken umbō atsirhi iteu.

<sup>35</sup> Nggee awuri itsuke adzirh abika arhurhika kishoo umbō aka afer ru upfung abvui aba ra atsimbi, udzur ra adzirh Uhabirha uner uwuku urhika uba utsi Uzakariya ungewe Uberikiya, uwuruwi umbi aka afer ra ateu Iya-Num nu ubeu idem-Num.

<sup>36</sup> Umum indēyiwa umbi idzidzerhe, kishoo akere awuri ikorhe nggu aner ivang iyere.

*Amēn Uyesu aghong ru Urusharhima*

*(Irh 13.34-35)*

<sup>37</sup> <<Oka Urusharhima, Urusharhima! Ungo ufer abika asom Arherhu-Num nu utang atarh ra abirabe umbō aka adene umbō aba ru umbi. Idiki isong umum iki ibee ikong angwembi ananga unying, ru nyaki inu iki isaki ikong angwengge ra afekngge, bor umbi akpēmbi.

<sup>38</sup> Unyã ucε, aneke iyambi arhanga.

<sup>39</sup> Umum idεyiwa umbi, umbi asi íbvui anyãmbi umum utseku umbi aka igər agε, <Idorh iwe nggu uwuku uba ri itsok Uteijee.> †>>

## 24

*Atsar aki imimasha upfung*  
(Umar 13.1-37; Irh 21.5-33)

<sup>1</sup> Uyesu aka adzek ri Iya-Num azērḥã azĩã, ri ivang ḥã angwē imesanga aba ru unga, adεyiwe unga ídzin Iya-Num.

<sup>2</sup> Unga agər umbɔ agε, <<Umbi anyãmbi abin akεε kishoo? Umum indεyiwa umbi idzidzerhe, utarh unying asi íneke ukpɔ utsorhukpɔ nú udɔka. Uben unying awuri isisipuwe.>>

<sup>3</sup> Uyesu aka asei ni Igũ Acucii Uzaitun, angwē imesanga ikiyikambɔ aba agər unga agε, <<Usɔma umɛn, iferhe ha iwu ri ivang iyiki isong? Awu use uwu utsar ibibango nu imimaa upfunga?>>

<sup>4</sup> Uyesu agər umbɔ agε, <<Àka arhi, utsur unera arḥɛma umbi.

<sup>5</sup> Anera arḥerhe awuri iba ri itsokmum, awuri igər agε, <Umun iwu Ukiristo,> awuri irḥem anera arḥerhe.

<sup>6</sup> Umbi awuri igũmbi isarhe iwa nu ugbugbewangge, bər niba agũmbi iwei. Awu ufang ikpũ abin ḥã akorhe, bər imimaa ina ishingge.

<sup>7</sup> Abĩ akɔɔ asok adēē ifuw nggu abĩ akɔɔ, iyerhe iso idēē ifuw nggu iyerhe iyɔɔ. Ukoi uwuri itsu imerh ri inanga irḥerhe. Nu upfunga uwuri izizusa ri inanga irḥerhe.

---

† 23:39 Àka anyã ikei: Amb 118.26.

<sup>8</sup> Kishoo akεε ha awu ititirhi uver imar.

<sup>9</sup> <<Mɔce umbɔ aka idzowe umbi umbɔ adzaa umbi uver na afere umbi. Abiã kishoo awuri ikpɛke umbi ri itsimum.

<sup>10</sup> Ri ivang hã anera arherhe imangmangmbɔ iwuri iwe uku ughεeng, umbɔ awuri ighadak na akpɛna adɔka.

<sup>11</sup> Abika asɔm Arherhu-Num igberangwĩ awuri idzeka na arhem anera arherhe.

<sup>12</sup> Ititoma iyiki ibewe iwuri itsu ibibema anera arherhe iwe uku ughεeng.

<sup>13</sup> Bɔr uwuku ubima utseku imimasha awuri ikpoa ififɔrh.

<sup>14</sup> Isarhe Iyiki Ize iyεε iyi Iyerhe, awuri idũwã ngge ru upfunga kishoo, ngge iwe ideka ra abiã kishoo, mɔce imimasha iba.

<sup>15</sup> <<Umbi aba anyãmbi ubin uku utãrhã uku udakuwe anang, ukpurukpi uner uwuku usɔm Arherhu-Num Udaniyerh aka arherhe, udẽẽkpɔ ri Iya-Num, neke uner uwuku uvarhe ahwεng.

<sup>16</sup> Mɔce abirabε aka awe ru Uyahudiya atĩ azĩ ri igũ.

<sup>17</sup> Uwuruwi aka awu afafã ni itsi uvi niba acipuwanga inyãngu ubin uku uwe ri iya.

<sup>18</sup> Uwuruwi aka awe ra arhum niba abvui abanga inyãngu untamanga.

<sup>19</sup> Atorhmbi akatsɛrh abika awu ra ana nu abika akpɔm awekaci ri ivang hã!

<sup>20</sup> Àka afen-Num utsur utser ha uwεkpɔ ri ivang ighεnga use unum ukpuku uwosha abi Uyahuda.

<sup>21</sup> Ubinkutsu, umbɔ awuri inyãmbɔ ayetnum akarhãrhã akirakε umbɔ aka anasi inyãmbɔ ake udzur ri imimunu upfunga uba utsĩ icεε. Asi íbvui anyãmbɔ akɔɔ aka anangke aki ha.

22 Age umbɔ asi izharhukũmbɔ inum hã uku ugbim, unera asi íbɛka, bɔr ri itsi abirabɛ umbɔ aka asɛng umbɔ awuri izharhukũmbɔ inum hã.

23 <<Ri ivang hã unera aba agɔra umbi age, <Àka anyã, Ukiristo uwi!> use <Nggawɔ nggɔɔ!> niba awembi ri imangmang.

24 Ubinkutsu akiristo igbɛrangwĩ nu abika asɔm Arherhu-Num igbɛrangwĩ awuri idzekambɔ, umbɔ awuri ikorhumbɔ atsar akagɔng nu abin idzeu arhɛm anera nu abirabɛ Unum aka asɛng, ngge iba iděɛ iwengge.

25 Àka anyã, umum iki idɛyiwamum umbi ngge idɔrhi iwe.

26 <<Nggee unera aba agɔra umbi age, <Unggawɔ ra arhum,> niba adzembi, use agɔr umbi age, <Ng-gawi ru ubã,> niba awembi ri imangmang.

27 Ubinkutsu, ibiba Ungwẽ-Ner iwuri iwe ru nyaki irhirhang iki irhange afã kishoo udiki igɔkpee izĩ itsĩ udiku urhɛɛ.

28 Anangke ukom uku uwe, anang hã amgbɛpɛ iki ikɔng.

29 <<Kanying inum ayetnum hã aki imaa,  
<< <ishaa unum iwuri iwu uzĩ,  
nu ufě usi írhangmgbɔ,  
nu idzɛr idzek afafã igba,  
nu umbɔ awuri izusa abin aka amor aka awu  
ra afã.>\*

30 <<Mɔcɛ utsar ukpu Ungwẽ-Ner uku idzeka afafã, nu idũa ru upfunga kishoo awuri ididɔng. Umbɔ awuri inyãmbɔ Ungwẽ-Ner aka iba ra amɛɛ nggu ijee nu ikpikpoi akarhãrhã.

---

\* 24:29 Àka anyã ikɛi: Uish 13.10; 34.4.

<sup>31</sup> Nu unga awuri idene ípfu itsernga nggu atsom aki irhak ayisa, na awuri íkɔng abirabɛ umbɔ aka aseng ra anggbokunga anaa, udiku igōkpee nu udiku urhɛɛ nu unɔr nu ufā, udzur ru ubandzin upfunga udiku ukpɛɛ uzĩ udiku ukpɔɔ.

<sup>32</sup> <<Àka amesu ubin ru ucucii uvorhvo, ivangyɛ aboka aka ipfum adzeka na aghwɛr ayerhe aka afa, umbi ahwɛng ugɛ idoi iki iyongge.

<sup>33</sup> Iwu rimi ikɛi, ivangyɛ umbi aka anyāmbi kishoo abin hā, umbi ahwɛng ugɛ ivanga iki iyongge, idēɛ ra angwĩā.

<sup>34</sup> Umum indɛyiwa umbi idzidzerhe, udan ukpirɛ usi ítɔngkpɔ utɛku ifɛrhɛ ha kishoo iki ikorhe.

<sup>35</sup> Afā nggu abĩ awuri ítɔngke, bɔr arherhamum asi ítɔngke.

<sup>36</sup> <<Unera asi ihwɛnga unum hā use ivang hā, ípfu itser-Num ra afā isi ihwɛngngge, Ungwē-Ner asi ihwɛnga, Utɛ ukpekũ unga ahwɛng.

<sup>37</sup> Ru nyaku inum Unuhu iki iwe, ngge iwuri iwe rimi ri ibiba Ungwē-Ner.

<sup>38</sup> Ri inumyɛ amē isok upfung aka awe, anera agha na ahwa, apfuna na adzise ipfuna, utɛku unumkpi Unuhu aka atsĩ ru ukhukhɔɔ amē.

<sup>39</sup> Umbɔ asi ihwɛngmbɔ utɛku amē aka aba akarha umbɔ. Ngge iwuri iwe rimi hā ru unum ibiba Ungwē-Ner.

<sup>40</sup> Inera ivaa iwe ru usi, awuri inyānguwe unying na aneke unying.

<sup>41</sup> Akatsɛrh ivaa awuri idēɛ igɔ nu ukɔ igɔ urhɔnga, awuri inyānguwe unying na aneke unying.

<sup>42</sup> <<Nggee, àka adẽẽ adzεu, umbi asi ihwεngmbi awu unum ukusong Uteijee aka iba.

<sup>43</sup> Bɔr àka ahwεng uge uner iya aba ahwεnga ivangyε uvεu aka iba ru untsuuka, unga awuri isei uku urhi asi íneke umbɔ atsĩ ayarmbɔ iyanga.

<sup>44</sup> Nggee umbi igambi awu ufang umbi adzεu, ubinkutsu, Ungwẽ-Ner awuri iba ri ivangyε umbi aka asi ikaimbi ifεrhkɔ.

*Ugãrhã uwuku urhika  
nu uwuku uda irhirhika  
(Irh 12.41-48)*

<sup>45</sup> <<Ungamɔ ucε, awu ugãrhã uwuku urhurhika nu uwu itsoi, uwuruwi uteiyanga aka atsu unga idzεu agãrhã iyanga, unga adzise ubinghambɔ uku kpengkpeng ri ivangngge?

<sup>46</sup> Anggɔm awe aki ugãrhã hã uteiyanga aka iba anyã unga adẽẽ itsernga rimi hã.

<sup>47</sup> Umum indɛyiwa umbi idzidzεrhe, awuri it-suke ugãrhã hã arhise abinnga kishoo.

<sup>48</sup> Bɔr ugãrhã hã aba awu uku ubewe, unga awuri igɔr itsinga agε, <Uteiya asi íbanga ifetem.>

<sup>49</sup> Mɔcε unga atirhi ikwεr agãrhã abɔrɔ, unga agha na ahwa nggu abi afĩrhã.

<sup>50</sup> Uteiya ugãrhã hã aba ru unumkpi unga aka asi itsara. Ri ivangyε unga aka asi ihwεngnga.

<sup>51</sup> Uteiya awuri ikwεr unga iyiki ibewe na ag-bange unga nggu abi ukpukpeta, umɔ umbɔ aka iciu na atãi anyĩmbɔ.

## 25

*Unyaka arherhe aki  
anakagbĩrhĩ usɔka aka anasi*

*ihwɛngmbɔ ukutsak*

<sup>1</sup> <<Mɔcɛ Iyerhe afã iwuri iwe ru nyaka anakagbĩrhĩ usɔka aka anasi ihwɛngmbɔ ukutsak anyangu írhirhangmbɔ azĩ igbangu utsak uku ufa.

<sup>2</sup> Atɔɔ ru umbɔ awu agugge nu atɔɔ awu abi itsoi.

<sup>3</sup> Agugge ha anyangu írhirhangmbɔ bɔr asi inyangumbɔ atsei.

<sup>4</sup> Abi itsoi ha igambɔ anyangu írhirhangmbɔ nggu atsei ra andzoma.

<sup>5</sup> Utsak uku ufa ha asi ibanga ifitem, kishoo agbɛu na arhambɔ urhɔ.

<sup>6</sup> <<Ri ikɔtsuuka umbɔ agũ urhɛm ukerketakpɔ uku ugɔr ugɛ, <Utsak uku ufa ha uwi aka abanga! Àka aba agbanga unga!>

<sup>7</sup> <<Mɔcɛ anakagbĩrhĩ usɔka ha asok agbishi írhirhangmbɔ.

<sup>8</sup> Agugge ha agɔr abi itsoi ha agɛ, <Àka ama adzaa atseimbi ukunjiir, írhirhangmɛn iki iwuri irhim.>

<sup>9</sup> <<Abi itsoi ha agɛ, <Ĩĩ, asi ímɛke umɛn nggu umbi. Ugba umbi azĩ ru abika agoyiwe atsei agoi akimbi.>

<sup>10</sup> <<Bɔr ivangyɛ umbɔ aka adzek azĩ igoi atsei ha, utsak uku ufa ha atsĩwãnga. Anakagbĩrhĩ aka agbisha abinmbɔ atsĩmbɔ irhowa nggu unga na afɔmukumbɔ angwĩ ubãã.

<sup>11</sup> <<Kata abɔrɔ adɔrha aba agɛ, <A uteiya! A uteiya! Uma utsuruwa angwĩ ubãã!>

<sup>12</sup> <<Bɔr unga agɛ, <Umun indɛyiwa umbi idzidzerhe, umun isi ihwɛng umbi.>

<sup>13</sup> <<Nggee, àka adɛɛ adzɛu, umbi asi ihwɛngmbi unuma use ivanga.

*Unyaka arherhe agārḥā ataar  
(Irḥ 19.11-27)*

<sup>14</sup> <<Ikēi, Iyērha afā iwuri iwe ru nyaku unera aka izī uzārḥā, na ayisa agārḥānga agashuwe umbō uhwek.

<sup>15</sup> Utsa ha ahwēnga ubinkpi agārḥānga aki idēē akorhe, nggee unga adzowe unying ibei uazurhfa itōō, uwu uvaa ikēi ibei uazurhfa ivaa, uwu untaar ibei uazurhfa unying. Mōce unga azīā uzērḥānga.

<sup>16</sup> Utsa ha aka ayēi ibei uazurhfa itōō ḥā kanying kanying unga akū azī agoyi igoi adzipa nggu uhwek ha, akpo ighigha ibei uazurhfa itōō.

<sup>17</sup> Nggee ikēi, uwu ibei uazurhfa ivaa ha, akpo ighigha ibei uazurhfa ivaa.

<sup>18</sup> Bōr uwu ha aka ayēi ibei uazurhfa unying ḥā azī asim abī awōkuka uhwek uteiyanga.

<sup>19</sup> <<Ivanga iki iderngge, uteiya agārḥā ḥā aba ayisa agārḥānga umbō avarhuwe ubinkpi umbō aka akorhe.

<sup>20</sup> Uner uwuku uyēi ibei uazurhfa itōō akū ibei uazurhfa itōō aba agē, <A Uteiya, ungo udzaa umum ibei uazurhfa itōō. Unyā, umum ikpo ighigha ibei uazurhfa itōō itoma.>

<sup>21</sup> <<Uteiyanga agē, <Ungo udēē, ugārḥā uwuku uze uwu idzidzerhe! Ungo uweō ri idzidzerhe ru ubin uku uci. Umum indzaamum ijee iyiki ikpōm abina arherhe. Uba ugōmanggōm nggu uteiyango.>

<sup>22</sup> <<Uner uwuku uyēi ibei uazurhfa ivaa ha ikēi aba agē, <A Uteiya, Ungo udzaa umum ibei uazurhfa ivaa. Unyā nggayē umum ikpo ighigha ibei uazurhfa ivaa itoma.>

23 <<Uteiyanga age, <Ungo udēē ugārḥā uwuku uze uwu idzidzerhe! Ungo uweo ri idzidzerhe nggu ubin uku uci. Umum indzaamum ijee iyiki ikpōm abina arherhe. Uba ugōmanggōm nggu uteiyango!>

24 <<Mōce uner uwuku uyei ibei uazurhfa unying ḥā aba age, <A Uteiya, umum ihweng amēnngo aghong iferhe. Ungo udēē ugbugberō ra anangke ungo uku usi idoso. Ungo udēē urhōingo ra anangke ungo uku usi ināngo ikpū.

25 Nggee umum igū iwei izī iwōke ibei uazurhfango ra abī. Unyā ibei uazurhfango iye.>

26 <<Uteiyanga age, <Ungo ugārḥū uwuku ubewe, ugherha! Ungo uhwengo umum iki isaki īgbetū ra anangke umum iki isi idoimum ni irhōimum ra anangke umum iki isi ināmum ikpū.

27 Azea mōce, uge ungo uba utsuke uhweka ru ubanki. Ivangye umum iki ibvui iba, umum itsū ngge nggu ighigha!

28 << <Àka ayeise ibei uazurhfa unying ḥā ru unga, aka atomuwe ru uwōrō uwu ibei uazurhfa usōka.

29 Uwuruwi aka awe ru ihwihweng awuri itomuwe unga akpo arherhe. Uwuruwi aka ashia, awuri iyese ungwērḥī ihwihweng ha unga aka awerangge.

30 Na atare ugārḥā ibem ḥā ra awiya ru uzī uku ugburhuk. Umō umbō aki iciu akpe nggu itāi anyī.>

*Ídoi nggu íbũ*

31 <<Ivangye Ungwẽ-Ner aka iba ri ikpikpoinga nggu ípfu itsernga kishoo, unga awuri ísei nú anang ísei iyerhe aki ikpikpoi.

32 Awuri ikong abi upfung ukpirẽ kishoo ra anangnga, unga awuri igasha umbɔ awuwembɔ ru nyaku uner ughãwã aka igashi ídɔi nggu íbũ.

33 Unga awuri itsu ídɔi ru ubok ugha na atsu íbũ ru ubok uferanga.

34 <<Mɔce Uyerhe awuri igor abika awe ru ubok ughanga age, <Àka aba, umbi abi Utemum aka atsuka umbi idorh. Àka ayei ukamkpi Unum aka igbishuwa umbi udzur ri imimunu upfung.

35 Umum iki igũ imerh, umbi adzaa umum ubingha, umum iki igũ ugɔ amẽ, umbi adzaa umum ubin umum ihwa, iwu utsen, umbi ayei umum ra ayambi.

36 Umum ishimum ra atorho, umbi adzaa umum atorho, aghonga umum, umbi aneta umum, iwe ru ugborzĩ, umbi aba ayepa umum.>

37 <<Mɔce abika arhurhika awuri igor age, <A Uteijee, ukang umen iki inyã ungo ugũ imerh ni ïdzaa ungo ubingha, use ungo ugũ ugɔ amẽ, umen ïdzaa ungo ubin ungo uhwa?

38 Ukang umen iki inyã ungo uku uwu utsen ni iyei ungo, use ungo ushiɔ ra atorho, umen indzaa ungo atorho?

39 Ukang ungo uku ughong iyor use ungo uwe ru ugborzĩ umen izĩ iyepa ungo?>

40 <<Mɔce Uyerhe awuri igor umbɔ age, <Umum indɛyiwa umbi idzidzerhe, uben ubinkpi umbi aka akorhuwe unying ra angwẽmen use anapumen

abika asheru ugarh ru umbi, umbi akorhuwa umum.>

<sup>41</sup> <<Mɔcɛ unga awuri igər abərɔ ru ubok uferanga age, <Àka asombi ru umum umbi abi ikponum. Àka azĩ atsĩ ru urha ukpu ugbagbaa umbɔ aka ataiwe Undenggũ nggu ípfu itsernga.

<sup>42</sup> Umum iki igũ imerh, umbi asi idzaambi umum ubingha, umum iki igũ ugɔ amẽ, umbi asi idzaambi umum ubin umum ihwa.

<sup>43</sup> Iwu utsen, umbi asi iyɛi umum atsĩmbi ri iya, ishimum ra atorho umbi asi idzaambi atorho ru umum, aghonga umum, ikɛi umum iwe ru ugborzĩ, umbi asi iba ayepumbi umum.>

<sup>44</sup> <<Umbɔ ikɛi awuri igər age, <A Uteijee, ukang umɛn iki inyã ungo ugũ imerh use ugɔ amẽ use ungo uwu utsen use ungo ushiɔ ra atorho use aghonga ungo use ungo uwe ru ugborzĩ, umɛn isi iyikamɛn ungo?>

<sup>45</sup> <<Unga awuri igər age, <Uмум indɛyiwa umbi idzidzɛrhe, ubɛn ubinkpi umbi aka asi ikorhukumbi unying ra abɛrɛ aka asheru ugarh, umbi asi ikorhuwambi umum nukpɔ.>

<sup>46</sup> <<Mɔcɛ umbɔ awuri ikpo ayetnum aki ugbagbaa, bər abika arhurhika awuri ikpo urhɛ uwu ugbagbaa.>>

## 26

*Umbɔ akɛki ifɛrɛ Uyesu*

*(Umar 14.1-2; Irh 22.1-2; Uyoh 11.45-53)*

<sup>1</sup> Ivangyɛ Uyesu aka amaa irherha abina akɛrɛ ha kishoo, unga agər angwẽ imesanga age,

<sup>2</sup> <<Umbi ahwengmbi, Irhowa Iyiki Igar Utong ibor inuma ivaa, umə awuri idzowe Ungwē-Ner umbə anyapuwe unga.>>

<sup>3</sup> Məce ateiya abika adzowe idem-Num nu akakū anera akong ri iya Ukugong Uwuku Udzowe Idem-Num, itsoka igburh Ukayafa.

<sup>4</sup> Umbə avarhe idzur Uyesu ri iwək afere unga.

<sup>5</sup> Bər umbə age, <<Asi íwea ri ivang irhowa, utsur anera asoyimbə amən.>>

*Adzukuwe Uyesu atsei ru Ubetani*

*(Umar 14.3-9; Irh 7.37-38; Uyoh 12.1-8)*

<sup>6</sup> Ivangye Uyesu aka awe ru Ubetani ri iya Usiman uwuruwi ingbimnga iki ikerhe,

<sup>7</sup> utserh uwə abar ru Uyesu nggu undzoma utarh uku utək nggu atsei isung aki imang akarhārḥā. Unga awupuwe atsei ha ri itsinga ri ivangye unga aka asei nu anang ubingha.

<sup>8</sup> Ivang angwē imesanga aka anyā rimi, umbə agū avəm na arhusa adəkambə age, <<Akere awu inyar!

<sup>9</sup> Imēngge umbə agoshe atsei isung ḥā ru uhwek urherhe na adzowe atsūwā.>>

<sup>10</sup> Uyesu agər umbə age, <<Awu use utsu umbi ayəm utserh ha? Unga akorhuwa umum ubin uku uze.

<sup>11</sup> Atsūwā awu nggu umbi ubən ivang, bər umum isi íwemum nggu umbi ubən ivang.

<sup>12</sup> Atseike unga awupuwa umum, unga agbishuwa iyormum umbə aka idzake.

<sup>13</sup> Umum indəyiwa umbi idzidzerhe, kishoo anangkə umbə aka idzowe Isarhe Iyiki Ize iyere ru upfunga, umbə awuri isəmmbə ubinkpi utserh uwure aka akorhe ri ayita unga.>>

*Uyahuda abemuka ighadak Uyesu  
(Umar 14.10-11; Irh 22.3-6)*

<sup>14</sup> Məce unying ru umbə usəkdūməñ hã itsoknga igburh Uyahuda Uiskariyoti, azĩ ra ateiya abika adzowe idəm-Num,

<sup>15</sup> arhusa age, <<Umbi awuri idzaa umum use umum ĩba ĩdzaamum unga ru umbi?>> Nggee umbə avarhuwe unga íshaa imang uazurhfa isəka itaar.

<sup>16</sup> Udzur ri ivang hã Uyahuda abee udĩkpi unga aka ighadak Uyesu.

*Ubingha Uteijee  
(Umar 14.12-26; Irh 22.7-23; Uyoh 13.21-30;  
1Uko 11.23-26)*

<sup>17</sup> Ru unum inggbaashia ukpu Irhowu Uborodi ukpuku Usheru Uguga, angwē imesa aba ru Uyesu arhusa unga age, <<Ra anang akasong ungo uku ubee uməñ igbishuwa ungo ugha Irhowa Iyiki Igar Utəng?>>

<sup>18</sup> Unga age, <<Àka atsĩ ru utepa, àka azĩ ru utsa uwəə, àka agər unga age, <Umarhem age, ivang-mum iki iyongge. Umum igha Irhowa Iyiki Igar Utəng ri iyango nggu angwē imesamum.> >>

<sup>19</sup> Nggee angwē imesanga akorhu ubinkpi Uyesu aka agər umbə na akorhuwe ubingha Irhowa Iyiki Igar Utəng.

<sup>20</sup> Urhεε uku uwe, Uyesu aseı igha ubingha nggu angwē imesanga usəkdūməñ.

<sup>21</sup> Asei ighigha ha nukpi, unga age, <<Umum indεyiwa umbi idzidzerhe, unying ru umbi awuri ighaa adakmum.>>

<sup>22</sup> Amɛnmɔ aghong akarhãrhã na atirhi irhusa unga anyinganying agɛ, <<A Uteijee, awu umum?>>

<sup>23</sup> Uyesu agɛ, <<Uwuruwi aka atsĩ ubok ri itẽrhĩ nggu umum, unga awuri ighaa adakmum.

<sup>24</sup> Ungwẽ-Ner awuri ikpe ru nyaka umbɔ aka atseng ri itsinga. Bɔr atorh uner ha aka ighadak Ungwẽ-Ner! Ugba umbɔ asi imarmbɔ unga.>>

<sup>25</sup> Mɔcɛ Uyahuda, uwuruwi aka igha adaknga agɛ, <<A umarhem, awu umum?>>

Uyesu agɛ, <<Awu ungo urherhe.>>

<sup>26</sup> Umbɔ ana aseɪ ighigha ha, Uyesu anyangu uborodi, atar uwɛɛ na atsɔka ukpɔ. Adzowe angwẽ imesanga agɛ, <<Àka ayɛi, atãi. Uwɛɛ awu iyorum.>>

<sup>27</sup> Mɔcɛ unga anyangu ukpɛwa, atar uwɛɛ, na adzowe ru umbɔ, agɛ, <<Àka ahwa ru umgbɔ kishookambi.

<sup>28</sup> Akɛɛ awu adzirhmum aki ibibemuwe-Num, akirakɛ aka adzek awupa ra anera arherhɛ, atsũwe arhimmbɔ.

<sup>29</sup> Umum indɛyiwa umbi, umum isi íbvui ihwamum amẽ ikpũrhã inebi akɛɛ utsɛku unumkpi umum iki ihwa aka afa nggu umbi ri Iyɛrhe Utɛmum.>>

<sup>30</sup> Umbɔ aka amaa itsũwe ubom ru Unum, umbɔ adzek azĩmbɔ Igũ Acucii Uzaitun.

*Uyesu agɛ Ubitru awuri itsɛyinga  
ihwɛng unga*

*(Umar 14.27-31; Irh 22.31-34; Uyoh 13.36-38)*

<sup>31</sup> Mɔcɛ Uyesu agɔr umbɔ agɛ, <<Ru untsuu akpɪɛ umbi kishoo awuri itĩ ri itsi ubinkpi uku ikorhe nggu umum. Itsɛng Arherhu-Num igɔr igɛ,

<< <Umum iwuri ikwēr uner ughãwãã,  
nu ukpui ídɔi ha iwuri isita.>\*

<sup>32</sup> Bɔr ivangyε umum iki isok ra akpe, umum ingg-  
baashia izĩ Ugarhirhi ru umbi adɔrha atsĩ umɔ.>>

<sup>33</sup> Ubitru agε, <<Kishoo aba atĩmbɔ ri itsi ubinkpi  
uku ikorhe nggu ungo, umum isi ítĩmum.>>

<sup>34</sup> Uyesu agɔr unga agε, <<Umum indɛyiwa  
ungo idzidzεrhe, ru untsuu akpirε, ungo uwuri  
itsɛyingo ihwεng umum idiki itaar ri ikɔ idɔrhi  
igbεr ukpee.>>

<sup>35</sup> Ubitru agɔr unga agε, <<Uko umbɔ awuri ifere  
umum nggu ungo, umum isi ítɛyimum ihwεng  
ungo.>> Rimi hã angwẽ imesa abɔɔ kishoo aka  
arherhe.

### *Ru Ugetsemani*

*(Umar 14.32-42; Irh 22.39-46)*

<sup>36</sup> Mɔcε Uyesu nu angwẽ imesanga azĩmbɔ anang  
akɔɔ umbɔ iki iyisa Ugetsemani. Unga agɔr  
umbɔ agε, <<Àka aseì nggimi, umum izĩ ifɛn-Num  
nggɔɔ.>>

<sup>37</sup> Unga akũ nggu Ubitru nu angwẽ Uzabadi  
avaa, unga atirhunga igũ idamɛn nu ighongamɛn.

<sup>38</sup> Unga agɔr umbɔ agε, <<Igũ ighongyε iki iwe ra  
amɛnmum idɛɛ ifɛrngge umum. Àka aseì nggimi  
na adzεu nggu umum.>>

<sup>39</sup> Unga aka agɔpa azĩ ukunjiir unga agba akwēr  
anaanga atsim nú abĩ afɛn-Num agε, <<A Utɛmum,  
ngge iba imɛngge, ungo unyanguwe ukpɛwa ayet-  
num akεrε ru umum. Bɔr ukorhu ubinkpi ungo  
uku ubee, asi iwea ubinkpi umum iki ibee.>>

---

\* **26:31** Àka anyã ikɛi: Uzak 13.7.

<sup>40</sup> Mɔcɛ unga abvui aba ra angwẽ imesanga, akpo umbɔ aka arhambɔ urhɔ. Unga agɔr Ubitru agɛ, <<A Ubitru, umbi asi idẽẽ adzɛumbi nggu umum ukara unying?

<sup>41</sup> Àka adzɛu na afɛn-Num utsur umbi agbambi ru undeya. Idzidzɛrhe ipfu ibemungge, bɔr iyor isi ikerngɛ.>>

<sup>42</sup> Unga abvui azĩã ifɛn-Num idevaa agɛ, <<A Utɛmum, uba ayetnum akɛɛ asi ítɔngke utɛku umum iki ihwa ake, umum ikorhumum ubinkpi ungo uku ubee.>>

<sup>43</sup> Unga abvui aba akpo umbɔ ikɛi awe ru urhɔ, umbɔ asi idẽẽ ayangumbɔ asumbɔ.

<sup>44</sup> Nggee unga abɔre umbɔ na azĩã ifɛn-Num ide untaar, abvui arherhe ubinkpi unga aka arherhe ri inggbaashia.

<sup>45</sup> Mɔcɛ unga abvui aba ra angwẽ imesa ha agɔr umbɔ agɛ, <<Utɛku icɛɛ umbi ana awu ru urhɔ na adẽẽ iwosha? Àka anyã, ivanga iki iyongge umbɔ aka idzowe Ungwẽ-Ner ru abok abi arhim.

<sup>46</sup> Àka asisok umɛn izĩmɛn! Uwuku ugha adak-mum uwi aka abanga!>>

### *Adzur Uyesu*

*(Umar 14.43-50; Irh 22.47-53; Uyoh 18.3-12)*

<sup>47</sup> Unga ana awu ra arherhe, Uyahuda, unying ru umbɔ usɔkdũmɛn hã, aba atsĩ. Unga aba nggu anera arherhe aka akpɔm nggu akon aka ader nu ígbong. Ateiya abika adzowe idɛm-Num nu akakũ anera aka adene umbɔ.

<sup>48</sup> Umɔ uwuku ughadaknga hã aka asɔmuka umbɔ utsara agɛ, <<Uwuruwi umum iki ishor atamnga, awu uner ha nuwɔ umbi aka idzur.>>

49 Uyahuda aka aba, unga akpurha azĩ ru Uyesu age, <<A umarhem, umum ighwe ungo!>> Na ashor atamnga.

50 Uyesu agor unga age, <<A uwee, ukorhu ubinkpi uku ukũna ungo uba.>>

Moce anera aba, adzur Uyesu akpom unga.

51 Unying ra angwẽ imesa Uyesu agbiir ikon iki idernga, agber uto ugārhi Ukugang Uwuku Udzowe Idem-Num, azharhuwe.

52 Uyesu agor unga age, <<Utsuke ikon iki iderngo ru udapa. Uben uwuku ugbiir ikon iki ider, awu ikon iki ider ifer unga.

53 Umbi akaiferhkø uge umum ishimum ri ijeea umum iki iyisu Utemum kanying unga adene ipfu itser-Num anakaganga?

54 Bor itseng Arherhu-Num iki igor uge awu ufang akere ha akorhe, iwuri ikorhe igusengge ni itsuifer?>>

55 Moce Uyesu agor ikikang anera age, <<Umun iwu uner uwuku uvui abin anera ri iker, umbi aka idzeka nggu akon aka ader nu igbong adzur umum? Uben unum umum isei ru ufom Iya-Num imesuwe imesa, umbi asi idzurmbi umum.

56 Bor kishoo akere akorhe ngge itsuifer abinke aka atseng ra abvur abika asom Arherhu-Num.>> Moce angwẽ imesanga kishoo ati aborukumbø unga.

*Uyesu ra anang abi udzepurhe*

*(Umar 14.53-65; Irh 22.54-55,63-71; Uyoh 18.13-14,19-24)*

57 Abika adzur Uyesu akũna unga azĩ ru Ukayafa, Ukugang Uwuku Udzowe Idem-Num,

anangkε abika amesuwe Ikpem nu akakũ anera aka akong.

<sup>58</sup> Bər Ubitru adɔsa unga ukuka, utsekũ umbɔ aka azĩ atsĩ ru ufɔm iya Ukugong Uwuku Udzowe Idem-Num. Unga atsĩ aseĩ nggu abi idzεu ha abee inyã imimasha ubinkpi umbɔ aka ikorhe.

<sup>59</sup> Ateiya abika adzowe idem-Num nu abi udzεpurhe kishoo abee igberangwĩyε umbɔ aka itsuke Uyesu na akpo udĩ ukpuku ufere unga.

<sup>60</sup> Anera arherhε aka adzeka, agbeyangwĩ at-suke unga, bər umbɔ asi ikpombɔ udĩ ukpuku ufer unga.

Ri imimaa, anera avaa adzeka,

<sup>61</sup> agε, <<Utsak uwurε agɔr agε, <Umum idεε ibupukũ Iya-Num, ni ibvui idzine ri inuma itaar.>>

<sup>62</sup> Mɔcε, Ukugong Uwuku Udzowe Idem-Num asok agɔr Uyesu agε, <<Ungo usi idzipungo arherhe? Awu use aner abεrε aka arherha atsuka ungo?>>

<sup>63</sup> Bər Uyesu awu uku uvep.

Ukugong Uwuku Udzowe Idem-Num agɔr unga agε, <<Umum itsu ungo nggu uyirh ri itsok Unum uwu urhε, usɔma umɛn, awu ungo uwu Ukiristo Ungwε Unum?>>

<sup>64</sup> Uyesu agɔr unga agε, <<Awu ungo urherhe. Bər umum isɔma umbi kishoo, utirhi ucεrε umbi awuri inyãmbi Ungwε-Ner aka isei ru ubok ugha Nggaa Unum na awuri iba ra amεε afafã.>>

<sup>65</sup> Mɔcε Ukugong Uwuku Udzowe Idem-Num hã avapuwe atorhanga na agε, <<Unga aka arhenu Unum! Awu use umɛn iki ibee ikei? Àka anyã, icεrε umbi aka agũmbi unga aka arhenu Unum.

<sup>66</sup> Umbi anyã aguse?>>

Umbɔ agɛ, <<Imɛngge umbɔ afere unga.>>

<sup>67</sup> Mɔcɛ umbɔ atang aci atsuyiwe ru asunga na akũ ikpoi akwɛr unga. Abɔɔ akwɛre unga inkpai,

<sup>68</sup> na agɛ, <<A Ukiristo! Uɔɛyiwa umɛn, uwuku-song akwɛr ungo ikpoi?>>

*Ubitru atseyi ihwɛng Uyesu*

*(Umar 14.66-72; Irh 22.56-62; Uyoh 18.15-18,25-27)*

<sup>69</sup> Ri ivang hã Ubitru aseɪ ru ufɔm iya ha, nu una igãrhã aba ru unga agɔr unga agɛ, <<Ungo uwu nggu Uyesu uner Ugarhirhi uwurɛ!>>

<sup>70</sup> Bɔr Ubitru atseyinga ra anangmbɔ kishoo agɛ, <<Umun isi ihwɛng ubinkpi ungo uku urherhe!>>

<sup>71</sup> Mɔcɛ unga adzek azĩã ru angwĩ ufɔma, umɔ una uwɔɔ aka anyã unga, agɔr abika adẽẽ umɔ agɛ, <<Utsak uwurɛ awu nggu Uyesu uner Unazarat!>>

<sup>72</sup> Ubitru atseyi ikɛi nggu uyirh agɛ, <<Umun isi ihwɛng utsa ha.>>

<sup>73</sup> Adãrhã ukunjiir, abirabɛ aka adẽẽ umɔ aba agɔr Ubitru agɛ, <<Idzidzɛrhe ungo uwu unying ru umbɔ, ikpũ arherhango ake akũ ungo adzeka.>>

<sup>74</sup> Mɔcɛ unga ayirh agɛ, <<Ikponum ru umum, umum inba ihwɛng utsak uwurɛ!>>

Kanying ikɔ igbɛrkpee.

<sup>75</sup> Mɔcɛ Ubitru aka ayita arherhe Uyesu aka arherhe nggu unga agɛ, <<Ungo uwuri itsɛyingo ihwɛng umum idikunga itaar, nu ikɔ idɔrhi igbɛrkpee.>> Ubitru adzek aciu akpe akarhãrhã.

## 27

*Uyahuda ayapuwe itsikamnga*

*(Umar 15.1; Irh 23.1-2; Uyoh 18.28-32; Aiy 1.18-19)*

<sup>1</sup> Ri igõ ukpeeka, kishoo ateiya abika adzowe idem-Num nu akakũ anera akẽki itsũwã iyiki ifer Uyesu.

<sup>2</sup> Umbõ abow unga, akũna unga azĩ adzowe unga ru Ubirhatu, ugomna.

<sup>3</sup> Ivangye Uyahuda, uwuku ughadaknga, aka anyã umbõ aka atsu Uyesu ufai akpe, unga agõr ra amẽnnga age, <<Uhwengrimi.>> Unga abvui aba ra ateiya abika adzowe idem-Num nu akakũ aner ha. Abvui adzowuka ishãa imang uazurhfa isõka itaar ha.

<sup>4</sup> Age, <<Umum iwu ra arhim, ubinkutsu, umum iki ighadak adzirh uwuku usheru uvau.>>

Bõr umbõ agõr unga age, <<Akẽrẽ awu use ru umẽn? Umei imesungo.>>

<sup>5</sup> Nggee Uyahuda atare uhwek uazurhfa ha ru Iya-Num na adzek azĩã. Mõcẽ unga azĩ ayapuwe itsikamnga.

<sup>6</sup> Bõr ateiya abika adzowe idem-Num akarhu uhweka na age, <<Ri ikpem isi imẽngge umbõ atsuke uhwek ha ru uhwek Iya-Num, uwu ukpu adzirh.>>

<sup>7</sup> Nggee umbõ akẽka na akũ uhweka agoi idẽẽ iyõõ, ayisi idẽẽ ha age idẽẽ uner uwuku udzin anui. Anang akika adzake ikom atsen.

<sup>8</sup> Ngge itsu umbõ ayisi idẽẽ ha uge Idẽẽ Adzirh utseku irherẽ.

<sup>9</sup> Mõcẽ ubinkpi uwuku usõm Arherhu-Num Uir-imiya aka arherhe utsu uferkpõ uge, <<Umbõ

anyangu íshaa imang uazurhfa isoka itaar, uhwek ha aner Uisrairha aka abema umbó afai ri itsinga nukpó,

<sup>10</sup> umbó akū ngge agoi idεε uner uwuku udzin anui ru nyaku Uteijee aka atsuka umum.>>\*

*Uyesu adēē ra anang Ubirhatu*

*(Umar 15.2-15; Irh 23.3-24; Uyoh 18.33–19.16)*

<sup>11</sup> Uyesu adēē ra asu ugomna nukpi, ugomna arhusa unga agε, <<Ungo uwu uyerhe abi Uyahuda?>>

Uyesu agor unga agε, <<Awu ungo urherhe.>>

<sup>12</sup> Bór ateiya abika adzowe idεm-Num nu akakū anera atsuke unga uvau, unga asi idzipunga urhem.

<sup>13</sup> Mōce Ubirhatu arhusa unga agε, <<Ungo usi igūo abin avauke umbó aka atsuka ungo?>>

<sup>14</sup> Bór Uyesu asi idzipuka urhem ru arherhanga, utseku ugomna aka adzeidzeu akarhārā.

<sup>15</sup> Umó awu ugau ugomna ri Irhowa Iyiki Igar Utong, unga atsūwe uner uvau unying uwuruwi umbó aka aseng.

<sup>16</sup> Ri ivang hā umbó awu ru ugbau unera, anera kishoo ahwengmbó unga, itsoka igburh Ubaraba ru ugborzi.

<sup>17</sup> Nggee ivangye anera aka akong, Ubirhatu arhusa umbó agε, <<Umbi abee umum itsūwā umbi ungamo, Ubaraba use Uyesu umbó iki iyisa Ukiristo?>>

<sup>18</sup> Unga ahwenga awu unyēē utsu umbó adzowe Uyesu ru unga.

---

\* **27:10** Àka anyā ikēi: Uzak 11.12,13; Uiri 19.1-13; 32.6-9.

19 Ubirhatu aka asei ra anang isei aka avarha arherhanga, utsēnga adene umbō adēyiwe unga agē, <<Utsū ubokngo ra arherhe utsak ha ashia ru uvau, ngge itsu umum igū uver akarhārḥā irherē ru urhōmum iki irhei ri itsinga.>>

20 Bōr ateiya abika adzowe idēm-Num nu akakū atsu anera agōr agē atsūwe Ubaraba na afere Uyesu.

21 Ugomna iganga abvui arhusa umbō agē, <<Uwuku usong ru umbō ikivarhambō umbi aka abee umum itsūwā?>>

Umbō agē, <<Ubaraba.>>

22 Ubirhatu arhusa umbō agē, <<Umun ikorhi iguse nggu Uyesu umbō iki iyisa Ukiristo?>>

Kishookambō agē, <<Unyapuwe unga!>>

23 Ubirhatu arhusa umbō agē, <<Awu use utsu? Unga akorhu use iyiki ibewe?>>

Bōr anera abvui atsarhi irhakmbō agē, <<Unyapuwe unga!>>

24 Ivangyē Ubirhatu aka anyā unga asi idēē akorhunga ubin, ikēi anera agbisha abee isoyi amēn, unga anyangu amē asorh aboknga ra asu anera. Agē, <<Umun amēmum ashike ra adzirh utsak uwurē, akērē awu ra abokmbi!>>

25 Anera kishoo agē, <<Adzirhnga awe ru urhōkmēn nggu angwēmēn!>>

26 Mōcē unga atsūwūka Ubaraba ru umbō. Unga atsu abi iwa akwēre ugwēē ru Uyesu, na adzowuka umbō anyapuwe unga.

*Abi iwa ayēi Uyesu  
(Umar 15.16-20; Uyoh 19.2-3)*

<sup>27</sup> Mɔcɛ abi iwa ugomna akũ Uyesu azĩmbɔ ru udzɛpurhe ugomna, akɔng kishoo abi iwa adziira unga.

<sup>28</sup> Atsimuwe atorhanga na atsĩme atorho aka abārhā akagɔng.

<sup>29</sup> Atsɛrhi ifur iyɛrhe iyi ídidɔk atsime ni itsinga. Atsu unga akpɔm igbong ru ubok ughanga na atangarhu ra anangnga. Ayɛɛia unga agɛ, <<Urhengo uder Uyɛrhe abi Uyahuda!>>

<sup>30</sup> Ashau aci atsuyiwe unga, ayɛi ugam akwɛr ni itsinga ikɛi.

<sup>31</sup> Umbɔ aka ayɛɛi unga amaa, umbɔ atsimuwe atorho aka abārhā hā na atsĩme atorhanga. Mɔcɛ umbɔ akũna unga azĩmbɔ inyapuwe unga.

### *Anyapuwe Uyesu*

*(Umar 15.21-32; Irh 23.26-43; Uyoh 19.17-27)*

<sup>32</sup> Umbɔ aka adzek, umbɔ agbopu utsak Usayirin uwɔɔ, itsoka igburh Usiman. Umbɔ atsu unga atsā igārhāmau ucucii ha.

<sup>33</sup> Umbɔ azĩ atsĩ anangke umbɔ aki iyisa Ugorhgota, agbena agburh <<Anang Apfupfu Aghow Itsi.>>

<sup>34</sup> Umɔ umbɔ adzowe Uyesu amɛ inebi uku ukpere ugɛ unga ahwa, bɔr unga aka abanga agũ, unga akpɛɛ ihwihwaa.

<sup>35</sup> Ivangye umbɔ aka anyapuwe unga, umbɔ atang isɛng agasha atorhanga.†

<sup>36</sup> Mɔcɛ umbɔ aseɪ umɔ adzɛu unga.

---

† **27:35** Abvur akɔɔ aki itsɛng abok aki isha agɔrke ikɛi ugɛ, Akorha akɛrɛ ngge itsú ubinkpi uner uwuku usɔm Arherhu-Num aka arherhe utsufɛr ugɛ, <<Umbɔ agasha atorhamum nggu adɔkambɔ na atang isɛng ra ake.>>

<sup>37</sup> Ra afafã igãrhãmau ucucii ha ukhapa ri itsinga, umbɔ atsɛng isarhe uvaunga agɛ, <<UWERɛ AWU UYESU, UYɛRHE ABI UYAHUDA.>>

<sup>38</sup> Anyapuwe avɛu avaa nggu unga, unying ru ubok ughanga uwu uvaa ru ubok uferanga.

<sup>39</sup> Anera aka atɔng, arhena unga azung atsimbɔ,

<sup>40</sup> agɛ, <<Ĩhĩ! Ungu iki isipuwe Iya-Num, nu udzine ike ikɛi ri inuma itaar, ucipuwa nu igãrhãmau ucuciia ha ufɔrh itsingo, ungo uba uwu Ungwɛ Unum!>>

<sup>41</sup> Rimi hã ikɛi ateiya abika adzowe idɛm-Num nu abika amesuwe Ikpem nu akakũ anera ayɛɛia unga.

<sup>42</sup> Agɛ, <<Unga afɔrhe abɔɔ, bɔr asi idɛɛ afɔrha itsinga! Unga aba awu Uyɛrhe Uisrairha, unga acipuwa icɛrɛ ru igãrhãmau ucucii ha, nu umɛn iwe ru imangmang ru unga.

<sup>43</sup> Unga awe ru imangmang ru Unum. Uneke Unum afɔrhe unga icɛrɛ, unga aba abeenga. Unga agɛ, <Umum iwu Ungwɛ Unum.> >>

<sup>44</sup> Rimi hã avɛu ha umbɔ aka anyapuwe nggu unga arherhuwe unga arherhe aka atãrhã.

### *Akpe Uyesu*

*(Umar 15.33-41; Irh 23.44-49; Uyoh 19.28-30)*

<sup>45</sup> Utirhi ri idzingga atenuma, uzĩ utsirkpɔ abĩã kishoo utɛku akara ataar aki urhɛɛ.

<sup>46</sup> Ru akara ataar ikɛi Uyesu atsarhi irhaknga ikerketangge agɛ, <<Erhoi, Erhoi,‡ urhama sabaktani?>> agbena agburh, <<A Unummun, a Unummun, awu use utsu ungo uneka umum?>>

---

‡ 27:46 Àka anyã ikɛi: Amb 22.1.

47 Abika adēē umō aka agū rimi, umbō agē, <<Unga adēē iyisu uner uwuku usōm Arherhu-Num Uirhiya.>>

48 Kanying uwōō atī azī anyangu usoso. Abii ra amē inebī akika agbata, avaki igbong, adzowe Uyesu ugē unga ayam.

49 Bōr abōō agē, <<Àka aneke unga, umēn inyāni use Uirhiya awuri afōrhuka unga.>>

50 Mōcē Uyesu aka abvui atsarhi irhaknga ikerketangge atsu ivum, na atsūwūka ipfunga.

51 Ru ivang hā urhaburhe ukpu Iya-Num uvaar akperha avaa udzur ri itsia uba utsī abīā. Abī azusa, ífa iyata.

52 Adzak ayar atsuri, ayor asarkasar anera arherhē abika akpe asok nggu urhē,

53 umbō adzeka ra adzakmbō. Ivangyē Uyesu aka asok ra akpe, abika akpe ha atsīmbo asarkasar uteu Urusharhima, anera arherhē aka anyā umbō.

54 Ri ivang hā uteiya abi iwa Uroma nu abōō abika adēē adzēu Uyesu anyā izizusa abī nu ikei abinkē aka akorhe, umbō agū iwei akarhār hā, na agē, <<Idzidzerhe uwerē ha awu Ungwē Unum!>>

55 Akatsēr h arherhē aka awe umō, adēē ukuka na azerhe ubinkpi uku ukorhe. Umbō adzeku Ugarhirhi adōsu Uyesu akorhuwe unga ubinkpi unga aka abee.

56 Ru umbō awu umbō Umaryamu Umagadarha, nu Umaryamu uyisa Uyaku nu Uyusuf, angwē Uzabadi.

*Igwirhuwe iyor Uyesu*

*(Umar 15.42-47; Irh 23.50-56; Uyoh 19.38-42)*

<sup>57</sup> Urhεε uku uyo, uner ubin uwəə, utsa Uari-matiya aba umə, itsoknga igburh Uyusuf. Unga awu ungwē imesu Uyesu.

<sup>58</sup> Azĩ ru Ubirhatu, ashōrhā unga adzowe ukom Uyesu. Ubirhatu atsu umbə adzowe ukoma ru unga.

<sup>59</sup> Uyusuf ashupu ukom hā, akū atorho aka afa abērḥ,

<sup>60</sup> atsuke ukpə ru udzak uku ufa ukpurukpi unga aka atsē ri ifen utarḥ. Unga agōrhū nggaa utarḥ afəme angwĩ udzaka na azĩā.

<sup>61</sup> Umaryamu Umagadarha nu Umaryamu uwəə aseı akhapa umə ra angwĩ udzak ha.

### *Abika adzεu udzak ha*

<sup>62</sup> Ukpe unum uvaa, unum ukpuku ugbisha abin uku utəng, ateiya abika adzowe idεm-Num nu abi Ufarisi akəng ra anang Ubirhatu,

<sup>63</sup> agε, <<A Uteiya! Umən iyitumən ubinkpi uner uwuku urhεm aner ha aka arherhe, unga aka ana awe nggu urhε, unga agε, <Inuma itaar iba iwengge umum iwuri isokū ra akpe.>

<sup>64</sup> Ngge itsu umbə adzεu udzak ha utsεku inuma itaar, utsur angwē imesanga azĩ avεu ukomnga na agər anera ugε unga aka asoka ra akpe. Irhirhεm iyi imaataka iwuri ibewe inangngge iyi ingg-baashia.>>

<sup>65</sup> Ubirhatu agər umbə agε, <<Àka akarha abi iwa azĩ adzεu kishoo ri ikermbi.>>

<sup>66</sup> Nggee umbə azĩ avinu udzak ha, akwər utsar iyerhe nú utarḥ udzak ha, atsu abi iwa adzεu anang hā.

## 28

*Isisok Uyesu ra akpe*

*(Umar 16.1-8; Irh 24.1-12; Uyoh 20.1-10)*

<sup>1</sup> Unum ukpuku Uwosha uku utɔng, ru un-  
kpeka unum ukpu inggbaashia ru inuma utɔva,  
Umaryamu Umagadarha nu Umaryamu uwɔɔ  
azĩmbɔ iyepu udzak ha.

<sup>2</sup> Umɔ nggaa izizusa abĩ iki izusa, ipfu itser  
Uteijee idzeka afã, izĩngge ru udzak ha, igɔrhuwe  
utarh ha umbɔ aka atsĩme udzak ha, isei nú ukpɔ.

<sup>3</sup> Idzidzeka ngge irhang ru nyaki inai iki in-  
yaka, atorha ake awu uku upɛrheng ugɛɛ aghwitu  
urhurhu.

<sup>4</sup> Abi idzɛu aka anyã ngge, iwei ifɛr umbɔ, azang  
ayormbɔ agbei ra abĩ ugɛɛ ikom.

<sup>5</sup> Bɔr ipfu itser-Num hã igɔr akatsɛrh ha igɛ,  
<<Àka niba agũmbi iwei, umum ihwɛng umbi abee  
Uyesu uwuruwi umbɔ aka anyapuwe.

<sup>6</sup> Unga ashia nggimi, unga aka asoka, ru nyaka  
unga aka arherhe. Àka aba anyã anangke unga  
aka anu.

<sup>7</sup> Mɔcɛ àka azĩ ifetem azĩ asɔme angwɛ imesanga  
ugɛ, <Unga aka asoka ra akpe, nggawɔ agbaashia  
azĩ Ugarhirhi ru umbi. Nggɔɔ ha umbi awuri  
inyãmbi unga.> Àka agũ, umum iki idɛyiwamum  
umbi.>>

<sup>8</sup> Nggee akatsɛrh ha iki ifefetem asokmbɔ ru  
udzaka, agũ iwei nggu anggɔm, atĩ azĩ idɛyiwe  
angwɛ imesanga.

<sup>9</sup> Kanying Uyesu agbopa umbɔ. Agɔr umbɔ  
agɛ. <<Ighwe umbi!>> Umbɔ agɔpa aba awuma  
adaknga, adzowe unga igɔng.

10 Mɔcɛ Uyesu agɔr umbɔ agɛ, <<Àka niba agũmbi iwei. Àka azĩ asɔme angwẽmɛn umbɔ azĩ Ugarhirhi. Nggɔɔ ha umbɔ aka inyã umum.>>

*Ubinkpi abi idzɛu aka arherhe*

11 Akatsɛrh ha awe ru uzẽrhã, abɔɔ abi idzɛu udzak ha atsĩmbɔ utepa, asɔme ateiya abika adzowe idɛm-Num kishoo ubinkpi uku ukorhe.

12 Ivangyɛ ateiya abika adzowe idɛm-Num nu akakũ anera akɔng akɛki itsũwã, umbɔ adzowe abi iwa ha uhwek urherhɛ.

13 Agɔr umbɔ agɛ, <<Àka agɔr agɛ, <Angwẽ ime-sanga aba avɛu ukomnga ru untsuuka, ri ivangyɛ umbi aka awe ru urhɔ.>

14 Arherha akɛɛ aba atsĩke ra ato ugomna, umɛn iwuri irherhumɛn arherhe nggu unga, umbi asi ihwambi uver.>>

15 Nggee abi iwa ha ayɛi uhweka na akorhe ru nyaka umbɔ aka agɔr umbɔ akorhe. Nu arherhe akɛɛ atẽrhã amaake abi Uyahuda aba atsĩ irherɛ.

*Itseryɛ Uyesu aka adzowe angwẽ imesanga*

*(Umar 16.14-18; Irh 24.36-49; Uyoh 20.19-23; Aiy 1.6-8)*

16 Mɔcɛ angwẽ imesa ha usɔka nu unying hã azĩmbɔ Ugarhirhi, azĩmbɔ ri igũ hã Uyesu aka agɔr umbɔ izĩ.

17 Umbɔ aka anyã unga, umbɔ adzowe unga igɔng, bɔr abɔɔ acucang.

18 Mɔcɛ Uyesu aba ru umbɔ agɔr umbɔ agɛ, <<Àka adzaambɔ umum ijeea kishoo iyi afã nggu abĩ.

19 Nggee àka azĩ akũ anera kishoo ru upfunga aba adɔsa umum. Àka asorhuwe umbɔ ubɔtisima ri itsok Ute nu iki Ungwẽ nu iki Ipfu Isarsatangge.\*

20 Àka amesuwe umbɔ adɔsa kishoo abinke umum iki itsuka umbi. Idzidzerhe umum iwe nggu umbi, utseku imimashu upfung.>>

---

\* **28:19** Àka anyã ikɛi: Aiy 8.16; 19.5.

**Ibibemuwe-Num Iyiki Ifa Ru Dũya  
Duya: Ibibemuwe-Num Iyiki Ifa Ru Dũya (New  
Testament)**

copyright © 2024 Wycliffe Bible Translators, Inc.

Language: (Duya)

Translation by: Dũya Development Association

Contributor: SIL Nigeria

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-08

---

PDF generated using Haiola and XeLaTeX on 8 May 2025 from source files dated 8 May 2025

3ccd0531-8578-54e4-a023-62d4592e4b27